

**NATIONAL ASSEMBLY OF  
SEYCHELLES**

*Tuesday 31<sup>st</sup> May, 2022*

*The Assembly met at 9am*

*National Anthem*

*Moment of Reflection*

*Mr Speaker in the Chair*

**MR SPEAKER**

Bonzour Manm Onorab. Bonzour tou *staff* ki pe asiste nou. Bonzour manm piblik ki'n zwenn nou pou sa lazournen. Mersi pou zot latansyon.

Donk kominikasyon mon krwar nou annan en rapor SADCOPAC lo kote Onorab Pillay. Ou annan sa? Madanm Clerk i dir mwan nou a fer Prezantasyon Papye, eski ou'n pare pou sa rapor?

**HON SEBASTIEN PILLAY**

Non, Mr Speaker. Ki pou arive nou ti *delegate* Onorab Mondon pou *attend* sa sesyon. So, Onorab Mondon i ava fer prezantasyon sa rapor. Wi prezantasyon sa rapor i zis kot nou donn ou en kopi sa rapor, pa pou al dan detay.

**MR SPEAKER**

Wi, i pa pou al an plis ki sa - *ok* byen. Madam Clerk nou a fer Prezantasyon Dokiman.

**MADAM CLERK**

Mersi Mr Speaker. Bonzour Mr Speaker. Bonzour tou bann manm e tou dimoun ki a lekout. Bann Papye ki pe ganny prezante i;

S.I. 63 of 2022 2.5% 3-year Treasury Bond Debt Order, 2022.

S.I. 64 of 2022 3.5% 4-year Treasury Bond Debt Order, 2022.

S.I. 65 of 2022 3.75% 5 Year Development Bank of Seychelles Bond Guarantee of Debt Order, 2022.

S.I. 66 of 2022 4.5% 6-year Treasury Bond Debt Order, 2022.

S.I. 67 of 2022 5% 7-year Treasury Bond Debt Order, 2022.

S.I. 68 of 2022, International Bank for Reconstruction and Development–Seychelles First Fiscal Sustainability and Climate Resilience Debt, Order 2022.

S.I. 69 of 2022 International Bank for Reconstruction and Development – Strengthening Quality of the Social Protection System Program Debt Order, 2022.

Mission Report on the Southern African Development Community Organisation of Public Accounts Committees (SADCOPAC) Governance

*Meeting & Training for Public Accounts Committees (PACs) and Technical Officials Supporting PACs – Held in Harare, Zimbabwe from 22<sup>nd</sup> to 25<sup>th</sup> of March, 2022.* Mersi Mr Speaker.

**MR SPEAKER**

Mersi Madanm Clerk. E byensir se sa rapor ki in fer referans avek lo dernyen. Eski Onorab Mondon pou soumet sa rapor la?

**HON TERENCE MONDON**

Mersi Mr Speaker. Bonzour tou bann koleg. Mr Speaker mon krwar i annan en pti konfizyon la. Nou pa'n okouran si nou pou prezant sa rapor la ozordi bomaten. Mwan mon'n konpran ki pe *table* sa rapor pou tou Manm Lasanble ganny en kopi. Mersi.

**MR SPEAKER**

I senp Onorab Mondon, si ou pa ankor pare pou soumet nou a fer li en lot moman.

**HON TERENCE MONDON**

Wi Mr Speaker. Nou pe soumet sa rapor avek Lasanble ki baze lo Misyon SADCOPAC *Zimbabwe*. Mersi.

**MR SPEAKER**

Mersi. Dan sa ka madanm Raporter i ava anmas sa rapor e i a delivre isi. Bon avan nou

komans lo *Private Notice Question* mon'n donn - ok, mon'n donn *Leader* Lopozisyon Onorab Pillay en *matter of privilege* ki i anvi *raise*. Onorab Pillay - a kondisyon ki i fer li bref silvouple. Onorab Pillay. Mersi.

**HON SEBASTIEN PILLAY**

Mersi Mr Speaker. Mon pou fer li bref. Bonzour Mr Speaker. Bonzour tou koleg Onorab e bonzour tou dimoun ki a lekout.

Mr Speaker, mon *matter of privilege* i *relate to* larepons ki Lasanble ti gannyen avek Minis Derjaques konsernan *law chamber* ki pe reprezant *Travizory* kot ler i ti ganny demande kestyon si li i annan okenn lyen direk avek sa *law firm* Minis Derjaques pa ti enform Lasanble - i pa ti dir Lasanble. E se ler nou ti demann li si i annan konfli lentere i ti dir ki i napa konfli lentere.

Dan mon lanmen mon annan dokiman enkorporasyon sa *Law Chamber Ferley & Associate* e ladan non, Minis Derjaques i aparet koman en asosye. Sa i fer ki Minis Derjaques ki Minis ki responsab pou dosye *Travisory* i osi pe ak koman *legal advisor* oubyen son *chamber.....(technical*

*problem*) - i en mank lonnekte lo lapar Minis.

Akoz an relasyon ek son fonksyon i ton devret deklar son lentere. Me osi i montre ki i kapab - i montre ki i kapab annan kek *collusion* ki pe arive an relasyon avek *Travizory* e lofis sa Minis.

Set alor Mr Speaker ki mon pe donn notis anba Lartik 74 konstitisyon ki mon annan lentansyon anmenn en Mosyon *provided* ki mon kapab ganny en tyer Lasanble pou siport mwan.

E la mon pou demann mon bann Manm, mon bann koleg lo lot kote latab par lefe ki isi lo sa kote latab apre ki mon'n koz ek mon bann koleg ki'n dakor pou siport sa notis, nou pa pou ganny en tyer pou reprezant sa notis ki pou ganny donner avek ou, ki nou oule anmenn en Mosyon pou sansir, e demande ki Minis Derjaques i *resign* par lefe ki in *mislead* Lasanble e par lefe ki i kapab sa ki in fer i kapab reprezant en *abuse of* son pozisyon koman Minis!

Mon soumet sa avek ou Mr speaker e mon ti a kontan, e mon ti a swete si mon bann koleg lo lot kote latab i siport mwan pou mwan kapab ganny en tyer, pou kapab fer notis pou sa Mosyon ki nou ava kapab *move* devan Lasanble Nasyonal. E mon pou zis met en presizyon Mr Speaker.

Lartik 74 i dir; en tel Mosyon i kapab ganny *move*, si mon donn 7 zour notis Speaker sa i 74(2)(a), e sa Mosyon i selman kapab ganny *move* si i ganny sinyen par *not less* ki en tyer manm Lasanble dan Lasanble Nasyonal.

Set alor ki mon pou bezwen en tyer e se pour sa rezon ki mon pe met mon konfyans dan mon bann koleg lo kot kote latab, si zot santi poudir Lasanble Nasyonal i devret ganny sa respe e ki en Minis ki vin devan Lasanble i devret donn tou lenformasyon, ...

#### **MR SPEAKER**

Mersi Onorab Pillay. Ou'n fer ou *matter of privilege*.

#### **HON SEBASTIEN PILLAY**

... nou ava kapab *move* lo sa Mosyon. Mon remerci ou Mr Speaker.

#### **MR SPEAKER**

Mersi. Mon krwar pli bon mannyer posede se ki Onorab Pillay i donn mwan letan pou regard *verbatim* sa Lasanble, pou mwan gete ki mannyer kestyon ti ganny demande, e ki mannyer i ti ganny reponn pou mwan konnen si son *matter of privilege* i zistifye. Mersi.

E Onorab Cosgrow osi i annan en *matter of privilege* mon les li leve.

**HON WALLACE COSGROW**

Mersi Mr Speaker. Bonzour Mr Speaker. Bonzour tou dimoun, tou Manm Lasanble Nasyonal. Mr Speaker mon *matter of privilege* i relate to privelez Lasanble an zeneral pou ganny lenformasyon korek.

Annefe dan de lenstans Onorab *Leader* Lopozisyon in *highlight* en lenstans kot Lasanble nou menm atraver bann Minis lenformasyon e ganny donnen parfwa i pa korek e privelez lasanble i ganny afekte.

2 legzanp enn konsernen *Travizory* larepons Minis Derjaques Mr Speaker ou dir ou ava al revwar e dezyenm nou ti ganny larepons avek Minis Vidot konsernan devlopman plantasyon lavannir.

E finalman dernyen-r-er nou'n vwar poudir plantasyon lavannir in tonm an rim la Digue.

So koman en Manm Lasanble mon santi ki nou privelez pug ganny lenformasyon korek i pe ganny vyole. E ki nou koman bann Manm Lasanble mou devret kapab lev en *matter of privilege* e met deor avek L'Egzekitiv ki nou bezwen bann larepons ki korek, ki faktyel pou travay Lasanble Nasyonal. Mersi Mr Speaker.

**MR SPEAKER**

Mersi. Mon'n fini pronons en *ruling* lo *Travizory* alor mon pa pou adres sa ankor. Lo size kot topik lavannir ki konsern Minis Devika Vidot. Anfen Minis Devika Vidot ti donn en repons lo kestyon dan Lasanble. I kapab annan en diferans ant ki mannyer ou, ou war sityasyon e ki mannyer li i war sityasyon.

Mon pa neserman krwar ki Minis Vidot in *mislead* Lasanble. I kapab annan en diferans ki mannyer keksoz i ganny get lo kote en Minis e lo kote Lasanble. Mersi.

Onorab Lemiel mon pa pe al ankor ladan e si ou ti an en lot pwen ou ti ava fer mon konnen silvouple annavans nou bezwen kontinyen. Eskiz mwan nou'n terminen lo la mon *ruling* i *final*. Mersi.

Madanm raporter nou ava apel Minis pou *Private Notice Question* silvouple. Onorab Lemiel silvouple notifie mwan ki pwen oule leve apre nou a regarde ki mannyer nou pou met li Lasanble.

Bonzour Minis pou Lenvestisman Entreprenarya e Lendistri Minis Devika Vidot e osi Ms Angelic Appoo *CEO Enterprise Seychelles Agency*. Byenveni dan Lasanble pou reponn kestyon *Private Notice Question* *Leader* Lopozisyon.

Onorab Pillay ou a met ou kestyon silvouple.

**HON SEBASTIEN PILLAY**

Mersi Mr Speaker. Bonzour Minis e bonzour lezot manm ou delegasyon. Mon kestyon i lir koumsa;

Eski Lasanble i kapab ganny detay lo:

(i) Konbyen pti e mwayen lantrepriz i annan aktyelman Sesel?

(ii) Ki bann difikilte prensipal ki sa bann pti e mwayen lantrepriz pe fer fas avek?

(iii) Konbyen parmi sa bann pti e mwayen lantrepriz ki'n fermen depi sa dernyen 19 mwan? Mersi Mr Speaker.

**MR SPEAKER**

Mersi Onorab. Minis ou repons silvouple.

**MINISTER DEVIKA VIDOT**

Mersi Mr Speaker. Bonzour Mr Speaker. Bonzour tou Manm Onorab prezan. Bonzour tou manm piblik ki a lekout.

Mr Speaker premye parti kestyon i annan pou fer avek rikord statistik e mon vreman kontan sa kestyon in ganny leve akoz i permet mwan pou koz lo enn bann keksoz ki nou Gouvernman in idantifye parmi nou bann problem ki nou pei pe sey rezourd.

E malerezman mentenir statistik i enn bann landrwa

kot Gouvernman oparavan in neglig bokou. Bokou statistik in eparpiye e sakenn bann antite in gard son prop rikord e prensipalman dan konteks en lantrepriz. Sa i plizoumwenn kot *National Bureau of Statistics, ESA, Licensing* ouswa SRC.

Fodre osi note ki definisyon pou sa bann kategori mikro pti e mwayen biznes i pa anliny dan tou sa bann Lazans, alor sa i fer ki konparezon statistik i vin pli difisil. I lo nou plan pou fer le neserer pou met sa bann definisyon anliny atraver Lazans Gouvernman.

An plis ki sa Mr Speaker detrwa lannen pase anviron \$800mil ti ganny donn en atraver en *Grant* pou devlop sekter pti e mwayen antrepriz Sesel. E ladan pros \$150mil ti ganny dedye pou devlop e enplimant en *information management system* pou sa bann letan *SENPA* e *SBFA* benefisyè.

Sa sistenm ti pou bezwen annan en eleman kot en *database* ti pou kapab ganny garde lo bann biznes, e sa ti ava pret nou ganny bann statistik pli entegre dan en sel *platform*.

Malerezman Gouvernman ti deside dan sa bann letan pou sanz rol *SENPA* e entrodwir *ESA*, san pran konsiderasyon sa

sistenm. E lo kote *SBFA* ki ti ganny dedye pou asiste pti biznes ti fermen pou bann rezon ki nou tou nou okouran. Alor Mr Speaker i fer ki ni enn ant sa bann sistenm pa pe ganny servi ozordi.

Bon mon pou kapab partaz avek Onorab bann rikord mentenir par Biro Statistik Sesel dapre dernyen sondaz demontre ki mikro - bann biznes mikro i annan 6719 - pti 1017 e mwayen 269 e sa i fer ki i annan en total anviron 8mil - 8mil5.

E parey zot okouran i annan en lot sondaz ki pe ganny fer an se moman kot Biro Statistik e alors i pou partaz avek nou bann sa nouvo sif sa legzersis i terminen e nou ekspekte avek kalkilasyon ki nou'n fer, ki sa sif i ekspekte ogmant dan ziska dan apepre 9mil.

An menm tan lo kote *ESA* nou pe kontinyen travay, nou pe kontinyen sa travay ki nou ti'n komanse depi lannen pase pou zisteman *update* nou *database* avek lenformasyon, pour ki osito nou ganny finansman nou pou kapab fer sa vin nimerik e santral.

Dezyenm parti kestyon Mr Speaker, i annan pou fer avek bann difikilte prensipal ki sa bann pti e mwayen lantrepriz pe fer fas avek. E defi ki biznes pe fer fas avek i bann menm defi ki pei antye ti

fer fas avek pandan letan *COVID-19*. Parey zot ava rapel Gouvernman an Zanvye 2020 ti napa ase larzan pou pey saler travayer.

E parey zot osi kapab konstata nou lekonomi in reisir pou sirmont bokou sa bann defi. E lannen pase nou lekonomi in grosi par 8poursan. Letan lekonomi in grosi vedir ki pwisans, krwasans sekter prive osi pe grosi. E sa i demontre Mr Speaker pour ki sekter prive - savedir bann pti mwayen biznes zot osi zot in kapab rezouir pandan sa bann moman.

E sa Mr Speaker i bi Gouvernman. Nou anvi vwar bann biznes zwir larises pour ki sa i ava ed zot kontinyen sirmont ban defi ki lemonn pe kontinyen pas atraver. Enn bann difikilte prensipal ki vin devan lofis, lofis Minis se akse avek lespas ouswa later pour bann biznes fer zot bann loperasyon.

Sa i enn parmi bann demann pli dominan ki pas atraver lofis. E sa dan li menm i demontre ki kantite lentere ki dimoun i annan pou komans ouswa agrandi zot biznes. Bokou dimoun in osi montre lentere pou lans dan bann lendistri, ki nou pe ankouraze tel ki ba aktivite dan tourizm osi byen ki dan bann lendistri an servan bann prodwi lokal.

E mon krwar laplipar de nou in kapab obzerve ki pandan letan *COVID* par egzanp, ti annan bann biznes ki ti'n vwar li dan bann moman difisil ;- par egzanp *car hire* ki ti'n komans bezwen vann zot bann loto, me ozordi zour sa bann dimoun pe re aste loto pou refer zot *fleet*.

Avek retour touris dan pei loportinite biznes espesyalman santre otour *cultural tourism* - savedir bann aktivite ki kapab atir bann touris pou zot fer bann aktivite lwazir ki vize ver nou kiltir e tousala i annan loportinite. E atraver Minis Touris e sa i en keksoz ki zot pe vremen pouse.

Letan ou pas Providence par egzanp pertou kote ou vwar bann batiman ki pe monte e ankor sa i en keksoz vizyel kot nou kapab vwar poudir i annan devlopman ki pe ganny fer.

E mon pou abord en lot defi Mr Speaker, en lot defi ki bann biznes pe fer fas avek e sa se defi *access to finance* - ouswa akse avek bann finans. E la mon anvi fer resorti ki dan la mazorite - letan sa bann ka i vin devan nou se senpleman en mank konesans lo ki kalite fasilite e finansman ki annan disponib.

Parske an se moman i annan bokou fasilite finansye ki biznes i kapab ganny akse

avek, me malerezman dan serten sityasyon dimoun napa ase ledikasyon finansyel ouswa zot pa reisir pou ganny *loan*, akoz zot pa pe zer zot kont labank ouswa finans byen.

E sa Mr Speaker i enn bann konsern ki nou pe vremen pran o serye. E i enn bann program mazer ki *ESA* pe partisip ladan e nou pe osi fodre bann soutyen aletranze pou nou kapab met sa program an mars.

Mr Speaker malgre sa nouvo lelan ki nou lekonomi in pran, nou konsyan ki sityasyon i komans agrave dan lemonn akoz lager *Ukraine* e Sesel osi pa pou ganny eparnye. Alors nou ekspekte ki bann biznes pou vwar zot fer fas avek bann logmantasyon dan kou ki zot fer biznes la ki kou *fuel* in deza ogmante.

E la parey *COVID* in montre nou fodre ki nou bann dimoun i reste for, vin pli entelizan dan lafason ki nou fer biznes. Nou bezwen revwar si fodre revwar nou model biznes, nou reste konpetitiv. E kot i pli enportan ankor annou sey vwar kot nou kapab servi nou bann resours o maksimonm ki a nou dispozisyon.

Trwazyenm parti kestyon Mr Speaker, i konsern la kantite bann pti e mwayen lantrepriz ki'n fermen depi sa

dernyen 19mwan. Dapre statistik Lotorite *License* Sesel depi Oktob 2020 ziska le 30 Me 2022 in annan apepre 1086 *license* ki'n ganny kennsel.

Me akoz ki mon konpran ki Onorab i annan lentere bann biznes a ker, mon egalman kontan pou partaz avek li ki i an 2565 nouvo *license* ki'n ganny donnen. Savedir malgre ki i annan *license* ki'n ganny kennsel i an apepre 2.5fwa plis bann nouvo biznes ki'n ouver.

E zis pou mwan eksplik ankor en pti morso, i form par en prosis normal pandan restriktirasyon lekonomi ki serten biznes i ferm son *license* e re aziste pou pran lezot aktivite.

E *COVID* in montre nou bokou lenstans lot bann biznes in bezwen re aziste, anvi bann mezir sanniter ki ti an mars. E nou kote nou'n vwar ki sa in anmenn en laspe pozitiv dan lekonomi, kot nou pe osi ankouraz bann biznes pou *think outside the box* e devlop lespri lantreprenarya.

Mr Speaker Gouvernman i reste *committed* pou li devlop lenfrastriktir fasilite e ankouraz dimoun pou debourye. E nou anvi ankor lans en lapel pou met biznes okouran ki Gouvernman pou la pou mars avek zot.

E tou resaman nou *Fitch rating* in amelyore e sa in ganny pibliye dan medya e mon krwar ki nou tou isi nou okouran. E sa zisteman i demontre ankor enn fwa konfidans dan lekonomi Sesel. In annan en gran logmantasyon dan laplikasyon ki'n ganny resevwar par *SIB*, e ankor sa i zis montre kalite lelan, ki lentere ki bann dimoun i annan pou fer biznes.

Savedir Onorab, lenformasyon ki nou annan i demontre ki malgre i annan serten biznes ki'n bezwen reaziste, sorti en aktivite pou viz ver en lot an zeneral in annan plis lentere e in annan plis biznes ki'n ganny kree pandan sa dernyen 19mwan.

E mwan personnelman mon krwar ki sekter prive i annan bokou potansyel e Minister pou kontinyen travay kot a kot avek sekter prive pou nou fer sir poudir zot rezouir larises, e zot kre lanplwa parey zot sipoze dan en lekonomi ki stab en lekonomi ki *condusive* pou biznes. Mersi Mr Speaker.

### **MR SPEAKER**

Mersi Minis. Bon nou a pas lo en pe kesye siplemanter ban manm avan nou retourn kot *Leader* lopoziyon. Mon rapel zot gard kestyon kourt. Mon pou pran kestyon siplemanter pou apepre 20 minit pou letan



ki nou annan. Premye Onorab Sandy Arissol.

### **HON SANDY ARISSOL**

Mersi Mr Speaker. Mersi Minis avek Ms Appoo. Bonzour tou dimoun ki a lekout espesyalman bann zabitan Bel Ombre. Mr Speaker mon ti a kontan demann Minis de kestyon.

Mon premye kestyon mon ti a kontan demann Minis an vi ki bann gran lakonpanyen aeryen zot in fer fas avek difikilte dan letan COVID, so ou espekte poudir ki nou bann pti antrepriz osi zot fer fas avek sa. Alor lo sa pwen mon ti a kontan demann ou, ki ou Gouvernman pe fer zisteman pou nou kapab soulaz plizyer dimoun parey i annan dan mon distrik ki anvi fer biznes, ki annan son lekipman ki'n vin devan?

Par egzanp mon annan madanm Larose Bel Ombre, zisteman i anvi en pti landrwa alokasyon la Beau Vallon. Ki Gouvernman pe fer dan sa bout Beau Vallon la pou nou kapab reorganiz, fasilite li, pour ki bann dimoun ki annan son biznes ki enterese pou ganny en lokasyon?

Dezyenman mon ti a kontan demann ou lavil, i annan kot vye *playground* ti ete la, bann artizan pti biznes ti demann en kyosk, mon war i annan kyosk in mete kouler

larkansyel tou dilon, personn mon pa war ladan, mon ti a kontan demande ki pe arive? Mersi bokou Mr Speaker.

### **MR SPEAKER**

Mersi. Minis repons.

### **MINISTER DEVIKA VIDOT**

Mersi Mr Speaker. Mersi Onorab pou ou bann kestyon. An sa ki konsern Beau Vallon parey mon deza fer sorti dan Lasanble isi, i annan sa plan ki pe ganny travay lo la pou Beau Vallon. E zisteman i dan staz finalizasyon. In deza ganny prezante avek *Cabinet* e ti annan serten lazisteman ki bezwen ganny fer.

E byento Onorab bann zabitan pou kapab vwar e zot pou kapab vwar loportinite ki sa proze pou kapab met devan zot me tousala nou ava fini. Les nou finaliz sa plan dabor akoz i enportan ki letan nou pe fer en plan osi nou fer li dan en fason annord. Akoz nou pa anvi kre dezord ankor enn fwa Beau Vallon, kot i annan en kantite biznes eparpiye e zot zet salte ensidswit - i mank sa kordinasyon.

Nou anvi evit en sityasyon koumsa, alors permet nou finaliz sa plan avan ki nou met devan bann biznes pou zot *apply*.

An sa ki konsern *playground*, sa osi i annan en lot plan ki byento la petet dan

semen prosenn, si mon kapab ganny konfirmasyon ouswa dan ankor 2 semenn i pou vin devan *Cabinet*.

I annan bokou travay ki'n ganny fer lo sa osi sa bann pti kyosk ki sa bann pti kyosk tou kouler ki ou vwar, sa mon osi mon vin zwenn la. Dapre konpran sa ti ganny dedye, ti ganny mete la aköz ti annan bann biznes ki zot ti pe fer, zot ti pe met zot bann latab dan bazar en pti pe partou e alor ti donn zot en lespas pou vin la.

Rezon aköz ki ou vwar sa bann kyosk ki ankor rete fermen en bon pe zot se ki bokou sa bann dimoun zot ankor prefere pou zot reste dan bazar, so zot dir nou laba ki annan plis trafik, egzaktaman. E alor zot si zot santi zot pli alez laba e zot pa pe bouz kot *playground*.

Me se la ki *ESA* i annan serten demars ki i pe fer avek zot e mon ava pas laparol avek Ms Appoo i ava eksplik ou ne pe plis lo la.

### **MR SPEAKER**

Mersi Minis. *CEO* wi.

### **CEO ESA ANGELIC APPOO**

Bonzour Mr Speaker. Bonzour Onorab. Mersi pou ou kestyon. Byensir parey Minister in nonmen sa bann kyosk ti ganny dedye pou bann dimoun *street vendors*,

bann ki nou ti vwar partou dan lavil.

So nou'n ankadre zot met zot dan en landrwa, me letan nou donn zot landrwa zot dir napa lavant napa kliyan, so nou'n sey fer tou sa ki nou kapab pou zot. Nou'n menm travay ek zot, sey fer aktivite *improve* landrwa pou zot. Me selman nou *still* vwar zot pa pe servi sa propriyete.

Byen, *ESA* i annan 2 plan la, premyerman depandan lo faz proze *ex-Playground* ki'n ganny konsevwar e ki *timeline* nou gannyen. Byento *probably* tou bann dimoun nou *ex-Playground* pou bezwen bouze pou kapab *accommodate* nouvo proze ki pe vini.

E alors zot pou annan en swa si zot anvi ganny *accommodate* dan nouvo proze ki pe vini zot kapab *tender* letan nou met bann lavertisman, si non nou pou osi donn loportinite lezot dimoun ki'n pli serye. Aköz nou vwar ki i annan serten ki pa'n vreman fer sa pa, pou zot etabli zot biznes, lev zot profil nou kapab dir e anmenn zot kliyan kot zot.

So nou pe regarde dan prose ki mannyer bann demars i deroule. Mersi.

### **MR SPEAKER**

Mersi *CEO*. Onorab Cosgrow. Kestyon.

**HON WALLACE COSGROW**

Mersi ankor Mr Speaker. Bonzour tou dimoun. Minis ou'n koz lo bann diferan sityasyon biznes ozordi sirtou ptipti e mwayenn antrepriz, i pa en sekre nou konnen ki poudir ozordi pri *fuel* avek pri komodite debaz in ogmante.

I en fe, e nou konnen ki en kantite bann biznes ozordi ki tonm dan pti e mwayen antrepriz se bann biznes transportasyon e osi bann biznes par egzanp ki dil avek manze, *food industry*.

So eski zot an okenn petet stratezi ou Polisi pou ede soulaz en pti pe petet dan kourt term e mwayen term, lenpak ki sa bann pri egzorbitan lo *fuel* avek lo manze i annan, pour ki sa bann biznes i kapab kontinyen *operate* e ki konsonmater pa ganny afekte avek sa pri ogmante, ki biznes dabor i napa swa i bezwen pas lo konsonmater?

Dezyenm Minis, eski zot in fer en sondaz pou vwar ki mannyer biznes pandan petet sa dernyen 1an, 2an fas a difikilte *COVID*, ki mannyer bann biznes in sirviv? E kwa ki zot i fer pou zot kapab ariv ziske la ozordi, petet sa i ava ede pou nou kapab konnen ki mannyer pou fer bann pti mwayenn antrepriz vin pli rezilyan dan le fitir, avek en petet en lot sok ki kapab arive

en pandemik ouswa en lezot keksoz? Mersi Mr Speaker.

**MR SPEAKER**

Mersi Onorab. Minis repons silvouple.

**MINISTER DEVIKA VIDOT**

Mersi Mr Speaker. Mersi Onorab pou ou kestyon. Zisteman i annan - an sa ki konsern logmantasyon dan kou fer biznes, byensir sa i en keksoz ki konsern non, selman biznes, i konsern tou dimoun i vremen konsern Gouvernman osi. Akoz sa i pou afekte biznes, i pou afekte konsonmater endividi, sitwayen, pep Seselwa annantye.

An sa ki konsern biznes i annan bann fasilite - i annan bann *small fund* fasilite ki *DBS* i zere, nou apel sa bann *Small Business Support Scheme* ki ganny dedye pou soulaz bann biznes pou zot kapab ganny en pe likidite pou zot kapab kontinyen avek. So sa i *available* pou zot.

An sa ki konsern sondaz ; depi lannen pase *ESA* in komans en sondaz zisteman pou vwar ki bann biznes ki difikilte zot pe fer fas avek e sa i en travay ki *ongoing*. So far si mon pa tronpe nou'n ariv anviron 3mil ekek biznes e nou ankor pe kolekte.

Me selman sa ki sagrinan se ki sak louvraz ti kapab fer

bokou pli fasil si a sa pwen ki nou ti'n ganny sa fon pou ou kapab fer sa *management information system*, nou ti'n met li an mars *then* ozordi keksoz ti pou bouz pli vitman.

Me la ki nou war se bann endividi, bann *staff* kote sa pe bezwen *manually* fer sa louvraz lo teren lev telefonn akoz lenformasyon zisteman i pa dan en landrwa santralize. Mersi Mr Speaker.

### **MR SPEAKER**

Mersi Minis. Onorab William.

### **HON WAVEN WILLIAM**

Mersi Mr Speaker. Minis eski ou kapab eksplik sa Lasanble par lefe ki lespas i en problem, mon anvi konnen si bann dimoun ki Gouvernman i vann ouswa lwe later avek en pri ki ganny *subsidize*. Eski zot ganny ankouraze ouswa i dan zot lagreman Gouvernman i a kapab osi met serten *clause* kot si zot pou lwe lespas par lefe ki Gouvernman in fer li afordab pou zot, ki bann pti biznes osi ki pe lwe lespas i ava ganny sa sans osi pou zot kapab lwe sa bann lespas lo en pri afordab?

Akoz mon vwar li poudir i pa zis si Gouvernman li i le *subsidize* bann ki pe ganny en bout later pou fer *building*, ouswa ganny asiste avek konsesyon ki zot pa kapab fer

sa osi pou bann lezot ki anvi ganny lespas. Mersi.

### **MR SPEAKER**

Mersi Onorab. Minis repons.

### **MINISTER DEVIKA VIDOT**

Mersi Mr Speaker. Mersi Onorab pou ou kestyon. Onorab dan lagreman, dan Polisi an se moman sa provizyon pou ki en dimoun ki'n ganny alokasyon later pou i devlop son proze, i annan sa konponan kot i bezwen enkorpor fasilite pou kapab lwe avek bann lezot biznes.

E akoz nou'n met sa ladan, se byensir nou annan bann pli pti biznes antet, bann ki napa sa finansman pou zot kapab konstrir zot prop batiman. Me selman nou napa en *clause* spesifik ki pou dir avek sa bann *owners*, savedir sa bann dimoun ki'n annan sa bann *building*, pou zot *subsidize rent* ki zot pou lwe, ouswa lwe li a en kou pli bon marse.

Sa i akoz nou bezwen osi pran konsiderasyon poudir sa i en lagreman prive, ki pou pase ant sa dimoun ki annan sa *building* avek sa dimoun ki pou vin lwe sa lespas. Me parkont nou konnen poudir letan i annan *availability* - savedir letan i annan bokou lespas, bokou opsyon, i ava fer ki pri pou vin pli konpetitiv.

Se avek sa nide ki letan Gouvernman i donn sa bann later e i pouse poudir sa bann dimoun i devlop zot bann *building*, ki si ou mazine dan lepase i annan bokou later ki'n ganny donner, me selman batiman pa ganny konstrir - i pas bokou lannen batiman pa ganny konstrir, nou pe fer sa kontrerman, nou pe pouse deryer sa bann dimoun pou fer sir zot konplent zot batiman pandan sa dele letan ki zot in ganny donner, zisteman pou ogmant lakantite lespas ki annan *available* pou bann biznes.

Ki sa i ava en fason ki pou kapab fer bese bann pri. Zisteman akoz i ava annan bokou opsyon e alor en dimoun pa pou bezwen pe sarz sa biznes a en pri egzorbitan pou li kapab lwe en lespas. Mersi.

### **MR SPEAKER**

Mersi Minis. Onorab Monthy, kestyon.

### **HON PHILIP MONTHY**

Mersi Mr Speaker. Bonzour Minis. Bonzour *CEO* Appoo. Minis ler sa Gouvernman *LDS* ti vin o pouvwar, to lesanz, Dolar ti R22, la \$1 i R14 ekek, ki kantite ede selon ou, sa in ede pou soulaz e kit plizyer biznes an loperasyon?

Dezyenm kestyon, eski petet *CEO* i a kapab fer sa, zis

dir nou ki bann diferan mwayen finansman aktyelman i annan la pou bann pti antrepriz ganny akse avek? Mersi.

### **MR SPEAKER**

Mersi Onorab. Minis repons.

### **MINISTER DEVIKA VIDOT**

Mersi Mr Speaker. Mersi Onorab pou ou 2 kestyon. Mon pou pran ou premye.

Byensir lafason ki Gouvernman in *manage* sa kriz ekonomik ki nou ti pe pas atraver, in fer ki sa to lentere in sorti R22 in ariv R14, dan en kour dele letan, in promet ki en pei parey Sesel ki nou pran lo 70poursan lenportasyon si non pa plis, la mazorite keksoz ki nou servi, ki nou konsonmen i ganny enporte. E sa i fer ki bann biznes osi la mazorite keksoz zot bezwen enporte pou zot kapab *operate*.

E zis par mentenir sa to lentere, i fer li nou'n kapab ed sistenm pou abzorb bann kou savedir lekonomi li menm in kapab respe stab an sa ki konsern to lesanz, ki fer ki nou'n kapab eparnye en lefe pli advers ki si non nou ti pou pas atraver letan nou pe fer fas avek *freight*, pou *freight* ki'n ogmante e tou lezot.

E la nou vwar pri *fuel* ki pe ogmante osi, kou delwil, barik delwil ki pe ogmante, me

si nou to lentere ti pli o ki sa be keksoz ti pou 3, 4 fwa pli pir. Mersi.

### **MR SPEAKER**

Mersi. *CEO* pou azout en keksoz?

### **CEO ESA ANGELIC APPOO**

Mersi Mr Speaker. Mon lalis finansman ki *available* an se moman pou biznes nou annan *the Small and Medium Enterprise Scheme Loan, SMEs* so li i pou tou bann *small and medium business enterprises* e i *available* dan tou labank enkli *DBS* ek *Credit Union*.

I annan *Private Sector Relief Scheme* ki i si ganny met an plas par *Central Bank*, ki menm *available* san tou labank e *DBS* ek *Credit Union*. I annan *the Small Business Support Fund* ki donn en *loan up to R100mil* pou bann biznes ki'n pas dan difikilte atraver *COVID*. E li i ganny *manage* par *DBS*.

I annan *the Small Business Financing Agency Scheme (SBFA)* e li osi i pe ganny *manage* par *DBS* e i donn en *loan up to R300mil*. I annan *Agriculture Development Fund* ki relye a sekter lagrikiltir li osi i donn en *loan*, i annan *small loans up to 350mil* e osi *the big loan up to 5milyon*. I annan *Fisheries Development Fund* ki li osi i *available* ki pou sekter lapes.

*Blue Investment Fund* en *loan up to \$3million*, pou devlopman sekter Lekonomi Ble. *Blue Grants fund* ki ganny *manage* anba *SeyCCat*, li i annan *small grant up to 100mil*. *Medium grant up to 1milyon* e osi *large grant up to 2milyon*. e i osi annan an partenarya avek en biznes prive en *Sustainable Blue Project Grant R150mil*. I annan osi *Seed Capital Grant* ki nou Minister pe revwar Polisi e pou lanse tre byento.

Nou annan *National Arts and Culture Fund* ki vize ver sekter lar, kiltir e leritaz. Li i donn *up to R175mil* pou *large scale projects* e *small scale projects up to R25mil*, e i annan osi *the Seychelles Energy Efficiency Renewable Energy Programme SEEREP*, li i en *loan* ki *available* dan bann labank ou *household* e osi *small and medium enterprises* pou zot met bann pratik soutenab avek zot biznes. Mersi.

### **MR SPEAKER**

Mersi *CEO*. Mon annan plizyer manm ki'n lev lanmen. Mon pa konn lord, mon a pran Onorab Loizeau.

### **HON NORBERT LOIZEAU**

Mersi Mr Speaker. Mon ti krwar ou pa pou rekonnèt mwan. Bonzour Mr Speaker bonzour Minis.

Minis mon kestyon i koumsa, vi ki enn bann difikilte ki mwan mon pe rekonnèt bann pti e mwayen biznes pe rankontre, se alokasyon en morso later pou zot kapab *run* zot biznes lo la.

Vi ki dan lepase in annan bokou dimoun ki pa ni mwayen ou pti lantrepriz in ganny morso later, me i pa'n devlope me ki zot in kale tranpe pou zot vann e fer milyon parey ti arive Ile Eve.

Alors Minis mon ti anvi demann ou konbyen sa bann morso later ki depi ler ou'n vin Minis zot in detekte ki pa ankò devlope? E ki zot pe fer pou zot kapab rebran sa bann later, pou nou kapab donn bann pti e mwayen biznes kot Mr Elgar Leon dan mon distrik, David, Paul Larue e lezot a ganny en pti morso pou zot kapab devlope e fer zot biznes? Mersi.

### **MR SPEAKER**

Mersi Onorab. Minis repons.

### **MINISTER DEVIKA VIDOT**

Mersi Mr Speaker. Mersi Onorab pou ou kestyon. Onorab mon napa statistik avek mwan, mon pa'n vin avek lo lakantite. Me selman sa ki mon kapab reasir ou, poudir sa bann later ki pa'n ganny devlope le neseler in ganny fer pou kontakte sa bann dimoun pou enform zot ki zot in *breach*

zot provizyon sa kontra, sa lagreman ki zot in ganny donn.

E la atraver *advice* ki *Attorney Zeneral* in donn nou, nou pe travay avek sa bann dimoun pou regarde si i annan en posibilite pou zot devlope. E la zot in ganny donn bann kondisyon vremen strik anba ki zi zot agree pou zot devlop zot later. Si zot pa kapab le neseler i ganny fer pou zot rann, pou Gouvernman rebran sa bann later.

E alor pou le moman mon konnen i annan detruwa ki nou'n fini fer sa proses, e i annan ankò ki zot in ganny en dele letan pou zot regarde ki mannyer zot pou debourye, byensir anba sa bann kondisyon ki nou'n met devan zot. Mersi.

### **MR SPEAKER**

Mersi. Mon a pran kestyon Onorab Aglae.

### **HON EGBERT AGLAE**

Mersi Mr Speaker. Bonzour Minis avek *CEO*. Minis enn bann faktor enportan ki biznes pe resanti ozordi se ki akse fasilite ek kredi. E ler biznes i tonbe Minis zot anvi releve e zot napa- I annan bokou bann pti lantrepriz ki napa neselerman en bout *credit rating* baze lo lefe ki zot annan bann aryeraz.

So baze lo sa Minis ki Gouvernman pe mazin fer pou kapab soulaz en pe sa bann pti lantrepriz pou zot ganny fasilite kredi, malgre zot annan sa bann defi aryeraz? Akoz zot bezwen ganny kredi pou zot kapab releve. So ki zot p mazin fer sirtou avek Minister Finans?

Dezyenmman Minis, eski baze lo sa premye kestyon ki mon'n demann ou Minis, eski zot pe konsider osi ki bann biznes ki dan difikilte parey o komansman COVID ladministrasyon avan ti sey fer pou donn bann serten *incentives* ;- par egzanp pli bon lenterere en *grace period* osi ouswa e menm petet *marketing support* pou sa bann biznes kapab reste a la flot, e la ki lekonomi pe fer byen e pou zot re perse parey zot sipoze ete? Mersi.

### **MR SPEAKER**

Mersi Onorab. Minis.

### **MINISTER DEVIKA VIDOT**

Mersi Mr Speaker. Mersi Onorab pou ou bann kestyon. Annefe bann biznes pe vwar zot dan bezwen pou zot ganny en fasilite likidite parey nou dir, pou zot ganny en pe larzan pou zot kapab kontinyen soutenir zot biznes, i annan sa *Small Business Support Fund* ki *available*. E zot kapab ganny sa atraver *DBS*.

Bon, i annan en keksoz selman ki nou bezwen met antet touzour, parfwa i pa neseserman, i pa toutafe korek pou nou ranpli en trou *ok*, i annan en tou ki vid, nou ranpli sa trou, me selman nou anfans en lot trou - nou fouy en lot trou eskize.

Sa i en konsep ki dan biznes nou apel li i en pe danzere si mon kapab eksplik koumsa. E akoz ou pe paraliz ou *cash flow* plis. Parske ou'n deza annan en det, ou annan aryeraz, me selman ou pe ale ou pe rebran en lot det pou servi sa aryeraz.

E sa i kapab fer ki si i pas ankor en lot pti problem ou annan en difikilte pou ou repeye i pou met ou dan en problem ki fwa pli gro ki ou ti komans avek. Ou vwar? Sa ki enportan pour regarde e alor se pour se rezon ki bann labank zot asize zot analiz byen letan bann laplikasyon i ganny fer.

Ou konnen dan bokou fwa sa bann biznes zot pa ed zot lekor zot osi an sa ki konsern - parske sa i bann konservasyon ki mon fer avek bann labank. Mon fer sa bann konversasyon avek sa bann biznes e mon fer konversasyon avek labank. E dan bokou lenstans ou vwar poudir sa bann biznes zot pa neseserman pe fer *banking appropriately*, savedir zot pa



pe met zot larzan labank, zot pe fer bokou cash *transactions* e zot pa pe fer *banking*.

Be devan en labank ou bezwen pe fer serten *deposit* pou ou kapab fer ogmante ou *credit rating*, pou ou kapab ganny en fasilite kredi avek labank. E alor si zot pa pe demontre abilite pou zot en abilite pou vin demontre ki manner, ki lasante zot biznes i ete devan labank i difisil pou sa labank kapab donn zot ankor en led.

Be parkont dan bokou ka, e la parey mon pou kapab fer legzanp avek *DBS - DBS* mwan mon'n vwar ka ki'n vin devan mwan kot i annan *loan* ki zot in donner, zot in restriktir sa *loan* zisteman pou ed bann biznes pou kapab, e zot in donn fasilite an plis pou ed sa dimoun kapab kontinyen.

Alor i egziste. I annan fason ki kapab ganny fer e i zis senpleman fodre sa biznes i ale i al fer konversasyon avek son labank, me de lot kote osi i annan sa laspe ledikayon. Bon sa i en laspe ki Minister pe travay fortman lo la.

I evidan atraver bann sondaz ki nou'n fer ki i annan en mank ledikasyon lo lafason ki biznes i merit zer zot larzan, dan bokou lenstans. E osi in ganny fer resorti par bann

lorganizasyon enternasyonal ki vin fer bann travay isi Sesel.

Sa in ganny fer resorti e alor zot in pare dapre dernyen konversasyon ki mon fer avek en Lazans konsernen, nou pare pou travay lo program, lo en program pou nou kapab fer ledikasyon pou konpliment sa ki Labank Santral i fer.

E sa osi lo nou kote o sito ki nou annan en pe finansman, i annan serten kour *financial education* ki nou fer avek bann biznes, pou nou kapab donn zot plis bagaz lo ki manner pou fer zot biznes.

An sa ki konsern *marketing*, sa i en fason nou'n vwar en fason ideal pou nou kapab ed bann biznes. Nou pe travay avek detrwa *media houses*, savedir detrwa parey Nasyon, *Today* pou nou regarde ki manner nou kapab servi sa bann platform atraver Minister – e fer *marketing* pou sa bann biznes.

An menm tan sa papye Nasyon- sa gazet, i ava annan en zistwar pou li fer pase dan son papye dan son edisyon. E li sa dimoun sa biznes i ava ganny sa loportinite pou li ganny *marketing*.

Alors nou bezwen rod lezot fason ki pa afekte nou Bidze direktman me ki nou kapab siport sa bann dimoun avek *marketing*. Konsep *marketing* osi i en keksoz ki

nou'n vwar poudir biznes i pa vwar son lenportans.

E ankor la i annan serten proze dan labaz kominoter ki nou anvizaze fer ;- savedir par rezyon, si i posib si nou kapab ganny finansman pou nou arive fer sa, kot nou pou sansibiliz bann pti biznes lo ki bann lenportans ki *marketing* i anmennen pou en biznes. Mersi.

**MR SPEAKER**

Mersi Minis. Mon a prezan pas lo kestyon siplemanter *Leader* Lopozisyon. *Sorry* mon napa pli letan pou sa kestyon. *Leader* Lopozisyon ou siplemanter.

**HON SEBASTIEN PILLAY**

Mersi Mr Speaker. Zis avan mon demann mon kestyon, nou annan en konsern lezitim lo nou kote, ki mon pa konnen ki mannyer ou'n pran non, me ou'n pas plis lot kote laba avan ki ou vin isi.

**MR SPEAKER**

Mersi.

**HON SEBASTIEN PILLAY**

Sa i en konsern lezitim ki nou annan so ...

**MR SPEAKER**

Onorab! Onorab Pillay ou siplemanter silvouple.

**HON SEBASTIEN PILLAY**

So eski ou pou soutni ki la nou 9er 54 ki mon *proceed* ek mon kestyon?

**MR SPEAKER**

Ou siplemanter, wi.

**HON SEBASTIEN PILLAY**

Byen ou a realize poudir nou pe donn ou tou *leeway* posib avan ki nou pran okenn aksyon lo la en?

**MR SPEAKER**

Silvouple ou siplemanter.

**HON SEBASTIEN PILLAY**

Mon remerci Minis pou bann larepons ki ou'n donn nou. Mon ti ava annan serten presizyon ki mon ti a kontan demann ou an relasyon ek bann larepons ki nou'n gannyen. Premyerman Minis eski ou *stand* par *by* sa sif 1086 *license* ki'n ganny kennsel.

Akoz ou Minis pou Lenvestisman e lo mon leksperyans pou mwan mon konn i annan diferan lorganizasyon ki ganny servi, par egzanp *hire of commercial vehicles*, lenformasyon ki mwan mon'n gannyen i annan en kantite ki'n arete - en kantite *license* ki'n ganny kennsel. So eski ou *stand by* sa sif 1086, e ki sa sif 1086 i reprezante vizavi bann biznes ki'n arete? Sa i mon premye kestyon.

Mon dezyenm kestyon an relasyon ek bann difikilte prensipal sa bann biznes pe fer fas avek. Pou bann biznessmenn ki pe ekout nou e mon pa konnen ki zot pe ekout nou, nou'n pas bokou letan pandan son semenn avan pou lager pou bann dimoun ki bezwen lasistans oubyen ki vilnerab, e nou pe monte osi ki nou bezwen lager pou bann dimoun ki pe aktivman debout fer zot biznes e kre larises.

So eski Minis ou kapab dir nou, ki statistik zot annan lo lakantite *loan* ki bann biznes i annan, pa zis avek Labank Devlopman, me avek bann Labank Komersyal? So eski ou Minister pe aktivman regard dan sa bann statistik avek en bi pou kapab anmenn en fason pli konkret pou siport bann biznes an relasyon avek *manage* oubyen avek ganny akse avek kredi atraver sistenm Labank Komersyal?

Trwazyenmman, prenon kont ki ou'n aksepte ki bann biznes in pas atraver plizyer difikilte, e ki ou pe koz lo bann mezir ki ou pe met an plas ki mon'n tann ozordi.

Eski ou pe dir ek nou ki Gouvernman ou menm ou, zot napa lentansyon pou zwenn avek kominote biznes e pou revwar en lot fason regard ki mannyer zot kapab *provide* swa en *stimulus package* swa bann *tax rates*; par egzanp lo

bann *machinery* lo bann keksoz ki bann biznes pa fer vini, prenon kont difikilte ki bann biznes i fer fas avek pou ki zot a kapab rebran e anploy dimoun, kre larises e kontribye dan lekonomi? Mersi Mr Speaker.

### **MR SPEAKER**

Mersi Onorab. Minis ou repons.

### **MINISTER DEVIKA VIDOT**

Mersi Mr Speaker. Mersi Onorab pou ou bann kestyon. Onorab statistik ki mon'n gannyen i vedir ki i paret mwan ou ti annan statistik ou osi, selman ou'n demann kestyon, *anyway*.

Mon konfirmasyon se ki lenformasyon ki mon'n resevwar avek *Licensing Authority* biro *Licensing Authority* sa i sonm ki zot in donn mwan. *This is the statistic* ki mon'n gannyen avek biro *Licensing Authority*.

Limero 2, ou kestyon limero 2, an sa ki konsern ganny akse avek kredi e statistik ki nou garde. Byensir sa i en keksoz ki *ESA* i fer i dan son manda, i dan bann lobzektif prensipal ki i fer i gard bann statistik.

Akoz ou kestyon ozordi i pa'n adres statistik lo *loan*. Mon napa sa statistik pou mon partaz avek ou ozordi me selman sa i en legzersis ki *ESA*

i fer e nou partaz dan *Management meeting*, sa i en keksoz ki nou regarde kouraman.

Limero 3, eski Gouvernman napa lentansyon pou diskite avek sekter prive. Non, mon pa'n zanmen dir sa, pa ditou korek nou definitivman is i annan pou fer konsiltasyon avek sekter prive nou pou bezwen fer konsiltasyon avek sekter prive. E mon krwar mon'n ase fortman eksprimen ki kantite ki Gouvernman espesyalman mon Minister nou travay an partenarya avek sekter prive.

E tou resaman atraver travay ki *UNDP* pe fer avek Gouvernman, mon'n ankor fer resorti partenarya ki Gouvernman i pe mete e lanfaz ki nou pe mete lo korperasyon, kolaborasyon sekter prive. Parske nou konnen poudir Polisi ki nou, nou vin avek i enpakte zot, e alor i enportan ki zot osi zot form parti konversasyon. Alor kan i ariv ler si nou bezwen fer konsiltasyon sertenman Onorab nou pou fer konsiltsyon avek sekter prive. Mersi.

### **MR SPEAKER**

Mersi. Nou a termin sesyon kestyon la. Nou pe termin sesyon kestyon Onorab. Ou annan en kestyon ki pa'n

ganny reponn, poz li vitman silvouple.

### **HON SEBASTIEN PILLAY**

Mon pa ganny en konpran akoz ou pe pran sa latitud ki i nou annan en kestyon, les nou demann nou kestyon.

### **MR SPEAKER**

Mersi Onorab. Poz ou kestyon silvouple poz ou kestyon.

### **HON SEBASTIEN PILLAY**

Pou mal fini sa, mon pe dir ou mwan en? Mon'n demann ou en kestyon lo taks *break, ok*.

### **MR SPEAKER**

Onorab, ale.

### **HON SEBASTIEN PILLAY**

Mon'n demann ou en kestyon lo *whether or not* an relasyon ek bann biznes *machinery and equipment*, si zot annan lentansyon pou vwar ki mannyer zot kapab e bann biznes pandan peryod ki nou biznes pe rankontre difikilte?

Akoz bann biznes pe ekout ou, i annan mon asire pe anvoy mesaz pou tou dimoun e zot pe anvoy mwan mesaz e zot pa antyerman satisfè ek bann larepons ki ou pe donner. Sa ki mwan mon pe donner se fer sa ki dan mon pouvwar *press* ou pou aksyon. *Ok?*

Mon pa la pou mon vin anbaras ou, mon la pou *press* ou pou aksyon. E rezon aköz mon'n demann ou sistenm statistik ou pa rode si mwan mon annan statistik, sa ki mon oule se ki ler ou vin Lasanble ou fer sir ou donn nou lenformasyon ki korek, pou nou kapab ed bann dimoun la deor ki'n demann nou pou anmenn sa bann kestyon lo zot *behalf*.

So mon pa oule ki ou pran li mal ki mon pe demann ou kestyon kan mon annan statistik. So mon ti a kontan fer sir sa i kler *dek from the outset*, so eski zot pe regard dan sa eleman. Aköz ou pa zis Minis pou Pti Biznes e mon krwar sa konsep i en keksoz danzere me ou Minis pou Lenvestisman.

So, *regarding* lenvestisman ki en dimoun in fer an relasyon avek *machinery equipment* eksetera eski zot pe koz avek sa bann dimoun, ou'n dir lenportasyon son *cost*, ki zot pe fer dan sa konteks pou zot kapab annan en dyalog e vwar ki mannyer zot kapab siport sa bann biznes ki annan sa kalite aktivite? Mersi Mr Speaker.

### **MR SPEAKER**

Minis ou a donn en repons silvouple.

### **MINISTER DEVIKA VIDOT**

Mersi Mr Speaker. Onorab mon pa anvi fer deklarasyon ki apre mon pou ganny akize konmkwa mon'n *mislead the House*.

Si i annan Polisi ki nou pe travay lo la, i pa ankor ariv pwen pou mon kapab partaz avek zot, mon pa pou kapab partaz detay avek zot. Alor permet mwan sa letan pou mon kapab fer travay entern dabor, apre la pou mon kapab partaz lenformasyon. Mersi.

### **MR SPEAKER**

Mersi Minis. Nou a remersye Minis avek *CEO* pou zot partisipasyon e nou a swet zot bonn zournen. Nou a pran en poz pou *sanitize* silvouple.

*(technical break)*

### **MR SPEAKER**

Bonzour Minis Jean-François Ferrari, *Designated Minister* e osi Minis pour Lapes ek Lekonomi Ble. E avek Minis nou annan Mr Nichol Elizabeth, *CEO Seychelles Fisheries Authority*. Byenveni pou zot partisipasyon dan kestyon.

Mon oule bann manm i note mon annan 8 kestyon pou sa Minis, nou annan apepre 15minit par kestyon. Eskiz mwan mon pa kapab fer letan si letan pa *available*. Nou pou pran la kantite kestyon ki nou kapab mete

dan sa letan. Premye nou a komans avek kestyon limero 59 Onorab Gervais Henrie.

**HON GERVAIS HENRIE**

Mersi Mr Speaker. Bonzour tou dimoun. Kestyon 59 i lir koumsa;

Swivan piblikasyon en rapor odit lo sezon oumar pour lannen 2015 a 2016, e 2016 a 2017, ki ti dir ki 40poursan bann femel oumar ki ti ganny atrape ti pli pti ki regilasyon i oblize, me ki kantmenm san tou peser ki annan permisyon lapas oumar ti ganny rann zot R5000 depozit an antye, eski Minis pour Lapas i kapab dir nou Lasanble, ki travay son Minister pe fer avek bann peser oumar, pou asire ki zot konn byen regilasyon sa sekter e ki zot annan sa konesans pou asir soustenabilite sa lespes? Mersi.

**MR SPEAKER**

Mersi. Minis ou repons.

**THE DESIGNATED  
MINISTER MR JEAN-  
FRANCOIS FERRARI**

Mersi Mr Speaker e bonzour tou dimoun. Mr Speaker SFA pe kontinyen travay tre pros ek bann peser oumar, pou protez sa lespes ki annan bokou valer pou nou pei.

Nou pe osi travay avek zot pou fer ki zot pa fer bann

pratik ki pou fer zot perdi zot *deposit*. Sa ki Onorab i apel zot *bond*. Depi ler sa *bonding system* in ganny met an plas zis 2 peser oumar ki'n perdi zot *bond*.

Avan sezon i ouver sa lannen SFA pou angaz bann *license holders* lo Mahe, Praslin ek La Digue, pou fer en diskisyon ouver lo sityasyon oumar dan Sesel. Bann *scientific findings* e ki mannyer nou anvi war sa lapas devlope dan lavenir. E si posib nou anvi reget model ki mannyer nou pou regle sa sityasyon lapas ilegal osi ki annan en gran lenpak lo stok.

Mr Speaker mon Minister ek SFA i souvan ganny rapor ki bann regilasyon konsernan oumar pa ganny respekte. Mon asire ki i annan serten laverite ladan, me nou, nou fer nou bout pou ranforsi bann mezir kontrol. Nou lobzektif prensipal se pa pou met sanksyon lo peser, me pou konvenk zot pou pratik en bon lapas. En lapas ki soutenab kot zot pou kapab ganny zot lavi pou plizyer lannen ankor.

Alors bann rankont regilye avek bann peser oumar, i enn s mwayen ki nou pratike pou nou ede dan proteksyon sa resours. Mersi Onorab.

**MR SPEAKER**

Mersi. Onorab ou siplemanter. Annou gard bann siplemanter kourt silvouple.

**HON GERVAIS HENRIE**

Mersi Mr Speaker. Mersi pou larepons Minis. De kestyon - an vi konsern bann peser oumar ki dan lefase in dir ki Desanm/Zanvye lanmer in move, lapli en kantite e zot ti ava kontan vwar sa ki sa sezon i sanze pou vin Fevriye/Mars/Avril kot lanmer i pli kalm. Eski sa i en propozisyon ki SFA pe konsider favorableman?

E dezyenmman eski an vi sanzman klima i en konsern pou Sesel, e ki osi enpakte lo biznes lapes, eski zot in fer okenn letid par egzanp pou vwar si i pe annan en lenpak sanzman klima lo sa lespes - par egzanp pou anpese ki zot grosi osi vit ouswa landrwa kot zot reste eski i pe annan en regar dan sa *area* ? Mersi.

**MR SPEAKER**

Mersi Onorab. Minis.

**THE DESIGNATED  
MINISTER MR JEAN-  
FRANCOIS FERRARI**

Mersi Onorab. Onorab mon ava demann CEO SFA pou entervenir a sa pwen, aköz se SFA ki *manage* sa lapes. Mersi.

**MR SPEAKER**

Mersi. CEO.

**CEO NICHOL ELIZABETH**

Mersi Onorab. Mersi Minis. Wi i annan sa diskisyon ki'n deza komanse depi sezon pase. Mon krwar 2 sezon la nou vwar poudir Desanm letan i ankor move be SFA napa problem ek sa pou bouz sezon Zanvye ou Fevriye pou Mars/Avril, nou napa problem ek sa.

Sezon pase nou ti koup en mwan, olye fer 3 mwan nou ti fer 2 mwan e, me selman nou ti vwar poudir zefor lapes ti la, la kantite ki zot ti tyonbo ti preski menm parey. Savedir nou kapab gete, nou kapab travay lo la e aranze sa napa problem. Mon krwar peser pou konpran. *Thank you.*

**MR SPEAKER**

Mersi CEO.

**THE DESIGNATED  
MINISTER MR JEAN-  
FRANCOIS FERRARI**

Lo kestyon Onorab, lo kestyon bann lefe sanzman klima, tou bann lespes ki nou annan dan delo Sesel i sibir lefe sanzman klima. Napa en letid spesifik ki'n ganny fer koumsa apard kolekte tou bann *data* tou le lannen, pou nou gete ki kantite ki groser ki rezyon e ki bann lezot lendikasyon ki nou gannyen konmkwa stok pe ganny enpakte.

Definitivman mon a dir ou ki enn bann rezon pli enportan ki enpakte stok, se pa neserman sanzman klima se ki i annan en pli gran demann, se ki zefor lapas i ogmante.

Alors e pour sa rezon ki nou ensiste ki sa lapas parey serten lezot lapas i ganny en *proper management plan* parey nou pou fer, e a sak fwa ki nou bezwen aziste, sanze nou met dan nou plan, nou ava diskit avek bann peser. Akoz mon krwar ki sirtou bann peser oumar zot enn sa group ki vreman konpran kwa ki nou pe sey fer e dan zot mazorite zot kolabore avek SFA. Mersi.

### **MR SPEAKER**

Mersi. Onorab Samynadin ou kestyon.

### **HON KELLY SAMYNADIN**

Mersi Mr Speaker. Bonzour Minis avek ou delegasyon, tou manm Onorab e tou dimoun a lekout. Minis mon ti a kontan konnen parmi sa 4 lespes oumar ki nou annan? Lekel parmi zot ki anba plis presyon eksplwatasyon ?

E dezyenmman mon ti a kontan konnen ki valer an term ki kantite larzan ki sa lendistri pe anmennen dan sekter lapas Sesel? Mersi.

### **MR SPEAKER**

Mersi. Minis, CEO ki a reponn.

### **CEO NICHOL ELIZABETH**

Mersi Onorab. Mersi, nou napa sa detay lo la, nou pa ti konnen nou pe vin ganny met sa kestyon koumsa. Me selman nou kapab fer *available* sa *data* pou zot dan sa 4 lespes lekel ki nou pe tyonbo plis, lekel ki nou pe *commercialise* plis lo kote Sesel.

Me selman i annan en keksoz ki nou kapab dir Onorab e ki SFA pe *fight*. Mon krwar nou bezwen popilasyon osi pou ed nou lo la se a *illegal side of the fishing* ou konpran? I annan en bon pe ki SFA pe regle lo bann resi, bann aste e nou, nou pe *track* sa bann *receipts*.

Me i en bon pe lapas osi ki pe pase ki pa pe pas dan sa *channel* e se sa nou *focus* se sa nou konsern, se sa nou, se sa ki nou anvi enplimant en *co-management plan sooner than later*. Mersi.

### **MR SPEAKER**

*Thank you*. Onorab Bastienne.

### **HON DESHEILA BASTIENNE**

Mersi Mr Speaker. Bonzour Mr Speaker. Bonzour Minis. Bonzour CEO e bonzour tou Manm Onorab.

Mr Speaker parmi sa bann kondisyon ki SFA ti mete lo bann peser oumar, tel ki pa



lapes dan rezyon proteze, annan en maksimonm 4 plonzer e annan 6 latrap. Eski Minis i satisfè ki tou sa bann kondisyon pe ganny byen obzerve? Mersi.

**MR SPEAKER**

Mersi. Minis.

**THE DESIGNATED  
MINISTER MR JEAN-  
FRANCOIS FERRARI**

Onorab mersi pou ou kestyon. Mwan parey mon'n dir pli boner mon pa 100poursan satisfè. I annan bann rapor ki nou gannye e in annan omwen parey mon'n dir 2 ki kot bann peser oumar in perdi zot depozit akoz pa respekte regilasyon.

Me selman zeneral mon santi poudir i annan en bon korperasyon. E mon ti a kontan ensiste lo sa ki *CEO* in dir nou annan en sistenm *co-management*. Kot *SFA* nou pa *believe*, nou pa krwar ki nou bezwen pran en latitud dominer e se nou se Lotorite ki poudir ki pou fer.

Lotorite i diskit avek bann peser, akoz se zot lapès se zot ki benefisyè e si lapès i ganny proteze se zot ki pou ganny sa posibilite pou zot ganny zot lavi pli lontan. Donk *co-management* i vremen enportan e atraver sa nou santi nou pe ganny

kolaborasyon bann peser. Mersi.

**MR SPEAKER**

Mersi. Onorab Esparon.

**HON REGINA ESPARON**

Mersi Mr Speaker. Bonzour tou dimoun. Mr Speaker Minis in dir pour i annan zis 2 dimoun ki'n perdi zot *license* lannen pase.

Mon ti ava kontan demann Minis eski zot annan kota lo ki kantite *license* zot donnen? E si wi konbyen i sa kota i ete? E eski zot annan lentansyon reviz sa kota avek bi pou diminyen kantite dimoun ki pe fer *poaching ilegal* e redwir *over exploitation*? Mersi.

**MR SPEAKER**

Mersi Onorab. Minis. *CEO*. Wi.

**CEO NICHOL ELIZABETH**

Mersi Onorab. Wi nou annan en kota lo *license*. Nou annan 16 *license* an tou. Pandan sa dernyen 3an nou pa'n sanze sa 16 *license*, *first come first serve*, nou pa fer *favoritizm* lo la.

Ler nou deside ouver sezon *first come first serve*, i annan 4 pou Praslin La Digue e *most of the time* lo kote La Digue Onorab, nou pa ganny en peser ki vin devan nou bezwen redistribye sa dernyen *license*. So nou annan 16 kota

*license* dan Sesel tou le sezon pou 3 mwan.

**MR SPEAKER**

Lo pwen i ou pou reviz kota a lavenir?

**CEO NICHOL ELIZABETH**

Desizyon ki nou pou pran lo kote la kantite *license* i pou depan lo *the stock level assessment* ki nou'n fer. E lannen pase ler nou ti pe get, sanmenm sa nou ti decide redwir la kantite *license*, nou ti decide redwir par en mwan lapes.

E nou bezwen serye en pti git la Onorab, akoz nou panse osi i annan son *economic value*. Sa bann peser i bezwen viv e pli nou redwir, pli nou redwir *at the end of the day* nou pou *hit the wall*. Mon krwar nou'n travay plis lo stok nou get *fishing efforts*, nou get lo groser sa bann lespes e nou pran desizyon lo la. Dernyen keksoz ki nou pou touse se la kantite *license*. Mersi.

**MR SPEAKER**

Mersi. Onorab Pillay ou kestyon.

**HON SEBASTIEN PILLAY**

Mersi Mr Speaker. An Mars 2020 ti annan 4500 kilogranm sa ki nou apel *prawn horns* parmi *lobster* la, sa enn ki zot dir oumar gro latet ki ganny tyonbo plis Sesel e sa enn ki

*species* pli *commercially viable*.

Prezan ou annan sa size *unlicensed fisherman*, so ou pe dir mwan poudir ou pe kontrol bann dimoun ki *license*, so ou fer li baze lo kan ou ouver sezon, be *what about* bann *unlicensed fisherman*? Konbyen dimoun i zot in tyonbo ki pe fer *unlicensed fishing* pou oumar?

Akoz la mazorite ka dimoun i fer li aswar. So konbyen dimoun ki ou'n tyonbo si ou pe dir mwan nou pe koz *management of* sa stok oumar? Mersi Mr Speaker.

**MR SPEAKER**

Mersi CEO. Oubyen Minis, wi Minis.

**THE DESIGNATED MINISTER MR JEAN-FRANCOIS FERRARI**

Mersi pou ou kestyon Onorab. Mon napa sa *figure* avek mwan, si ou ti a kontan gannyen nou ava donn ou koman nou fini sa sesyon la ozordi. Mersi.

**MR SPEAKER**

Mersi. Nou a pas lo kestyon swivan ki pou Onorab Andy Labonte ki'n donn son leskiz mon krwar e en lot manm pou demann kestyon dan son plas. Onorab Henrie.

**HON GERVAIS HENRIE**

Wi. Mersi Mr Speaker. In demann mwan koman en zabitan Larivyer Anglez mon *MNA* in demann mwan pou demann son kestyon. Kestyon 60 i li koumsa ;

Minis eski sa proze bazar pour distrik Larivyer Anglez pou ganny realize sa lannen, la ki bann peser dan distrik in fini met zot demann devan ou Minister?

Si non, eski ou kapab donn sa Lasanble en lendikasyon kan sa bazar pou ganny konstri? Mersi.

### **MR SPEAKER**

Mersi. Minis, ou repons.

### **THE DESIGNATED MINISTER MR JEAN- FRANCOIS FERRARI**

Mersi Onorab. Onorab dernyen miting konsiltativ ki nou ti fer dan distrik Larivyer Anglez ti ganny fer an Fevriye sa lannen. An prenon konsiderasyon bann diskisyon e propozisyon e osi bann faktor finansyel e fezabilite, *SFA* in vin avek 2 diferan konsep, e sa i konpri premye se en proze *long term* e permanan.

Sa i konpri *dredging* sa kannal, *reclamation*, *rock armouring*, enstalasyon bann *pontoon*, nouvo bazar, *store* pou lekipman lapes eksetera, *parking*, semen ek *layby*. Sa i

en proze konplet, konpreansiv ki tous tou son laspe.

Dezyenm konsep se en konsep a mwayen term, e sa i konpran fouye dan lapas konblaz, *store* pou lekipman lapes tanporer, bazar en pe parey sa enn ki n ou'n fer *Persévérance*, *layby*.

Vi ki mendev e Bidze i limite, *SFA* in deside pou li konsider sa dezyenm opsyon. *SFA* pou kontinyen selman sa konsiltasyon ek lasosyasyon peser e lezot parti konsernen, akoz nou bezwen rod laprouvasyon tou dimoun e tou bann Lazans Konsernen tel ki *Planning Authority*, *SLTA*, Lanvironnman eksetera.

Proze i kapab komanse pli tar ver lafen sa lannen oubyen boner lannen prosenn. Nou konnen ki Onorab Labonte i pe met en bon pe presyon depi en pe letan ki bann peser i ganny sa fasilite.

Nou ti etidye e nou ti vwar poudir ti annan en proze ki annan en pti pe plis irzan se sa enn *Persévérance*, alor nou'n *divert* en pe nou bann fon ver sa enn *Persévérance*.

Nou osi selman nou anvi donn distrik Larivyer Anglez sa fasilite, me ou konnen ki tou sa bann proze Onorab i pran letan, mon pou demande alors ki distrik Larivyer Anglez i kontinyen anmenn sa kestyon devan, kontinyen met

sa presyon ansanm avek lasosyasyon pli kontinyen travay pou fer sa rev vin vre.

Alors mon parey pou lezot pti proze dan lezot distrik sorti kot *SFA*, kot Minister Lapes sa enn osi i pe vini. E parey mon'n dir i kapab komanse ver lafen lannen komansman lannen prosenn. Mersi.

**MR SPEAKER**

Mersi. Siplemanter wi.

**HON GERVAIS HENRIE**

Mersi Mr Speaker. An vi ki sa enn dezyenm opsyon, mwayen term ki'n ganny swazir, mon ti a kontan Minis i dir nou apepre Bidze sa prose e son sours finansman premye kestyon.

Dezyenmman lo en pwennvi en pe pli larz, baze lo proksimite Larivyer Anglez avek Viktoria kot i annan en bazar, ki zistifikasyon vreman e Perseverance osi alor ki zistifikasyon ki vreman sa konstriksyon pou ganny fer? Mersi.

**MR SPEAKER**

Mersi. Minis,

**THE DESIGNATED  
MINISTER MR JEAN-  
FRANCOIS FERRARI**

Mr Speaker, *Sorry* eskiz mwan ler mon pe sey ekout sa kestyon, Onorab Pillay depi

bomaten nenk i pe yon-yon-  
yon-yon-yon-yon. E i dan mon  
zorey mon pa ganny en  
konpran - mon bezwen  
ekoute.

*(Interruption)*

**THE DESIGNATED  
MINISTER MR JEAN-  
FRANCOIS FERRARI**

So silvouple ler-

*(Interruption)*

**MR SPEAKER**

Ok mon a demann, Minis mon a demann tou bann manm gard lord e annou ekoute silvouple. Mersi. Onorab Pillay, non, Minis donn ou repons silvouple.

*(Interruption)*

**MR SPEAKER**

Onorab Pillay, Onorab Pillay mon pe, Onorab Pillay mon pe dir ou Minis i annan rezon sa ki in dir mon osi mon'n tann ou mon pa'n enteronp li so Minis donn son repons Onorab Pillay arete! Likel ki pou donn repons *CEO* oubyen Minis, *CEO*.

**CEO NICHOL ELIZABETH**

Mersi Mr Speaker. Mersi Onorab. Sa konsep Larivyer

Anglez nou'n ganny dir par *SLTA* nou pa pou kapab met sa bazar obor semen kot nou ti anvi, savedir nou bezwen pous pli deryer savedir nou pe al dan delo la.

Akoz sa proze *dual lane* ki nou sipoze arive dan prosen lannen, sa i fer nou proze vin en pit pe *expensive*. Parey nou ti'n panse bidzete R2milyon pou sa proze la nou bezwen *reclaim* en pti pe plis nou bezwen desann anba semen. Savedir nou Bidze in monte nou *estimate* ki apepre R3milyon avek panton ansanm avek sa *dredging*. Mersi.

#### **MR SPEAKER**

Mersi. Minis ou annan keksoz pou azoute?

#### **THE DESIGNATED MINISTER MR JEAN- FRANCOIS FERRARI**

Onorab ou ti annan en keston lo proksimite sa detrwa bazar. Efektivman Onorab i toultan dan plan Minister *SFA* gete ki mannyer nou kapab ler nou fer en fasilite dan en distrik ki benefisye osi bann distrik o zalantour.

Nou pa pou kapab fer dan tou distrik en fasilite, aköz napa le mwayen. Me pour Larivyer Anglez vi ki i annan en kominote peser byen etabli, nou dir kantmenm

nou pa fer en gran proze, me selman en fasilite zis pou zot soulaz zot en pe nou ava, nou sanmenm sa enn ki *SFA* in vin avek pou nou a kapab fer dan sa ka. Mersi.

#### **MR SPEAKER**

Mersi. Mon a pran keston Onorab Vidot.

#### **HON AUDREY VIDOT**

Mersi Mr Speaker. Bonzour Minis ek *CEO*. Bonzour tou Mann Onorab e tou dimoun ki a lekout.

*CEO* letan ou'n mansyonn *SLTA* mon rapel letan mon ti *DA English River* dan bann miting piblik konsiltasyon ki ti annan, *SLTA* ti dir poudir zot annan plan pou zot revwar konstriksyon sa semen, petet pou relev li apre ki *SFA* pou kapab fer sa proze bazar apre sa leksplikasyon ki Minis in fer resorti.

Eski *SLTA* pa pe konsidere pou relev sa semen, oubyen zot pou kit li parey ki zis prezan zot pou fer li *aside* parey Minis in dir kot orizinalman ti dir pou konble, pou agrandi, pou kre plis lespas pour ki bann peser i kapab annan plis fasilite lapes? Mersi.

#### **MR SPEAKER**

Mersi. Minis. Mon pa konnen si ou annan lenformasyon

SLTA, ou a kapab eklersi silvouple kot nou kapab.

**THE DESIGNATED  
MINISTER MR JEAN-  
FRANCOIS FERRARI**

Onorab nou proze i an kolaborasyon etrwat avek SLTA. E sa ki nou konnen se ki SLTA i annan lentansyon larzi sa selman, sa *link* ant Larivyè Anglez avek *Ile Du Port*. Sa i annan, sa proze i la.

Ki manner i pou enpakte nou travay nou, se ki i pou pous nou en pe plis an deor dan kannal si oule. E se pour sa ki nou bezwen aziste e fer an sort ki nou Bidze i ase pou permet nou pou nou fer fasilite ki pa tro gran, me selman ki satisfè bann dimoun dan distrik. Mersi.

**MR SPEAKER**

Mersi. Mon a pran kestyon Onorab Hoareau.

**HON JOHN HOAREAU**

Mersi Mr Speaker. Bonzour Minis. Bonzour tou dimoun a lekout. Mr Speaker ansanm avek sa proze Larivyè Anglez dan letan Bidze zot ti osi promet en bazar pou Beau Vallon, mon ti a zis kontan konnen si sa pou ganny osi materyalize? Mersi.

**MR SPEAKER**

*Sorry*. Minis.

**THE DESIGNATED  
MINISTER MR JEAN-  
FRANCOIS FERRARI**

Onorab byen seye, me selman non nou pa ti pou met en bazar pou Beau Vallon, i kekfwa a lavenir nou ava pe mazin en fasilite pli lo later dan distrik.

Me lans Beau Vallon mon krwar nou tou, yer mon'n war ou lo televizyon bann dimoun Beau Vallon i vremen kontan zot landrwa ou a krwar zot pa tro, tro anvi bann fasilite ki pou sanz zot landrwa. *So well tried* me selman pou le moman larepons se non. Mersi.

**MR SPEAKER**

Mersi. Nou a termin la pou sa kestyon. E nou a rebran kestyon 11er. Mersi.

***(BREAK)***

**MR SPEAKER**

Bon nou a kontinyen avek kestyon. Nou lo kestyon 61, Onorab Lemiel.

**HON SYLVANNE LEMIEL**

Mersi Mr Speaker. Bonzour Minis avek *CEO*. Tou mon bann koleg Manm Onorab e tou dimoun ki a lekout.

Eski Minis i kapab dir sa Lasanble e osi Kominote Peser Anse Royale ki plan son Gouvernman an sa ki konsèrn bann devlopman e fasilite

pour peser Anse Royale?  
Mersi.

**MR SPEAKER**

Mersi Onorab. Minis ou repons *please*.

**THE DESIGNATED  
MINISTER MR JEAN-  
FRANCOIS FERRARI**

Mersi Onorab. Onorab an se moman *SFA* pe aktyelman, mon krwar ou okouran, pe aktyelman enstal en nouvo *ice plant* deryer bazar e deryer kot bann *store* lapés i sipoze ganny fer.

Sa *plant* ki la depi plizyer lannen sa in vye pa pe marse e son letan in fini i kout ser pou kapab fer li, pour *run* li alors i pa ekonomikman *viable*, se pour sa ki nou pe aktyelman sa semenn pe mont en *brand new ice plant* pour Anse Royale.

*SFA* ti'n fini konstrir sa baz konkret pou met lo la e konstriksyon lofis *ice plant operator* i deza li osi an mouvman. Semenn pase travay in komanse pou met tou bann keksoz debout. Lenstalasyon nouvo *ice plant* i sipoze finalize lafen mwan prosen lafen Zen. Donk en mwan pou nou kapab met li e *commission* li kekfwa pou ankore en semenn oubyen de.

Sa *ice plant* i annan en kapasite 5 tonn, e son prodiksyon e i en stokaz

10tonn, ki mon krwar nou'n, ki nou'n anvi fer la nou'n anvi met en pti pe lis aköz n ou ekspekte ki ler nou get bann *trends* nou war ki sa kominote pe grandi en pe e nou osi vwar ki i annan en group peser ki dan plis lo kote Bougainville, bor lanmer e zot pe montre bokou lentere pou zot devlop zot lapés.

Nou pa konnen nou Gouvernman napa later bor kote Bougainville pou le moman nou pe sey rode. Me antretan nou pou fer ki sa fasilite Anse Royale i annan sa kapasite pou fer li osi bann zabitan Bougainville. E osi koman en *backup* pou bann zabitan ki bann peser ki Anse La Mouche, ki mon krwar ki zot tonm ase byen antre zot, zot konpran kanmarad e zot kapab partaz sa servis.

Nou annan, nou lobzektif se pour n ou fer sir ki nap okenn problem *ice* ankor dan ls ek sid Mahe. Donk nou ava travay for lo la. Pour sa lannen pou napa ankor plis lezot kalite devlopman dan Anse Royale an s ki konsern lapés.

Pou lannen 2023 *SFA* pe konsider, pe reflexir e pe get bann *costing* lo en pe *processing units*, aköz i annan bann antreprann ki'n anvi kapab transform zot pwason e azout valer e nou mazin ki Anse Royale i en landrwa ki kapab favorab pou sa.

Konsep pou ganny diskite avek distrik parey labitid e bann investiser prive dan Anse Royale. SFA ek Minister Lapes pou alors envit tou dimoun ki annan lentere dan sa domenn pou le nou komans bann diskisyon pou zot partisip dan sa bann konversasyon e donn zot nide.

Donk vwala en pe sa ki pe pase dan Anse Royale. Mersi.

**MR SPEAKER**

Mersi. Siplemanter Onorab Lemiel?

**HON SYLVANNE LEMIEL**

Mersi Mr Speaker. Minis mersi pour larepons. Minis mon konnen poudir dan lepase ti deza annan plan, akoz sa toultan peser pe demande, me antan sa ki konsern fitir devlopman apard *processing unit*, nou konnen lo kote lanmer li menm, kote pou *either* en pti por or *pantoon* ki ti pe ganny sizere.

Mon pa konnen ki SFA son plan dan sa kote. E apre osi an sa ki konsern *gear facilities* ki deza la, i annan peser ki'n menm konplent ki'n dir ki zot war sa i pa ase, akoz parey Minis ou'n fer sorti i annan pli ale bokou peser ki pe fer zot bann aktivite lo kote Anse Royale.

So mon pe regard osi dan sa laliny, eski i annan

posibilite or i dan zot plan pou zot revwar en pe sa *fishing gear store* ki deza la swa pou re aranz li ki plis dimoun i kapab servi or pou *go vertical* pou nou gete kwa ankor ki nou kapab mete.

E menm tan CEO dan en aktivite plant pye dibwa ki nou ti annan *recently* Anse Royale, ti fer mwan konpran ki zot pe menm, zot ti ava kontan fer en pti pe plis fasilite pou peser Anse Royale, me selman zot ti pe ganny serten difikilte an sa ki konsern later.

Mon ti a kontan konnen si sa *issue* later osi in ganny rezourd pou nou kapab anmenn plis devlopman pou nou bann peser dan distrik. Mersi.

**MR SPEAKER**

Mersi Onorab. Minis.

**THE DESIGNATED  
MINISTER MR JEAN-  
FRANCOIS FERRARI**

Mon a pran sa premye bout kestyon Mr Speaker, apre mon a pas avek CEO.

Lo devlopman bann fasilite dan anmen Onorab Anse Royale i en pe parey Beau Vallon, ki i en sitan zoli labe i annan lans tou dilon ki i toultan difisil pou konstrir n nouvo striktir ki pou enteronp sa labote.

E toultan ou annan dimoun ki an faver parey bann



peser i ava an faver, bann dimoun ki dan touris zot pa an faver. Donk i annan sa bann deba, me sa deba pe pran plas an se moman. E enn bann sizesyon ki'n osi ganny met devan, se gete pli pre avek legliz pli pre avek sa, deryer laboutik Hallybay dan sa *area* la kot i annan en ou a krwar en pti por byen proteze dan move sezon.

Alors sa i kapab en solisyon a lavenir. Me pour le moman napa okenn proze konkret pou fer okenn fasilite dan delo sale. *Ok* sa i mon repons. *CEO* i ava reponn ou lo bann lezot fasilite. Mersi.

**MR SPEAKER**

Yes *CEO*. Ou ava azoute.

**CEO NICHOL ELIZABETH**

Mersi Minis. Mersi Onorab. Lo kote later vremen nou'n *acquire* en bout later deryer kot sa *new ice plant* pou ete. Sa bout later deryer la in ganny pase lo *SFA* e i vremen pres ek lans, nou bezwen gete ki nou kapab fer la si i ase pou fer en 5 en 6, 8 *gear stores*. Be sa nou ava diskite, be selman sa bout later in ganny pase lo *SFA*. Mersi.

**MR SPEAKER**

Mersi. Mon a pran kestyon Onorab Larue.

**HON FLORY LARUE**

Mersi Mr Speaker. Bonzour Minis. Bonzour *CEO*. Mon kontan p tande ki later in ganny pase lo *SFA*, me a en pli gran lanpler sa bann bout later la deryer kot bazar ek *ice plant*, ti bann later ki ti'n deza ganny donner e ganny idantifye pou fer lezot proze anba en vye plan devlopman pou Anse Royale.

Eski Minister lape ansanm avek bann lezot sekter, pe gete ki mannyer sa bann later pou ganny *allocate* si pou kontinyen reste avek son bann *use* ki in ganny *allocate* pou fer? E lefe ki nou pe diversifye, eski nou pe kapab osi gete ki mannyer nou kapab devlop en pwen la kot Anse Royale ki pou kapab *tie-in* sa plan ki Minis Transpor ti dir kot nou kapab regard delo, transportasyon lo delo pou sey ede avek sa kote trafik ki nou gannyen dan bomaten.

So lefe ki nou annan bann problem konsesyon e Minis pour transpor in dir ki nou pe get dan servi transpor lo delo, eski nou kapab *tie* sa *in* avek *fisheries* pou annan en pwen kot nou kapab annan sa *kind of* por dan Anse Royale pou fer tou sa proze ansanm? Mersi.

**MR SPEAKER**

Mersi. *Panel*. Minis ou pou komanse.

**THE DESIGNATED  
MINISTER MR JEAN-  
FRANCOIS FERRARI**

Mersi pou ou kestyon Onorab. Onorab parey mon'n dir pli boner. I annan serten diskisyon ki pe pran plas lo ki kalite aktivite, kalite devlopman nou kapab fer ki *extend* lo lanmer.

Sa pwen ki ou'n leve i pou en diskisyon avek *Land Transport* byensir me pou le moman i pa dan aktyalite parey nou dir i pa lo latab la ozordi. Parkont sa later ki sa lespas ki *CEO* in fer referans avek, vi ki i enn bann bout later ki komersyal e ki pre avek delo sale, son litilite prensipal i pou reste pou peser.

Akoz peser i bezwen sa fasilite, me selman i en landrwa komersyal e tou nou bann striktir ki nou fer konmela nou diskit avek lagrikiltir e nou get ki mannyer nou kapab adapte en pe avek bann demann osi avek lagrikiltir. E i annan en kominote fermye zot osi zot bezwen, zot pe rod lespas e nou war poudir zot souvan zot lespas i kontrent.

Alors plan devlopman pou sa lespas i lo latab e i pe ganny diskite, me selman sa 2 laspe i primordyal pou le moman, apre i ava vin komers bann ki pli pre avek semen. So nou ava, parey mon'n dir pli

boner i enportan ki a sak fwa ki nou propoz en proze i ganny fer an konsiltasyon avek bann rezidan e sa i ava ganny fer. Mersi.

**MR SPEAKER**

Mersi. Onorab Mondon ou kestyon.

**HON TERENCE MONDON**

Mersi Mr Speaker. Mr Speaker mon kontan antann Minis rekonnèt kominote peser Bougainville, ki eN parti Bougainville i tonm dan Anse Royale e en parti Takamaka.

An vi ki i annan later prive ki an se moman anvant e *available*, eski Minis i kapab donn nou serten sipor pou nou kapab atraver Minister Later avek Labita, pou nou kapab ganny sa landrwa pou met bann fasilite pou kominote peser Bougainville?

E petet bann lezot fasilite ki sa sou distrik i napa ozordi, eski Minis i kapab donn nou sa sipor an vi ki Lotorite distrik in fini komans sa demars atraver Minster Later ek Labita? Mersi.

**MR SPEAKER**

Mersi Onorab. Minis.

**THE DESIGNATED  
MINISTER MR JEAN-  
FRANCOIS FERRARI**

Mersi pou ou kestyon Onorab. Onorab vi ki Gouvernman in

fek ini finaliz en Polisi lo to lesanz later, mon krwar se dan sa direksyon ki nou bezwen gete e mon ti ava vremen ankouraz ou kekfwa an kolaborasyon avek distrik Anse Royale osi sa 2 distrik ki obor kanmarad, gete si zot kapab fer en rekomandasyon avek Gouvernman.

E Gouvernman kekfwa i ava kapab idantifye en later ki ka ganny sanze aköz finans i en pe *tight*, me si ou kapab sanze avek en devloper ki anvi al en lot landrwa kekfwa sa i ava en posibilite.

Me selman i ava ankouraz ou met sa proze deva e mwan mon ava, koman responsab pou lapès e *SFA* ki la nou ava gete ki manner, nou ava sertenman donn ou sa lankourazman e sa sipor. Mersi.

**MR SPEAKER**

Mersi. E mon pou pas lo prosen kestyon. Kestyon 62, Onorab Philip Arissol.

**HON PHILLIP ARISSOL**

Mersi Mr Speaker. Bonzour tou dimoun. Kestyon i lir koumsa;

Vi ki lapès illegal pe kontinyen dan delo teritoryal Sesel, eski Minis pour Lapès i kapab dir Lasanble si i annan okenn kozri ki'n ganny fer, ou ki anvizaze fer avek pei kot sa bann bato i anrezistre ? E an

atandan? Ki kantite bato ki'n ganny atrape depi konmansman 2022? Konbyen ka ki Ankour e konbyen ki'n ganny trouve koupab? Mersi.

**MR SPEAKER**

Mersi Onorab. Minis ou repons.

**THE DESIGNATED MINISTER MR JEAN-FRANCOIS FERRARI**

Mersi Onorab. Onorab diskisyon diplomatik i kontinyen ganny fer ant bann Gouvernman, kot sa bann bato ki ganny arete pe lapès ilegal i sorti. Sa bann diskisyon i *ongoing*.

E la dan sa ka presi ki nou pen koze e prezizeman avek Gouvernman *L'Inde* e osi avek Gouvernman *Sri Lanka*. Personnelman mon'n annan konversasyon avek reprezantan *L'Inde* e *Sri Lanka*. Resaman reprezantan Minister Lapès, *AG's Office* e *SFA* in fer diskisyon tre detaye avek O Komiser Endyen lo sa dernyen seri larestasyon 5 bato ki nou Gard Lakot ti fer.

E la mon profite pou remersye tou bann manm Gard Lakot pou sa bon travay. Bann rankont avek bann Diplomat i sirtou pou pas lenformasyon ki ler bann peser i antre dan delo Sesel ki zot pou ganny atrape e riske pas en bon pe letan dan

prizon. E osi zot bato pou ganny sezi.

Savedir nou masaz ki nou anvi pase se plito pa vin Sesel, akoz Sesel son konsekans i serye. Mon oule osi partaz avek Lasanble ki sa bann larestasyon i kout nou, i kout nou pei e i kout *SFA* en ta larzan, sirtou ler nou et zafer Ankour e i pran en bon pe letan.

Sa bann peser ilegal i vremen vin en fardo lo nou an term donn zot manze, donn zot landrwa, anfen akey zot dan nou por e donn zot lezot lasistans. Ler lakour in finalman donn lasistans pou vann oubyen defalke sa bann bato vale sa zafer i mwens ki sa ki nou'n depanse.

Savedir tou sa bann prosedir i kout en ta larzan e Sesel pa ganny okenn benefis. Ladan menm si i annan dimoun i mazine i a dir be nou'n ganny 5 bato, me 5 bato sa larzan ki in koute i vremen egzorbitan.

Alors rezon akoz nou'n fer bann konversasyon diplomatik, se pour fer sa bann peser retourn dan zot pei pli vit posibil. E i annan en prensip ki nou pe aplike, ki Lakour pe aplike isi avek Biro *Attorney Zeneral* se ki, se bann kaptenn sa bann bato ki ganny detenir e nou sey fer fason pou nou pa tenir bann maren, akoz nou konsidere ki

se pou zot ki bann koupab prensipal.

Alors i annan pros 60 zot ki ti ganny arete lo sa dernyen 5 bato lapas Endyen. Lafors militer *L'Inde* in fini aparti zot e zis bann kaptenn ki ankore isi. Alors mon krwar Onorab ou ti'n osi demande ki lekel sa bann bato, mon ava dir zot i annan sa 5 bato *L'Inde*, *DONO*, *Set abakar Arulpep*, *whatever Ininfernjezu*, *Vidya*, *Badi Badi Mata*, ok. E, arrrr... be mon frer ou malelve menm.

### **MR SPEAKER**

Onorab Pillay! Bomaten nou'n pas ladan e ou realize poudir ou bann lenteripsyon i vin plizanpli angasan. Ou'n mansyonn non Prezidan Ramkalawan.

### **THE DESIGNATED MINISTER MR JEAN-FRANCOIS FERRARI**

Prezidan ki annan pou fer ladan?

### **MR SPEAKER**

Ki pa ti, Minis ou a les mon koze silvouple.

*(Interruption)*

### **MR SPEAKER**

Silvouple Onorab Pillay ou bezwen arete avek sa latitud, ou pa kapab enteronp Lasanble. E sirtou ou referans

avek Prezidan Ramkalawan pa apropiye. Sa i en lord. Mersi.

**HON SEBASTIEN PILLAY**

*(Off-Mic)*

**MR SPEAKER**

Non i en lord, *that's it!*

**THE DESIGNATED  
MINISTER MR JEAN-  
FRANCOIS FERRARI**

Ok, mersi. Donk i annan apepre en swasantenn maren e sa bann bato ti ganny arete le 6 Mars e zafer i ankor *ongoing* Ankour. Apre i annan en bato *Sri Lanka* mon krwar zot in tann lo nouvel yer swar ki ti ganny arete li le 11 Me e avek 6 manm lekipaz abor.

E donk si i annan 6 depi komansman sa lannen - i annan 6 sa bann bato. E i vremen en problem Onorab pou nou pei sa bann keksoz koumsa akoz i kout en vremen en ta larzan e nou bezwen - Mon kontan ou'n lev sa pwen ki nou annan en relasyon diplomatik, nou bezwen kontinyen lager e diskite avek bann pei ki nou bann vwazen pour ki zot dekouraz sa bann pratik dan nou delo. Mersi.

**MR SPEAKER**

Mersi Onorab. Ou annan siplemanter? Wi. Onorab Arissol mikro silvouple.

**HON PHILLIP ARISSOL**

Mersi Mr Speaker. Eski Minis i kapab dir nou si i annan negosyasyon ki'n ganny fer par okenn pei oubyen larezyon - pei dan larezyon pou transfer sa bann prizonnyen ki enplike avek lapes ilegal dan zot pei, pou reparti sa bann dimoun? Mersi.

**MR SPEAKER**

Mersi. Eski Minis pa'n reponn sa oubyen i en lot ka ki i pe dir?

**THE DESIGNATED  
MINISTER MR JEAN-  
FRANCOIS FERRARI**

Wi mon'n fini reponn e i annan en swasantenn zot ki'n fini l dan zot pei avek lasistans larme Endyen. Mersi.

**MR SPEAKER**

Mersi. Mon a pran kestyon Onorab Adelaide.

**HON FRANCOIS ADELAIDE**

Mersi Mr Speaker. Mon kestyon pou Minis se ler nou pe koz lo lapes ilegal, Minis mon konpran zot pe fer en bon pe zefor deor, me anndan osi dab teritwar Sesel en bon pe lape ilegal pe arrive. Anndan mon pe dir ou bann zil pros.

E la *Eden Island* mon aprann poudir i annan bann ki pe fer lapes ilegal, ki zot, ki zot deza la e napa naryen ki zot pe fer pou entersepte zot

pou zot aret fer sa pratik e pou zot al dan en lot pei.

Mon pa konnen si i deport zot, i annan sa bann zafer i deport zot, l i annan sa bann zafer *catch and release* apre i annan *fly fishing* ki i annan bann *skipper* ki dir nou i annan sa bann bato etranze ki pe lapés ilegalman dan delo Sesel?

E eski i annan bann mekanizm ki bann peser lokal i kapab pas atraver pou raporte e deswit aksyon pran avek zot pour ki zot osi zot ganny retournen dan zot pei e sa bann louvraz i ganny garde pou Seselwa? Mersi.

### **MR SPEAKER**

Mersi Onorab. Minis ou repons.

### **THE DESIGNATED MINISTER MR JEAN-FRANCOIS FERRARI**

Mersi Onorab pou sa keston. Onorab nou ganny plizyer rapor ki i annan bann bato *charter* bann *yacht* bann bato plezir ki apard sa biznes *sailing* e *yachting*, ki zot fer zot osi fer lapés e menm parfwa zot vann sa pwason ki zot lapés avek bann restoran, donk zot vin bann konpetiter direk nou bann peser.

E sa se bann keksoz ki nou, nou pa tolere. E ansanm avek SMSA i annan plizyer aksyon ki'n ganny pran e mon

kapab dir ou ki napa tro bokou letan i annan 3 *skipper* ki ti ganny fer le dan pei, en *La Russie*, en Italyen ek en lot ki ti ganny fer ale dan pei aköz zot ti pe fer bann keksoz an dot zot *license*.

I annan osi anba *Mahe plateau trap and line management plan* en program pou fer sir ki bann sa bann bato lapés i fer *catch and release*.

Mon vreman satisfè ki bann lasosyasyon *Game Fishing* Sesel i vreman pe partisip avek nou dan en fason tre, tre bon korperasyon zot annan avek SFA e avek Minister Lapés, aköz zot, zot anvi vreman protez sa lapés e fer sir ki i kontinyen keksoz i en aktivite touristik e ekonomik. Donk lo sa kote nou napa problem.

Me sertenman i annan e i annan bann regilasyon la ki'n ganny met an plas ki si bann ler bann restoran i aste bann pwason ki *undersized* oubyen ki'n ganny lapés dan en fason ilegal zot osi zot pou ganny sanksyonnen.

Donk i annan en kantite zefor ki pe ganny fer Onorab nou lanmer i gran, nou lespas i gran. E mon pa dir zis *Eden Island* ki ariv sa me selman i annan plizyer landrwa kot sa bann bato i koste, e i pa toultan fasil pou nou *track* zot me selman nou pe fer en zefor

akoz i enportan ki sa bann labi i arete. Mersi.

**MR SPEAKER**

Mersi. Mon a pas lo kestyon swivan. Onorab Georges Romain.

**HON GEORGES ROMAIN**

Mersi Mr Speaker. Bonzour Minis avek *CEO*. Bonzour tou koleg Onorab tou dimoun a lekout. Mr Speaker mon kestyon i lir koumsa;

La ki i annan plizyer lannen ki kota mete par *IOTC* i ganny aplike pou bann bato enternasyonal ki lapas ton dan nou lanmer, dan zefor pou protez popilasyon serten lespes ton, eski Minis i kapab donn Lasanble detay lo okenn amelyorasyon dan stok ton dan nou lanmer, e osi si i annan lezot lespes ton ki pe ganny met an danze par sa lendistri lapas? Mersi Mr Speaker.

**MR SPEAKER**

Mersi Onorab Romain. Minis ou repons.

**THE DESIGNATED MINISTER MR JEAN-FRANCOIS FERRARI**

Mersi Onorab. Onorab avek ou permisyon mon ava komans avek en pti leklersisman. Kota lo ton zonn ki *IOTC* i mete depi 2017 pa aplik zis pou bann bato enternasyonal oubyen

bann bato etranze ki lapas dan nou lanmer.

Sa kota i aplik pou tou sa 30pei manm ki form sa lorganizasyon ki apel *IOTC*, ki zot bato i lapas dan Losean Endyen. Parey nou konnen ton i en lespes migratwar ki toultan an mouvman, zot bouze dan nou delo, dan delo lezot pei e osi dan delo enternasyonal.

Napa en pei ki kapab determinan endependaman son stok ton ki annan dan son lanmer, akoz sa pwason pa reste tou dilon lannen dan en sel lokasyon parey mon'n eksplike.

Me parkont nou kapab estim zefor lapas dan nou lanmer, pou determinen si i annan en *base* oubyen en logmantasyon dan zefor lapas an relasyon avek kantite pwason ki ganny atrape. Zefor lapas ki vedir kantite bato e kantite dimoun nou pe mete pou lapas menm kantite pwason oubyen pou lapas mwens.

Donk nou kapab estim sa zefor ki nou pe mete. Me sa i pa le sel determinan akoz i annan plizyer faktor lanvironnman maren ki lenfliyans kote ton i migre dan en lannen ouswa dan en sezon. E bann bato enternasyonal ki nou donn *license* enkli bann ki anrezistre Sesel, pa lapas ton

zis dan nou delo, me osi dan lezot ziridiksyon e osi lo *high seas* parey nou dir.

Alor ler Komite Syantifik IOTC i fer *stock assessment*, sa i baze lo *data* ki tou pei manm IOTC i sipoze soumet a lorganizasyon sak lannen. Me menm i annan an mwayenn 25, 20 a 25poursan sa lenformasyon ki ganny estimen par sa Komite, akoz i annan bokou pei manm IOTC dan Losean Endyen ki pa forseman raport lo sa ki zot lapes.

Sirtou dan bann pei ki zot lapes i ganny konsidere koman lapes artizanal. Pou fer resorti Onorab e sa i enportan pou piblik konnen, akoz par ler nou mazine poudir zis Sesel i fer zefor pou protez sa stok ton.

47poursan ton ki ganny lapes dan *zone* Losean Endyen par bann manm IOTC, i sorti dan bann lapes artizanal. Se pa bann gro bato ton parey nou war bann sener ki lapes la plis sa.

Me 47 poursan e lapes par bann dan bann lapes artizanal e *stock assessment* pou determinen ki kantite ton i annan dan Losean Endyen i kouver ton, tou ton ki'n ganny lapes depi lakot Lafrik ziska *Australie* ziska dan Was *Australie*. E depi dan delo bann pei Nor ki baliz ek Losean Endyen parey *Oman*,

*Pakistan Bangladesh* ziska *L'Indonesie*.

Donk i en *zone* vreman enorm. Sa *stock assessment* pa konpri ton ki'n ganny lapes par zis bann bato ton ki nou war dan Por Victoria parey mon'n dir. Me i enkli tou sa ki'n ganny lapes swa ek laliny, ek *drift-nets*, ek *pollen line*, eksetera partou dan Losean Endyen.

Alors an repons pou ou kestyon Onorab si mon kapab fer li en pe senp se ki non, stok ton pa'n amelyore dan Losean Endyen pandan sa bann letan, dan rankont anyel Komite Syantifik IOTC ki ti fer an 2015 zot ti raporte ki an 2014, 430mil tonn ton zonn in ganny lapes.

E zot ti rekomande ki komisyon ton Losean Endyen i redwir sa kantite lapes par 20poursan;- savedir en pti pe plis ki 86mil tonn par an ki nou bezwen redwir ki ti ganny rekomande e ki sa i ava permet kekfwa 50poursan sans ki ton zonn son stok i ava rekipere an 2024.

Parkont an 2020 baze lo rapor dernyen *stock assessment* ki Komite Syantifik ki ti sorti an Fevriye sa lannen zot ti raporte ki 432mil tonn ti ganny lapes. Alors 430 an 2014, 432 an 2020, sa i montre ki napa diminisyon ki Komite Syantifik ti pe demande, me ki sa



Komite in fer resorti dan zot bann rapor depi 2018 se ki menm si serten pei in fer zefor e redwir la lakantite ki zot abitye lapes.

*(mobile phone ringing)*

**MR SPEAKER**

I fer dezyenm fwa mon tann sa telefonn, mon pa konnen lekel. Ok. Mersi. Minis ok, mersi pou *surrender* ou telefonn. Mersi Minis. Kontinyen silvouple.

**THE DESIGNATED  
MINISTER MR JEAN-  
FRANCOIS FERRARI**

Mon ti a kontan dir ki Komite in fer resorti dan zot rapor depi 2018 se ki menm si serten pei in fer en zefor e redwir la kantite ki zot abitye lapes e respekte sa kota ki zot in gannyen parey Sesel in fer, serten pei in ogmant zot lapes ki fer ki sa bes, ki sa bann parey nou Sesel nou'n redwir in ganny ranverse par sa bann ki'n ogmante pou zot lape.

En legzanp Onorab, se ki e pei parey Oman ki ti lapes en pti pe mwens ki 20mil tonn an 2017, 20mil tonn 2017 me an 2020 3an pli tar sa pei in lapes pres 70mil tonn. En logmantasyon apepre 250 poursan. Lo lot kote nou isi Sesel dan sa menm peryod dan lannen 2017 bann bato ki anrezistre Sesel ti lapes 46mil

tonn me an 2020 nou ti'n redwir pou vin 39mil tonn. Savedir nou, nou'n redwir par 15poursan.

Alors ou war Onorab vi ki sa zefor ki serten Pei Manm, sa lorganizasyon parey Sesel i fer e pe kontinyen fer i ganny efase par bann pei ki pa oule swiv Lakor pou Lapes dan en fason soutenab.

I annan 6 pei dan *IOTC* ki ti'n refize pou aksepte en rediksyon lo en limit - lo la kantite ton zonn ki zot ti'n kapab lapes e se sa bann menm pei ki ankor refize pou negosye lo sa mezir dan miting *IOTC* ki ti fer 2 semenn pase.

Onorab pou stok ton zonn amelyore dan Losean Endyen fodre tou pei i fer en zefor. Parey toultan mon'n dir sa ton pa pou nou, i pou nou zis letan i pas dan nou delo me ler i lo *high seas* i pou tou pei, nou losean.

E vi ki i antre sorti dan bann diferan ziridiksyon, nou tou nou bezwen fer sa zefor kolektif pou *manage* li byen. E sa pa aplik zis pou ton zonn me tou ton espesyalman bann ton tropikal enkli *skipjack* e *big eye* ki migre annabondans dan nou lanmer. Alors tou zefor i bezwen ganny partaze.

An sa ki konsern dezyenm parti ou kestyon lo sa ki annan lezot, eski i annan lezot nespes ton ki anba menas, larepons se ki *IOTC* pe

swiv avek bokou prekasyon stok *big eye* ki en lespes ki ganny lapas osi en bon pe.

Son stok pa dan en sityasyon osi tan grav, parey ton zonn, me *IOTC* in dakor pou komans byen boner sirvey sa resours de pre atraver en *management plan*. Mersi Onorab.

### **MR SPEAKER**

Mersi Minis. Siplemanter Onorab Romain.

### **HON GEORGES ROMAIN**

Mersi Minis. Mersi bokou pou pou larepons byen detaye. Mon annan 2 kestyon siplemanter. An vi ki *IOTC* in koup kota baze lo sa i mwan mon'n lir pou 2022 pou al en pti pe plis ki 9mil tonn, akoz zot in vwar ki ti annan en lapas an ekse an 2020.

E an vi ki *SFA* in rekonnet ki enn bann rezon ki'n koz sa set akoz bann *long liners* parey ou'n fer resorti parey sa bato ton ki pe lapas ton, byensir in tarde pou donn zot rapor lo la kantite ton ki zot lapas dan nou lanmer.

Alors Minis atraver ou Mr Speaker, eski zot in kapab regarde ki mannyer zot pe adres sa problem se mon pou evite sa sityasyon i ariv ankor avek sa bann bato *long liners* ki pe tarde donn rapor zot kantite ton ki zot pe lapas?

Mon dezyenm kestyon siplemanter Mr Speaker Minis la ki nou'n vwar ou pandan sa dernyen, lo televizyon resaman lo parey ou'n dir 2 semenn pase lo *IOTC* ti pe fer zot miting, nou'n vwar ki bokou bann pei parey ou'n eksplike ki zot pa'n vreman tonm dakor lo pour lapas tonm dan en fason soutenab.

Alors mon kestyon Minis pou sa, ki pozisyon Sesel i trouv li ladan pou ou kapab protez sa lespes ki nou apel ton dan nou lanmer? Mersi bokou Mr Speaker.

### **MR SPEAKER**

Mersi. Wi ou a pas kestyon ek *CEO. Yes CEO.*

### **CEO NICHOL ELIZABETH**

Mersi Onorab. Mon a pran sa bout lo *industrial long line*. Nou pe adres sa avek en proze vreman elektronik, nou pe met, nou'n komanse, nou'n fer enteraksyon e bann *boat owners* pe desann Sesel mwan prosen e nou pe met en sistenm *Electronic Monitoring System (EMS)* lo tou sa bann bato ki annan paviyon Sesel.

Proze in komanse en pe letan depi lannen pase, me i annan enn de pti *technical issues* be selman nou pe adres sa e *very soon* tou bann paviyon, bann bato *industrial long liners* ki anvi anrezistre anba paviyon Sesel zot pou

bezwen annan en *EMS install* lo zot.

E nou osi nou pe *get Electronic Reporting System (ERS)* ki nou pa pou bezwen tay deryer zot ouswa fors zot tou le semenn report zot *catches*. Savedir nou pe *go* dan *direction* kot nou pe annan *full control* lo sa bann bato *electronically rather than manually*. Mersi.

### **MR SPEAKER**

Mersi. Minis. Ou pou azoute.

### **THE DESIGNATED MINISTER MR JEAN-FRANCOIS FERRARI**

Mersi Mr Speaker. Mr Speaker mon ti kontan dir avek Lasanble, ki personnelman mon krwar ki Sesel i sa pei kot lapas ton i transparan dan Losean Endyen e se sa ki nou rev i pou fer li sa lapas ki pli transparan dan lemond.

Akoz nou anvi, nou napa naryen pou kasyet, nou anvi kontinyen lapas pou boko letan e menm si sa i vedir ki nou bezwen lapas mwens, nou'n ini met li an mouvman pou li kapab fer en pe plis avek sa pwason azout valer eksetera.

Alors Onorab nou pou kontinyen fer ou sa ki neser, tou bann kontrol pou an plas aköz i absoliman esansyel ki sa laspe i dire pandan plizyer lannen. Lo kote Polisi

Gouvernman mwan mon kapab dir avek zot, ki dan nou Gouvernman nou'n asiste ki nou pou fer zefor ki neser.

Be selman nou bezwen fer zefor ler en zefor i annan en valer i annan en rezilta. Si nou, nou fer en zefor e lezot pa fer zefor, sa pti zefor ki nou pou fer i pou pas parey delo dan en pannyen.

E alor nou anvi ensiste pou nou met nou lipye ater ki tan ki lezot pei pa zwe zot par dan kontrol lapas ton nou osi nou pou met nou lipye ater, aköz akfer nou, nou pou vin mizer san okenn rezilta?

Donk mon krwar nou travay pe anmenn progre nou p dousman, dousman anmenn serten pri avek nou. Nou'n angaze dan la rezyon avek ban zil Losean Endyen anmenn zot e pe pli pros avek nou pou nou kapab fer tou sa zefor e *convince* lezot pei pou zot fer menm zefor zot osi. Mersi.

### **MR SPEAKER**

Mersi Minis. Siplemanter Onorab Pillay.

### **HON SEBASTIEN PILLAY**

Mersi Mr Speaker. Eski Minis i kapab dir nou, eski Sesel an relasyon ek son bann pei ki ou'n nonmen Oman e lezot, eski Gouvernman oubyen Minister oubyen ou menm i annan okenn lagreman avek okenn bato sorti dan sa bann

pei respektif pou lapès dan nou delo teritoryal pou ton?

E prenon kont ki i annan en boykot ki pe ganny antisipe nou bann prodwi ton sorti dan Losean Endyen ki annan posiblerman i kapab annan lenpak lo lefe ki nou annan en *cannery*, e nou ti negosye pou ki i ganny akse avek marse Angle, ki zot pe anvizaze.

Ki zot ti'n negosye aparaman depi lannen pase, zot ti negosye pou li annan akse avek marse a *L'Angleterre*, ki zot anvizaze fer pou ki sa boykot sa keksoz ki pe arive pa afekte posibilite pou *IOT* kontinyen vann son bann prodwi avek bann marse Angle, me osi pa afekte bann Seselwa ki osi pe fer *industrial longline* isi Sesel? Mersi Mr Speaker.

### **MR SPEAKER**

Mersi Onorab. Minis.

### **THE DESIGNATED MINISTER MR JEAN-FRANCOIS FERRARI**

Mersi Mr Speaker. Mr Speaker nou premye kestasyon okenn pei ki nou annan lagreman avek. Mon krwar mon kapab ki si i *Taiwan* ki nou annan en lagreman lo kot lapès *industrial long lining*.

Aprè parey zot konnen i annan serten pei ki fer *double registration* mon konnen i annan en pei i annan en bato

*Tanzanie*, me laplipar sa bann pei e i annan 13 bato lapès ki anrezistre ki annan paviyon Sesel. 13 bato lapès endistriyel ki ladan laplipar i pou Espanyol e 2 oubyen 3 pou Franse ki par anba paviyon Sesel. Donk la i la ki mannyer nou striktir i ete.

Lo kestasyon sa boykot ki Onorab nou pe prevwar oubyen ou pe antisipe e ki nou kapab fer pou nou kapab, pou nou -

### **HON SEBASTIEN PILLAY**

*(Off-Mic)*

### **MR SPEAKER**

Onorab Pillay les Minis fini reponn ou kestasyon, les Minis fini reponn ou kestasyon. Minis kontinyen silvouple.

### **THE DESIGNATED MINISTER MR JEAN-FRANCOIS FERRARI**

Mersi Mr Speaker. Mr Speaker lo sa boykot li Onorab *Leader* Lopozisyon pe antisipe mon konsilte ki apre sa negosyasyon ki nou'n fer avek *IOTC* sa lannen, zimaz Sesel in mon t tre o dan lemonn e tou bann pei in rekonnèt ki Sesel avek son bann partner pros, in fer en kantite zefor, in ferm en kantite propozisyon, pou negosye pou pare pou reget bann lakantite lapès ki ou kapab lapès, reget bann *fads*, gete ki mannyer nou kapab fer

li bio degradab, gete ki manner nou kapab met plis kontrol lo sa bann bato elektronik e fizik.

Donk tou dan lapres partou dan lapres spesyalize, Sesel i annan en bon limaz. Alors mon pa ekspekte ki ton ki ganny lapas anba paviyon Sesel pou sibir okenn lefe negativ, oubyen lefe advers akoz nou pa'n kapab ariv koz sa rezolisyon lo sa Lakor kolektif. Mersi.

**MR SPEAKER**

Mersi. Onorab Pillay si u kestyon in ganny mal enterprete silvouple nou a klarifye mon ti a kontan *move on* - pa monopoliz letan. Mersi.

**HON SEBASTIEN PILLAY**

Mersi Mr Speaker. I annan 2 pwen kot mon kestyon in mal ganny enterprete. Premyerman mon ti pe fer referans avek sa lapas an zeneral, kot i konsern ton, petet mon ava met n presizyon; eski Oman i annan okenn bato ki pe lapas dan nou delo teritoryal? Oubyen i annan en *fleet* bato Omane ki pe lape dan nou delo teritoryal? Apre dezyenmman mon oule fer en klarifikasyon.

Dezyenmman mon oule fer en klarifikasyon. Mon pa'n dir mon pe antisipe oubyen mon oule prevwar i annan boykot, sa ki mon'n dir se ki se

sa ki pe ganny raporte e ki Minis i dir i pe fer.

*Now* si Minis i santi poudir mon dir sa i pa mon lentansyon, mon pa pou fer parey li kot li dan lepase in dir tap Sesel kot i fermal, me i pa mon latansyon akoz se nou ki pou soufer lo la.

**MR SPEAKER**

Onorab ou kestyon, pa al ladan. Mersi.

**HON SEBASTIEN PILLAY**

So, mon ti a kontan met sa lo rikord. Mersi.

**MR SPEAKER**

Mersi. Minis ou kapab klarifye son pwen silvouple.

**THE DESIGNATED MINISTER MR JEAN-FRANCOIS FERRARI**

Non, mon krwar in met lo rikord. Non napa okenn bato Omane ki'n anrezistre dan delo Sesel. Mersi.

**MR SPEAKER**

Mersi. Mon pou pa lo prosen kestyon. Onorab Georges Romain. I annan en kantite manm ki'n lev lanmen mon napa letan Onorab Cosgrow.

**HON WALLACE COSGROW**

Mr Speaker nou'n lev lanmen byen boner.

**MR SPEAKER**

Onorab i annan plizyer manm ki'n lev ou lanmen, mon'n pran letan, mon pran letan ki mon annan pou sa kestyon e nou napa ankor letan.

**HON WALLACE COSGROW**

Me nou pa kapab sakrifye letan pou klarite. Nou bezwen klarite, zis letan, letan, letan !

**MR SPEAKER**

Onorab arete, sansan mon pou demann ou sorti. Arete silvouple Onorab Georges Romain ou kestyon 64.

*(Interruption)*

**MR SPEAKER**

Non, non, mon pa pe pran okenn *point of order*, mon pa pe pran- Onorab Pillay non, nou pe kontinyen, si ou, si ou annan en pwen, mon pa pe pran okenn *point of order* lo sa pwen ki'n pas la, si ou annan en lot pwen kontakte mwan prive silvouple se tou.

**HON SEBASTIEN PILLAY**

*(Off-Mic)*

**MR SPEAKER**

Aret argimant ek mwan.

**HON SEBASTIEN PILLAY**

*(Off-Mic)*

**MR SPEAKER**

Onorab Pillay mon pou demann ou sorti silvouple pou larestan sa sesyon.

**HON SEBASTIEN PILLAY**

*(Off-Mic)*

*(Mic switched off)*

**MR SPEAKER**

Mon ankor pe demann ou pou sorti dan lasal silvouple pou larestan kestyon, akoz ou'n enteronp mwan tro bokou s sesyon. Mersi. Ou a sorti pou bomaten ou kapab retournen apre midi. Mersi.

*(Interruption)*

**MR SPEAKER**

Silans silvouple! Wi Onorab Romain ou kapab komanse avek ou kestyon.

**HON GEORGES ROMAIN**

Mersi Mr Speaker. Minis, atraver ou Mr Speaker;

An vi ki bazar Anse Etoile in deteryore e i demann en renovasyon mazer, eski Minis i kapab dir Lasanble kan ki sa proze renovasyon bazar Anse Etoile pou demare? Mersi Mr Speaker.

**MR SPEAKER**

Mersi. Minis.

**THE DESIGNATED  
MINISTER MR JEAN-  
FRANCOIS FERRARI**

Mersi Onorab. Travay renovasyon lo bazar Anse Etoile i dan plan pou sa lannen. Renovasyon pou komanse pli tar Septanm Oktob 2022.

SFA Onorab pou bezwen lasistans MNA avek DA e mon krwar mon kapab kont lo ou avek kont lo DA pou asiste nou avek en deranzman tanporer e nou pou fer fason ki sa tanporer i vreman kourt. Akoz nou pa oule al *setup* bann fasilite en lot landrwa pou nou pour ki apre nou bezwen kase e i kout larzan.

Donk, nou vreman anvi *plan* sa travay pou nou fer li tre bit e dan en fason tre efikas. Alors nou pou osi demann avek piblik pou ede pou konpran poudir sa landrwa pou en pti pe konsesyon pandan detrwa zour, enn, de semenn kekfw.

E alors i annan fasilite La Retraite ki osi dan ou distrik me selman i de fasilite diferan, alors mon krwar i lokazyon mon krwar pou la Retraite avek Anse Etoile rekonsilye e travay anba menm twa. Mersi.

**MR SPEAKER**

Siplemanter Onorab Romain.

**HON GEORGES ROMAIN**

Mersi Mr Speaker. Minis ou larepons in fini dir tou mon pou annan zis en kestyon siplemanter. Ou pou definitivman ou pou gannyen nou sipor ansanm ek DA sa mon pou garanti ou. Sel kestyon mon pou demann ou Minis, ou'n dir ki sa proze pe l komanse an Septanm sanmenm sa lannen kantite letan sa proze i kapab dire? Mersi Mr Speaker.

**MR SPEAKER**

Mersi Onorab. Minis.

**THE DESIGNATED  
MINISTER MR JEAN-  
FRANCOIS FERRARI**

Mersi Mr Speaker. Mr Speaker CEO i dir mwan ki i devret pran 3 semenn, e akoz son striktir i deza la e napa okenn travay striktirel enportan ki nou pe fer, me zis donn li en renovasyon.

E apre ler nou'n fini fer li parey mon toultan pa fer mon sorti Au Cap pou mwan vin verifye ki mannyer keksoz pe deroule, akoz nou pou donn zot en zoli fasilite e nou pou kont lo zot apre pou okip li byen. Mersi.

**MR SPEAKER**

Mersi Minis. Onorab Loizeau.

**HON NORBERT LOIZEAU**

Mersi Mr Speaker. Bonzour ankor enn fwa Minis. Mr

Speaker mon anvi dir Minis mon rekonnèt ki Gouvernman pe fer bokou pou bann peser kot bokou bazar pe ganny fer *ice plant*, e menm mon'n sibvansyonnen lo *fuel*. E mon panse ki aprezan serten peser pa ava pwason menm pri ek sa bazar ki'n koute pou fer sa bazar.

Mr Speaker vi ki nou pe koz lo renovasyon bazar la, vi ki Bazar Viktoria li malgre i dan St Louis, peser partou kote i vin vann zot pwason laba dan Bazar Viktoria. Vi ki i annan bazar ki pe ganny fer partou lo Mahe ek bann lezot fasilite.

Mon anvi demann Minis vi ki Bazar Viktoria i annan en ta kontrent en tre keksoz pe rive drenaz, lera, loder, eski Minis i kapab dir nou apre ki nou pe konstri tou sa bazar partou, eski zot annan e plan pou Bazar Viktoria li prezan? Mersi.

### **MR SPEAKER**

Eskiz mwan, eski mwan Onorab ou kestyon i zis pa lo kestyon orizinal. Eskiz mwan i pa lo kestyon orizinal. Mon a rezerv sa. Anvoy sa kestyon pou en lot ler silvouple. Eski i annan en lot, okenn lot kestyon lo bazar Anse Etoile? Mersi nou a pas lo prosen kestyon. Onorab Aglae ou kestyon limero 65.

### **HON EGBERT AGLAE**

Mersi Mr Speaker. Bonzour Minis ek *CEO*.

Eski Minis i kapab donn en kontrandi sa Lasanble, konbyen pwen fasilite pou bann peser dan bann distrik ki'n konplete? Lekel bann distrik *outstanding* ki ankor pe espere? Ki kriter ki zot servi pou fer proze fasilite pour peser dan bann distrik? Mersi.

### **MR SPEAKER**

Mersi Onorab. Minis.

### **THE DESIGNATED MINISTER MR JEAN-FRANCOIS FERRARI**

Mr Speaker lalis i en pe long akoz parey Onorab Loizeau in dir en ta proze nou'n fer.

Mn ava sey donn bann ki konsekan akoz i annan bann pti lentervansyon ki nou'n fer nou pa pou mansyonnen isi.

Bann ki'n konplete Bel Ombre, bann *processing units* in konplete. Grand Anse Praslin *ice plant* in konplete.

La Retraite *gear store, ice plant, pontoon* tousala in konplete.

Anse La Mouche sa lannen nou'n fer en gran proze pour *dredge* pour en lapas pou ki'n vremen en bon sikse in terminen.

Glacis nou'n kas lapas e nou'n konstri en pti bazar



ptipti bazar parey nou dir. Donk sa bann proze ki'n fini konplete. Roche Caiman nou ti fer li an kolaborasyon avek Eden Island donk mon pa pe met li 100poursan ladan.

Bann ki reste pou konplete Onorab bazar Cascade. I enn pli gro proze ki nou pe fe,r aköz zot konnen ki i enn bann distrik ki annan bann pli gran kominote peser.

La nou pe fer *gear store, landing shed, fish shop, gear shop* eksetera. I en gro proze e nou pe espekte ler zot pase lo konblaz zot pou vwar poudir nou pe al lo finisyon e avan lafen lannen mon mazine poudir bann peser i ava kapab satisfè avek.

Anse Aux Pins osi i en lot gran proze ki sa *weekend* avek *CEO MNA* nou'n lo *site*, pou plizyer ale vini pou nou finaliz enn de pti detay.

E mon krwar i vreman en zoli proze pour en zoli distrik. Alors *gear store, landing shed, fish shop you name it* mon krwar i pou annan posibilite pour kapab arive laba.

Baie Sainte Anne Praslin li osi i en lot proze ki fer nou ase fyer. E ki de semenn pase mon krwar *CEO* ti avek nou kot nou'n vizite nou'n vreman satisfè vwar ki mannyer bann keksoz pe bouze.

Grand Anse Praslin nou annan nou sa mon'n dir nou pti bazar ki nou'n *rehabilitate*.

Nou pe fer en travay lo Victoria Por pou aköz Bel Air napa en bazar li.

Alors kekfw son se sa ki Onorab Loizeau ti pe gete ki bann posibilite ki nou kapab fer lo Por. Be i annan travay ki nou pe fer lo Por.

E Anse Royale nou'n dir avek Onorab bomaten i annan sa travay ki *ongoing*.

Donk Anse La Mouche mon'n dir, English River. English River mon'n reponn bomaten.

La Digue nou annan en travay pou nou fer pou nou grat en pe lapas pa lapas me sa mouyaz pros avek *ice plant* e bazar, pou ki bann bato i kapab koste en pe pli byen.

Nou fek ganny permisyon pou nou *CEO* i dir mon pou nou fer en seri *gear store* Grand Anse Praslin e Onorab la ou la e Onorab i kontan. Aköz li osi depi en pe letan i pe lager pour sa.

Donk Glacis nou dan en gro konba, me selman ou a krwar nou pe ariv a lafen sa konba. E nou pou kapab delivre lo *gear store* pour Glacis.

E byensir Ile Du Port i annan en pe devlopman en pe pli enportan ki pe ganny fer.

Vwala sa bann proze Onorab ou vwar. Mon byen kontan ki zot rekonnet ki Gouvernman pe fer bokou dan

sa domenn, pou fasilite lavi bann peser.

Ki bann kriter Onorab? Ou pe demann mwan pou fer ki en distrik i kalifye pou li ganny sa bann fasilite.

Premyerman Onorab se en nou gete si i annan en kominote peser aktiv. E aktiv i enportan sa aköz parey mon'n dir pli boner tou nou travay i ganny fer an *co-management*. *Co-management* se parey La Retraite nou donn en fasilite nou espekte bann peser pran zot responsabilite.

Zot menm zot ki pou vin ki sipoze tir en dimoun ki pe dormi lo bazar tir en dimoun ki pe fer malelve dan lo *pontoon*. Tir raporte si i annan en vol en keksoz koumsa.

*Management* i partaze. E se pou sa ki nou bezwen annan sa Kominote Peser ki aktiv e ki determinen pou zot fer en bout dan sa travay.

E osi fodre annan en Lasosyasyon Peser ki'n ganny anrezistre. Nou pa kapab entervenir dan en distrik si napa en group peser ki'n anrezistre e ki pe partisip avek nou dan nou bann program.

E trwazyenmman i enportan ki nou fer en lenvestisman dan landrwa nou santi i kapab annan en bon lenpak ekonomik, pou sa distrik e pou pei an zeneral. Donk sa osi nou gete.

Lo sa trwazyenm pwen ou ava dir mwan tou landrwa dan Sesel i kapab annan en pake ekonomik, sa i vre.

Me selman ler nou'n fer tou sa bann kalkil lenpak ekonomik, prezan la nou gete ki bann priyorite, kote ki nou kapab entervenir pli vit. Aköz i annan bann kontrent resours.

I annan kontrent kapasite SFA i en lorganizasyon kot bann travayer i travay en kantite e nou napa sa *manpower* parler pou nou *manage* tro bokou proze.

Donk i annan bann priyorite ki ganny met an plas. Me sa i sa 3 pwen ki mon'n met devan, ki zot kapab konsidere si zot annan en proze dan zot distrik respektif. Mersi.

### **MR SPEAKER**

Mersi. Ou siplemanter Onorab Aglae.

### **HON EGBERT AGLAE**

Mersi Mr Speaker. Minis pou 50poursan dakor pou ou larepons pou dernyen kestyon. E 50poursan pa pe dakor ek ou.

Minis eski ler mon pe get sa bann lalis ki ou'n donner, sa bann distrik e bokou latansyon pe ganny donner sirtou dan nor dan les e Eden Island osi.

E nou dan was nou santi menm si nou'n deza fer bann demann i paret ki zot pa pe tann nou, zot pa pe ekout nou.

Minis sa ki mon ti ava kontan demann ou. Akoz i responsabilite mon krwar *SFA* osi pou zwe son rol ek Minister.

Si ou santi si i annan bann peser ki pa pe neserman anvi zwenn ansanm, pou zot osi *extend*.

Akoz Gouvernman i en fasilitater. Pou *extend* pou vin donn en koudmen zot osi pou vwar e ed sa kominote sa bann peser. Sa i enn Minis ki mon pe demann ou pou annan sa langazman. Mon ti'n deza demande dan sa Lasanble sirtou pour Port Glaud.

Dezyenm Minis, eski ou pe mazine ki dan en peryod menm si ou pa pou kapab donn mon en *timing* direk, petet ki bann fasilite ki ou santi ou Minister i kapab anmennen, akoz pa tou distrik ki kapab ganny nivo fasilite lo menm parey en distrik parey Cascade ki i annan en gran Kominote Peser konpare avek enn dan was, ki annan enn pli pti pa tou fasilite ki ou pou kapab anmennen.

Me i annan bann senp fasilite parey *storage facilities* en pti *outlet* li menm.

Eski zot kapab konsidere dan bann diskisyon pou get lezot distrik osi ladan, ki

kapab ganny sa bann fasilite osi. O firanmezir ankouraz sa bann peser pou zot zwen ansanm pou fer lafors e kontinyen zot profesyon ki zot pe fer? Mersi.

### **MR SPEAKER**

Mersi Onorab. Minis wi.

### **THE DESIGNATED MINISTER MR JEAN- FRANCOIS FERRARI**

Mr Speaker mon ava reponn Onorab avek sa dernyen fraz ki li menm li in servi. Ki mannyer pou ankouraz bann peser.

Mwan mon pa anvi ki Gouvernman oubyen *SFA* i ranplas *MNA* avek bann Lotorite Distrik.

Mwan mon santi ki sa i devret zot, zot bezwen fer zit bout. Fer en Lasosyasyon Peser si zot anvi led, nou annan bann *template*, nou annan bann lasosyasyon ki nou'n ed bokou nou'n ed Glacis. Nou'n ed Grand Anse Praslin.

I annan sa bann travay ki nou kapab fer pou ed zot, zot mobilize. Mobilizasyon zot bezwen fer o nivo distrik.

Ler zot in mobilize envit nou, somonn nou si fodre, nou ava vin ekout zot. Nou ava vin ekout zot nou ava gete ki zot annan pou ofer ki zot bezwen e la nou ava bouze.

Selman parey toultan mon dir linisyativ i bezwen sorti anba mont anler.

Donk sa i mon rekomandasyon e mon mazine poudir sa i semen ki ou devret pran pou Port Glau e ou ava vwar nou pou *respond according* li. Mersi.

**MR SPEAKER**

Mersi. Bon mon pou pran kestyon bann Manm ki'n met lanmen avan pou letan ki mon annan. Onorab Roucou.

**HON MICHEL ROUCOU**

Mersi Mr Speaker. Bonzour Minis, *CEO*. Minis nou Mont Fleuri enn de fwa nou'n sey nou sans pou envit *CEO* pou zwenn avek sa pti group peser dan nou distrik. Malgre ki i napa bokou, apepre 8 zot ki mouy zot bato deryer Kordgard Mont Fleuri.

E nou, nou pe envit *CEO* pou li ler i ganny en moman letan met nou en pti pe lo son lalis priyorite pou vin get nou.

E Minis Mont Fleuri li i annan sa pti group peser ki mon'n dir. E landrwa kot zot mouy zot bato la, mon mazine par deryer Kordgard Mont Fleuri i annan en devlopman ki Gouvernman pe al fer.

E sa group peser ki zot pe demande zot, zot pa pe demann bokou plis zot pe zis demann en fasilite, en stor

fasilite pou zot *store* zot bann lekipman akoz malgre ki bokou zot, zot reste sitan lwen. Mersi.

*(Interruption)*

**MR SPEAKER**

Bann Manm aret koze silvouple. Annou ekout kestyon. *Sorry* Onorab Roucou kontinyen, termin ou kestyon.

**HON MICHEL ROUCOU**

Mon'n fini demande. Mersi.

**MR SPEAKER**

Mersi *ok*. Minis.

**THE DESIGNATED MINISTER MR JEAN-FRANCOIS FERRARI**

Mersi Onorab. Wi Onorab ou konnen nou'n deza annan sa konversasyon detrwa fwa e nou ti pe regard ansanm sa posibilite la kot Kordgard Mont Fleuri.

Me *obviously* Gouvernman i annan en lot priyorite en lot bezwen pou sa lespas.

E ki mon ti ava kontan dir avek ou Onorab san dekouraz ou. Ou konnen i pou enposib pou nou fer 26 fasilite dan 26 distrik.

Nou pou toultan bezwen gete ki mannyer nou kapab partaz fasilite. E ki mannyer

nou kapab si i annan en fasilite dan en distrik i kapab benefisye en lot distrik.

Pou lemoman vi ki Victoria Mont Fleuri i form parti Victoria. Mon santi poudir nou devret kapab servi bann fasilite ki lo por lapas.

Parey bann Dede ti servi e detrwa lezot peser ankor ki'n servi sa fasilite. Alors me sa i pa vedir ki nou pa devret fer nanryen pou ou distrik. Annou sey gete, annou kekfwa konmans idantifye en lot landrwa. Akoz la nou napa landrwa. Nou ti annan nou ti krwar nou annan en landrwa la nou napa en landrwa.

So annou kontinyen gete si nou kapab idantifye en lot landrwa pou fer enn de *gear store* parey ou' dir.

Si i posib nou ava fer li. Si pa posib i annan bann travay ki pe deroule an permanans lo por lapas, e kekfwa nou kapab ler nou pe fer sa bann fasilite mazin bann peser Mont Fleuri. Mersi.

### **MR SPEAKER**

Mersi. Onorab Woodcock.

### **HON WAVEL WOODCOCK**

Mersi Mr Speaker. Mr Speaker mon profit sa lokazyon pou felisit de Pralinwa ki'n fek ganny apwente lo *National Awards Committee*.

Mr Robert Grandcourt konman *Chairman* e Mrs Gemma Jessie konman en manm lo sa Komite. Mon swet zot tou le meyer dan zot nouvo pozisyon.

Minis mersi ki ou'n konfirman ki proze pour *gear store* avek lofis in ganny finalize in ganny aprouve par *Planning*.

Mon apresye tou sa bann travay ki zot pe fer ki zot in donn bann peser Pralin.

Mon kestyon i kot i konsern sa pti bazar i annan zis en pti bout ki sipoze konmanse. Zis petet ou kapab donn mon en pti detay lenformasyon kan ki sa lot bout, pou konplet sa pti bout par deryer bazar, pou konmanse pou ganny enplimante? Mersi bokou

### **MR SPEAKER**

Mersi Onorab. Minis *CEO* ki pou reponn wi.

### **CEO NICHOL ELIZABETH**

Mersi Onorab. *I think* sa pti bout louvraz dan bout deryer sa in fini *tender out* e louvraz ti sipoze konmanse si pa lafen sa semenn lot semenn. Savedir sa louvraz pa plis ki de semenn pou *rehabilitate* donn li en pti *coating*.

Nou pe get son bann twatir osi *in case* nou bezwen

ranplase. Me selman sa i sipoze fini milye Zen pli tar. Mersi.

**MR SPEAKER**

*Thank you.* Onorab Andre.

**HON CLIFFORD ANDRE**

Mersi Mr Speaker. Mr Speaker an vi ki Minis in enform nou ki pou annan en zoli proze Anse Aux Pins dan sa zoli distrik, eski i kapab dir nou si i annan okenn retar. E si dan sa fasilite pou annan en *ice plant* ki pou deservi bann peser? Mersi.

**MR SPEAKER**

Mersi. Minis.

**THE DESIGNATED  
MINISTER MR JEAN-  
FRANCOIS FERRARI**

Mersi Onorab. Parey nou ti konstate, dan vizit ki nou ti fer *on site* Sanmdi pase avek *CEO SFA* avek bann enzenyer i annan detrwa pti lazistaz ki bezwen ganny fer.

E aköz sa bann lazistaz bezwen ganny fer, se aköz nou pe konstaman ekout bann peser. E bann peser Anse Aux Pins, mon konnen si zot pe ekout mwan la zot annan en ta lide.

Toulezour zot leve zot annan en lot lide. E zot annan en lot propozisyon pou zot fer. Donk zot vreman, zot in

montre lentere dan sa ki zot pe pase. E tanzantan zot ede avek en sizesyon.

Donk sa i fer ki tanzantan nou'n bezwen aziste en pti pe. E dan sa peryod kot napa materyo bann keksoz koumsa tousala in zwe en pti pe ladan. Me selman proze pe avans vreman byen. E nou konfyant poudir ver lafen lannen nou pou'n pratikman terminen dan sa prosen 6 mwan. Mon mazine mwan nou pou'n terminen.

E pou Nwel nou pou kapab fer en louvertir, Bondye pitye e selman nou pa pou fer li anba bazar aköz sa i en landrwa ki nou bezwen proteze.

Me mersi pou ou sipor. E mon krwar nou pou annan en bon travay. Nou pou annan *ice plant* osi ki pe ki pou premye fwa nou pou met enn Anse Aux Pins.

E sa i ava ed bokou bann peser ki depi e pe letan zot pe demann sa fasilite. Mersi.

**MR SPEAKER**

Mersi Minis. Onorab Vidot.

**HON AUDREY VIDOT**

Mersi Mr Speaker. Minis prenon kont ki Lasosyasyon Peser Roche Caiman, i enkli osi bann peser ki dan distrik Mamelles, mon pe regarde, si - Mon konnen Avril, boner Avril

nou ti zwenn avek lasosyasyon pou diskite lo bann konsern ki zot annan.

Lo bann fasilite ki manke. E sa proze ki, sa devlope kot *Eden Island* pe fer, ki pou tous zot, dan sa landrwa kot zot ete aktyel. Eski ou'n ganny okenn *feedback*, ziska la, an referans avek, bann diskisyon ki nou ti fer. Pou vwar en laklerte ki mannyer nou kapab konsider zot, ganny en *proper* fasilite?

E antretan, ki ankor annan konsern vandalizm, kot bazar *Eden Island*. Eski, *SFA*, pa kapab konsider petet pou *fence* sa landrwa, en fason ki i anpese bann aktivite vandalizm i ganny arete.

Bann dimoun ki ankor pe servi sa fasilite, la. Akoz zot ankor pe ganny bann problem. Si i annan fason pou zot adres, sa? Mersi.

### **MR SPEAKER**

Mersi Minis. Repons.

### **THE DESIGNATED MINISTER JEAN-FRANCOIS FERRARI**

Mersi, mersi Onorab. Wi, Onorab nou ti rankontre avek bann peser Roche Caiman, pa tou. Me selman ti annan, en bon reprezantasyon. E, be selman nou pa'n konklir. Ti annan, bann konsiltasyon ki nou sipoze fer. Ki mon onnetman, mon kapab dir ou

ki non. Mon pa'n ganny en nouvo, mon pa'n gannyen nouvo lenformasyon.

Me selman mon krwar ki, i enportan ki nou zwenn, tre byento. So, mon si ou pa *mind* mon a zet sa travay lo ou, mwan mon disponib. Mon *available*, de premyer lokazyon si nou kapab fer en rankont. Nou ava fer li.

Pou ou an sa ki konsern, bann modifikasyon, *fencing* oubyen bann keksoz koumsa, tou bann travay ki ganny fer, lo bazar Roche Caiman, e lo sa pti Por Roche Caiman, i bezwen ganny fer, an kolaborasyon avek *Eden Island*. I bezwen akoz, zot enn bann *partner* ladan. Zot ti lanse, zot asir en pe, par ler en pe sekirite.

Pa tro byen, me selman, en pe renovasyon, bann keksoz koumsa. So nou bezwen fer avek zot. Alors, kekfwa dan nou rankont nou ava gete si nou devret kapab, sizere ki nou fer, en *fencing* pour bazar.

Me selman i ava en diskisyon ki nou pou bezwen annan antre nou. Alors si ou, si ou pa *mind* fer fikse en dat, en zour *weekend*, nou ava rankontre, nou ava kontinyen sa dyalog. Mersi.

### **MR SPEAKER**

Mersi, wi Onorab Vidot. Klarifye.

**HON AUDREY VIDOT**

Yes, Minis Roche Caiman i touzour pare li. Problenm se ki, avek sa devloper. Son reprezantan ki bezwen donn nou *feedback*. Mon krwar ou kler lo la. So toultan nou pa ganny zot *onboard*, lasosyasyon pa pou zanmen bouze, menm si distrik i pare pou li donn sipor lasosyasyon.

**MR SPEAKER**

Ok Mersi Minis a note. Mon a pran dernyen keston lo la Onorab Adelaide.

**HON FRANCOIS ADELAIDE**

Ok Mersi Mr Speaker. Minis mwan mon keston, i lo sa bout dezyenm kriter. Baie Lazare nou annan preski tou kriter, menm nou annan lans tou. I annan distrik napa lans i annan bazar. Nou, nou annan lans.

So i en kriter ki an plis. Pou nou kapab ganny en bazar. Nou, nou'n fer mannyer nou kapab. E nou annan de *site*, *prime site*. Problenm enn se later i ankor avek Gouvernman ki nou, bezwen negosye.

E lot vi ki annan sa zafer lesanz later avek bann dimoun prive. So sa osi, i en lot opsyon ki nou kapab servi. Ki garanti ou kapab donn nou poudir nou pou vwar ou dan Baie Lazare o pli vit posibil, pou nou

kapab *sort out* sa bann *main issue*, pour nou Baie Lazare kapab ganny en *proper* bazar. Avek tou bann lenfrastruktir, enkli *gear store* ?

Akoz nou, nou'n pare, me si Gouvernman i donn nou sa pti bout sa pti lapiy, nou osi nou ava briye parey lezot distrik, ki nou zalou nou vwar zot bazar pe monte.

Me nou nou'n la, en bon pe letan nou pa ankor ganny nanryen. Mersi.

**MR SPEAKER**

Mersi, Minis wi pou Baie Lazare.

**THE DESIGNATED MINISTER JEAN-FRANCOIS FERRARI**

Wi pou Baie Lazare. Onorab, *CEO* i dir mwan i pa'n, *SFA* pa'n bliy zot. Me parey mon'n dir pli boner nou bezwen partaz nou zefor. Vi ki nou'n fer en keksoz, ki en fasilite ki tonm dan labe Baie Lazare. Mon konnen ou poudir mwan i pa Baie Lazare, i Anse La Mouche. I pa ki Anse Boileau, i Anse Boileau sa fasilite ki nou'n fer, kas lapas.

Donk ou *still* santi poudir nou pa'n fer, nou pa pe get zot Baie Lazare. Me selman nou, pe get zot. Mwan mon zis demann ou enn pti pe pasyans. Nou pe lannen prosenn, nou pou tal nou kart byen ater avek zot. Akoz mon



konnen poudir ou annan en bon kominote laba, ou annan bann dimoun ki vreman anvi devlop sa lapas.

Ou annan en bon *market*, touris i la, lotel i la. Donk, nou anvi fer en keksoz, avek ou. Me selman tenir nou ziska 2023, apre nou ava, nou a gete ki mannyer nou kapab fer keksoz.

*Sorry*, mon pa kapab dir ou plis ki sa. Mon pa anvi donn ou en lasirans, en promes ki mon pa pou kapab tenir. Selman, tenir ou. Mersi.

### **MR SPEAKER**

Mersi. Mersi Minis. Mon a pran prosen kestyon Onorab Aglae.

### **HON EGBERT AGLAE**

Mersi Mr Speaker. An vi logmantasyon dan kou lavi e kou lekkipman pour peser tel ki bann masin, bann *fishing gears*, eski Minis i kapab dir ek sa Lasanble ki plan son Minister atraver *SFA*, pou ede soulaz en pe kontrent finansyel atase ek kou loperasyon nou bann peser ki pe fer sa aktivite koman zot biznes? Mersi.

### **MR SPEAKER**

Mersi Minis ou repons.

### **THE DESIGNATED MINISTER MR JEAN- FRANCOIS FERRARI**

Mersi Mr Speaker. Mersi Onorab. Onorab premyerman, mon a koz lo sa premye faz, ki lenvestisman. Ler bann dimoun i investir dan en bato oubyen en keksoz koumsa.

Nou annan an plas bann fasilite finansyel, anba bann diferan *Scheme* spesyal. Parey *Fisheries Development Fund*, *Small Business Loan* eksetera. E pour *Fisheries Development Fund*, ou kapab akse en maksimonm R5milyon, avek en lentere selman 3poursan, en term repeyman 10an. Se bann fasilite ki nou, nou'n negosye, ki Gouvernman in negosye avek bann *funding agencies*, ek Labank Devlopman, pou fer sir ki zot ganny pli long repeyman. Par egzanp i kapab ziska 12an, pou sa bann kou lentere tre ba.

Donk pou aste en bato, pou investir dan en fasilite, nou annan sa bann fon. Lo sa ki konsern bann depans regilye, bann depans en pe toulezour, tel ki repar kannot ouswa ranplas en masin.

I annan *Small Business Financing Agency SBFA*. Zot annan en *Scheme* la, osi avek Labank Devlopman Sesel zot annan *Scheme*. Ou kapab akse en maksimonm R300mil, a en lentere 4poursan ki ou pa pou ganny dan lezot labank.

Pou bann *loan* anba R75mil, e 4.52poursan, pou

bann *loan* ant R75mil-R300mil. Mon krwar i bann, i bann *Scheme* ase enteresan. E nou kot *SFA*, nou'n fasilite bokou, negosyasyon ant bann peser ek labank.

Sa i en servis ki *SFA*, i ofer e mon remersye zot pour kapab apiy en lenvestisman, oubyen en demann ki nou, nou santi poudir i zistifye. Akoz, nou ki konn, ki'n travay bokou avek bann peser. I annan bann ki vreman serye, e nou konnen zot serye alors, nou ofer sa sipor pou dan bann negosyasyon, pou bann pti *loan*.

Be selman Onorab, mon ti a kontan dir ki pli gro lasistans ki Gouvernman i donn peser, se sa bann fasilite, ki nou met an plas dan bann por. Parey, nou'n diskite bokou, ozordi dan bann Por Lapes Victoria, kot Providence, dan bann distrik. Sa se nou pli gro led, ki nou kapab anmennen. Se la kot vre sipor, pou lendistri i vini.

Ler mon ti antre dan sa Minister an 2020. I annan peser ki ti ankor pe rode, ki zot pou fer ek zot pwason, ler zot sorti lapas, kote zot pou mete. I annan ti pe vin, ki ti pe sizere, kapab met devan mon baro oubyen devan baro *State House*.

Nou, nou'n pran kont sa bann difikilte ki bann peser i annan e nou'n, nou'n ofer zot

pou kree en marse, en *market* parey nou dir, pou zot vann zot pwason. Alors nou pe dir avek zot, profite. Nou'n ankouraz bann *processors*, pou devlope. Pou zot aste avek bann peser. Profite. Nou'n servi sa bann modern, bann fasilite modern ki nou'n met an plas, ki nou'n konstrir.

Alors annou profite. Gouvernman in konstrir landrwa, pou peser met zot masin, parey nou pe dir la bomaten, nou pe koz lo *gear store*, lo bann keksoz koumsa. Annou profite.

Byento Gouvernman pou al *allocate*, later lo *zone 20, Providence* pou ankouraz bann biznes ki fer reparasyon bato.

Akoz nou anvi vwar konpetisyon dan sa biznes. Nou anvi vwar ki bann pri i vin pli abordab, dan sa sekter. Alors tousala Onorab se bann lasistans ki, nou, nou konsider koman vreman tre enportan. Mon pa, mon pa anvi antre dan en *polemic*.

Me selman mon ti a kontan dir ki, sa Gouvernman ki la ozordi, i pa sa Gouvernman, ki pou nennenn dimoun depi A ziska Z. Depi '*cradle to the grave*', parey zot in deza tandé. Parey lontan Gouvernman ti dir. Depi ler ou'n en ziske ler ou'n mor, nou pou nennenn ou.

Nou Gouvernman Onorab, i ouver lespas, i kree loportinite, i fasilite finans ek biznes. E apre, ler nou'n fini ouver bann laport la nou dir avek nou pep leve, bouze pran sa sans. Sezi sa loportinite, travay serye pou ou sonny ou lekor e pou ou sonny ou fanmir.

Sirtou dan sa moman difisil. Kot tou keksoz, dan lemond i ser. Nou bezwen redouble zefor. Se pa Gouvernman ki bezwen, vini pou vin o sekour. Se ou. Nou mesaz se ki ou, ou bezwen sekour ou lekor, ou, ou bezwen - si ou ti pe, si ou ti pe ou pa ti pe okip ou masin, fer sir ou okip li, pli byen.

Akoz si i kase, son depans pou lour alors fer bann zefor okip ou kannot, okip ou lekipman. Fer sir ki, ou travay bokou pli dir aköz letan i dir. Alors, annou fer sir ki tou bann peser ek bann planter par egzanp osi, se nou kontinyen prodwi pou nou anmenn keksoz pou nou pei.

Finalman, dan Polisi Gouvernman lo sekter lapas, an zeneral, pa zis larzan, e konsesyon ki konte. Konsesyon i la. Larzan i la, fasilite i la. SFA i osi donn, konsey ki mannyer pou komans en biznes e osi ki mannyer pou fer valer azoute, ler zot pwason ek lezot resours lanmer i ariv ater.

Nou annan sa bann program ki nou anvi, *empower* bann dimoun. E sa pour mwan i mon misyon. E i nou misyon isi dan sa Minister Lapes e dan SFA, nou anvi fer ki bann peser i vin bann dimoun, bann vre biznesmenn ki debourye, ki *manage* zot biznes pli byen. E ki zot pa bezwen, tro bokou depan lo Gouvernman.

Gouvernman i a ganny letan pour li, fer lezot keksoz e fer e met larzan dan bann sekter ki esansyel e ki prioriter.

Alors sa i mon mesaz pou bann peser, e bann dimoun ki pe antre dan biznes lapas. Travay dir, i annan rekonpans, i annan rekonesans, ler zot fer li. Mersi.

### **MR SPEAKER**

Mersi. Ou annan siplemanter Onorab Aglae?

### **HON EGBERT AGLAE**

Minis mersi pou ou larepons, e ankor enn fwa 50poursan mon pou dakor ek ou, 50poursan mon pa pou tro dakor. Minis 2an nou'n pas dan COVID. E mon krwar larealite, se ki bokou peser nou vwar li dan serten difikilte, ekonomik.

E i annan ki bezwen, ki ti'n agrandi son *fleet bato*. I bezwen si i ti annan trwa, i

vann enn, pou kapab soutenir son bann det, ouswa si ti annan de i vann enn. Sa i enn Minis.

E lot Minis ou bezwen konpran, poudir ou kapab fer ou ta fasilite, dan distrik partou. Me si peser pa al lapas, ou fasilite pou reste *redundant*. So mon pe demann ou Minis, koman sa *Leader*, ki pe *lead* sa Minister li menm, li, pou konsider petet serten opsyon anver, bann peser ki dan difikilte.

Premyerman Minis sa ki'n komanse, in ganny son *loan* ek *DBS*, zot pou - Me avek letan zot ganny problemm.

Premyerman *issue* masin Minis. En masin ozordi, *subject to availability* i kout environ. Parey en masin 150, environ R350mil ou bezwen peye Minis. Eski ler peser li prezan, in annan - in ganny en problemm. Akoz ozordi ou bezwen al pli lwen, *so long hours*, plis *fuel*. Masin i pli rente, ou pou ganny *higher maintenance*.

Eski ler sa peser li ler son bato i ganny problemm masin, i pou bezwen asiz en kantite letan. Akoz ler i apros sa bann lenstitisyon finansyel ou'n nonm *DBS*, *SBFA*, pour li kapab ganny kredi, pou li kapab aste en lot masin, i pran en kantite, parey ou pe dir Minis, revwar en larout enn pti pe pli kourt.

Ki sa bann peser pa asiz lontan. Akoz zot annan fanmir, zot annan *loan* pou peye, pou zot kapab tourn ver zot lapas get kote. Sa i enn. Dezyenmman Minis. Peser pe demande, ki *at least* nou pa pe vin demann zot pou donner parey ou'n fer resorti ou *cradle to the grave*.

### **MR SPEAKER**

Onorab pa antre dan tro largiman. Al lo kestyon.

### **HON EGBERT AGLAE**

Me selman eski Minis, zot ava konsider petet, donn bann ekstansyon, bann repeyman ki zot kapab, ler zot vwar serten peser i dan difikilte? Sa bann letan ki li, i deza annan *existing loan*. Me ou donn li ankor en ekstansyon, pour li kapab re espire. Mersi.

### **MR SPEAKER**

Minis nou al kestyon silvouple.

### **THE DESIGNATED MINISTER MR JEAN-FRANCOIS FERRARI**

Wi. Ou dernyen pwen Onorab. Definitivman nou fer li, nou fer li e nou, nou entervenir lo lapar bann peser, pou nou gete avek zot bann labank, notaman bann kot ki pe *manage* bann Fon Piblik - *DBS* pou nou, retard, pou nou reget en pe zot peyman. Akoz, si zot

in vin dan difikilte. Si i annan bann, rezon zistifye napa, problemm. Nou, nou pare pou nou ed tou dimoun.

Me selman sa ki mon ti a kontan - sa ki mon ti a kontan dir ou se ki, pli gran led ki nou'n fer pou bann peser, se ler nou ti reouver lekonomi. Napa peser ki vin kot mwan, ozordi poudir mwan i dan problemm.

Akoz nou'n ouver sa *market*, peser pe vann zot pwason ozordi. Zot pe debourye, zot pe pey zot *loan*, laplipar zot, i annan enn de ki annan difikilte. Me zot pe avanse zot, aköz nou'n kapab ouver lekonomi, lekonomi pe grandi. E sa deza i en bon keksoz. Donk nou - mon repet ankor.

Nou lobzektif se pa pou nou, tyonbo lanmen dimoun ki'n pou anmenn zot ziske ler zot mor. Nou lobzektif se pou larg lanmen sa dimoun. Pou donn li sa posibilite, pou ofer li sa sans pou li ganny, en *loan*, pou li kapab ganny landrwa pou li vann son pwason.

Pour li kapab devlop son biznes, e apre les li ale. Les li ale, les li fer son travay li. Si demen i ganny en problemm i retourn kot nou. Nou gete ki mannyer nou kapab entervenir avek bann labank.

Donk se sa nou filozofi. E, e se sa ki pe permet ki ozordi, laplipar bann peser se

bann, se bann dimoun ki pe travay byen. Ki pe, ki pe pey zot *loan*, byen. E bann ki pa pe peye, nou gete aköz e nou pran bann mezir apropiye.

Donk lentere i la. Me selman, lentere i plito dan en sans ki nou bezwen ankouraz dimoun pou debout lo zot prop lipye zot menm. Mersi.

### **MR SPEAKER**

Mersi mon a pran dernyen kestyon Onorab Esparon, vitman silvouple.

### **HON REGINA ESPARON**

Mersi Mr Speaker. Mr Speaker, mon ti anvi demann avek Minis. *Indian Ocean Marine*, ti ganny *set up* an partenarya avek *SFA*. Pou fer ki, i fer *available* bann lekipman pou ed bann peser, lekipman pou masin, pou bann lanmson, bann zafer bann peser.

Eski ou Minister i satisfé ki *Indian Ocean Marine*, pe deservi sa manda pou ki i ti ganny *setup*? E dezyenmman Minis, mon ti ava kontan demann ou. Dan sa transformasyon, ki sa nouvo Gouvernman pe fer, eski zot pe mazine ki petet dan bann fasilite ki zot pe met, an plas dan bann distrik, zot kapab osi fer *available* en landrwa, bann pti landrwa kantmenm lo nivo rezyon.

Kot bann peser i kapab ganny bann *gear facilities*, konmsi bann *fishing gears*, dan distrik oubyen lo nivo rezyon. En pe parey Bel Ombre, zot annan bann - en laboutik, kot konmsi kot peser, kapab aste son lanmson, son bann zafer pou lapès olye ki deplase pou bezwen vin anvil. Mersi.

### **MR SPEAKER**

Mersi Minis oubyen *CEO*. Adres sa de pwen vitman silvouple.

### **THE DESIGNATED MINISTER MR JEAN-FRANCOIS FERRARI**

Wi zis pou lo *Indian Ocean Marine*, mon ti napa sa. Mon pa ti konnen si sa kestyon pou monte. Me mon krwar *CEO*, i annan en lide, i ava dir zot.

Onorab kekfwa pou Praslin - si napa selman mon krwar i annan en *gear shop* Cote D'Or mon krwar, non? Nou ti a kontan ankouraze. Me Selman nou ti a kontan ankouraz prive. Nou anvi vwar pli sa bann aktivite.

Akoz i vre, i annan serten landrwa keksoz i ser, e plis konpetisyon i kapab anmenn pli bon pri pou bann pou bann dimoun.

Alors, annou pas mesaz avek dimoun, avek bann biznesmenn, en dimoun ki anvi komans en biznes, enn

pti biznes kekfwa, pour li antre dan sa sekter. Annou ankouraz li, e mwan mon pa pou ankouraz Gouvernman pou antre ladan. Me selman, mon pou ankouraz Gouvernman, pou ofer fasilite.

Si i annan en lespas, oubyen si annan, si en dimoun pe rod finansman. Anba bann *Blue Economy Funds* i annan sa bann posibilite, Kot ou ganny finansman, pou ou devlop bann sekter ki an sipor avek lapès. Donk dan sa direksyon napa problem.

### **MR SPEAKER**

*CEO* ou lo *Indian Ocean Marine*, please.

### **CEO NICHOL ELIZABETH**

Mersi Minis, mersi Onorab. Lo *Indian Ocean Marine*, kekfwa nou kapab dir poudir, *the original setup*, se sa nide oparavan. Be selman apre, in *privatized*, e *SFA* i annan en *dormant share* ladan. 5poursan *shares* dan *Indian Ocean Marine*.

Be selman nou, sa pratik, pou fer tonbe keksoz pou fer lapès pou nou bann peser, sa konsepsyon in disparet. I totalman prive pou lemoman. E nou pe gete menm si nou 5poursan, *shares*, nou pou kapab retire dan sa lorganizasyon.

Me selman nou a vin avek ou, plis detay si ou anvi Onorab.

**MR SPEAKER**

Mersi, bon nou a termin sesyon kestryon la. E nou a rebran travay 2er. Minis ek CEO, mersi pou zot partisipasyon. E mon swet zot bonn kontinyasyon. Nou a pran poz.

**(BREAK)**

**MR SPEAKER**

Bonn apre midi, tou Manm, *staff* e piblik. Nou komans avek enn pti retar, akoz nou *staff* ti'n ganny pri dan travay komite. Me nou'n pare pou komanse. Mon a demann, nou pou annan en *Statement Minis*. Mon a demann madanm raporter pou apel Minis, Devika Vidot silvouple.

Bon bonn apre midi Minis Devika Vidot, Minis pou Lenvestisman Lantreprenarya e Lendistri. E avek Minis nou annan Mrs Murline Lebon *Chairperson Board 2020 Development (Seychelles) Ltd*. E Minis i avek nou pou prezant rapor ki'n ganny soumet par *Board 2020 Development (Seychelles) Ltd*. Minis ou annan laparol.

**MINISTER DEVIKA VIDOT**

Mersi Mr Speaker. Bonn apre midi Mr Speaker. Bonn apre midi tou bann Manm Onorab. Mr Speaker mon pou zis donn enn pti somer lo rapor ki *Board 2020 Development*, in soumet avek mon lofis. E avek *Cabinet of Ministers*.

*2020 Development (Seychelles) Ltd* ti ganny kree an 2012, pou zer devlopman lenfrastruktir lo Ile Soleil. Zot ti pou vann later rezidansyel, ek komersyal. E larzan ki ti pou anmase, ti pou fer bann devlopman lenfrastruktir. Tel ki semen, pon e sistenm tretman desarz.

Pandan sa bann dernyen lannen in annan pa mal lensertitid, lo lafason ki keksoz ti pe ganny zere dan sa lakonpanyen. E pou nou koman sa nouvo Gouvernman, sa ti en size ki ti vremen konsern nou.

Apre ki nouvo *Board* ti ganny apwente an Out 2021 par Prezidan Ramkalawan. Plizyer travay in ganny fer, pou etabli, e konpran vremen ki ti pase dan 2020. Sa prosis ti ganny siporte, par en rapor donnen par PEMC lo lafason, ki ti fer resorti defayans dan lakonpanyen.

Donk, *Board* ti vwar li neser, pou zwenn tre souvan pou pli byen konpran sityasyon. Parmi louvraz ki ti ganny fer, ti konpri

konsiltasyon avek plizyer endividi e lazans konsernen.

In annan menm en vizit ki ti ganny fer par Prezidan kot tou bann Lazans konsernen, ti ganny regroupe pou ede dan sa travay.

Tou resaman *Board* in soumet en rapor ki donn plis detay lo pozisyon sa lakonpanyen, e plizyer sityasyon pertinan ki zot in apersewar.

Pou komanse Mr Speaker, i enpotan ou fer resorti, ki 2020 i ganny anrezistre anba *Companies Act 1972*, kot Gouvernman i annan 100poursan par. Malgre sa i ti aparan ki sa lakonpanyen, pa ti pe neserman swiv bann Lalwa ki normalman govern, bann antite Gouvernman par egzantp *Procurement Act*, prosedir *PEMC*, ensi byen ki serten lobligasyon *tax*. Fodre osi fer resorti, ki letan nouvo *Board* ti ganny apwente, tou later ti'n fini ganny fer alokasyon, e lakonpanyen pa ti pe anvizaze, resewar okenn reveni. Me depans zot ti pe kontinyen akimile. Ti kler alor, ki lakonpanyen pa ti pou kapab soutenir bann depans. Alor fas avek sa realite, nouvo *Board* ti vwar li neser pour kennsel laplipar kontra lo Ile Soleil.

Sa ti enkli kontra *landscaping*, sekirite e osi

byen bann konsiltan ki ti'n ganny apwente, depi komansman bann proze. Valer sa bann kontra e lezot depans ti ariv plis ki R200mil par mwan.

Me parkont reveni, ti 0. I enportan fer resorti ki, 2020 pa ti pe anmas okenn kontribisyon avek bann rezidan pou sa bann depans. E tousala ti pe ganny finanse, par lakonpanyen.

Par egzantp koneksyon o sistenm tretman desarz. E sekirite lo zil ti gratwit pou bann zabitan. Sa i kontrerman avek bann lezot *estate*, parey *Eden Island* kot bann rezidan i kontribye tou le mwan pou ganny sa bann servis.

Mr Speaker dan son rapor nouvo *Board* in etabli ki ti paret annan bokou iregilate dan bann tranzaksyon. Sa i enkli konfli lentere dan bann tranzaksyon later kot serten endividi in benefisye gro bout later. Menm pandan letan ki zot ti pe travay pou lakonpanyen. Serten endividi ki'n ganny posibilite, annan lentere dan plizyer morso later, konpromi ki'n ganny fer lo standar serten lenfrastruktir lo zil.

Ki vedir ki Gouvernman pou bezwen retrouv fon neser pou repar domaz a lonterm. Diferan to ki'n ganny aplike, ler pou vann later ki pa



ti neserman konsistan e ekitab.

Mr Speaker pli enkyetan sete bann desizyon ki ti'n ganny pran san konesans e lotorizasyon Gouvernman aktyel.

Par egzanp an Me 2021, kontra ti ganny fer avek en O Zofisye 2020, san swiv prosedir ki'n ganny etabli anba Lalwa, *PEMC*. Plis ki sa, pa bokou letan pli tar, en konpromi ti ganny fer atraver en Lagreman avek en antite pou balans en serten swadizan det, pou en lavalier plis ki R30milyon.

Sa rapor in osi fer sorti, ki mannyer *Management* ti pe zer larzan lakonpanyen, pa ti neserman dan en fason responsab.

Par egzanp in annan servis ki'n ganny peye an plis, menm ki sa servis ti'n deza ganny kouber anba en sel kontra. Serten fon ki ti'n ganny transfer par Minister Finans pou fer, bann travay lo zil. 2an pli tar loubraz pa ti ankor ganny konplete, me parkont larzan ti'n fini ganny depanse.

E ozordi, lakonpanyen i vwar li dan en sityasyon, kot i drwa larzan kontrakter e lezot lazans pou bann travay.

Mr Speaker rapor i osi soulev enn de tranzaksyon later ki'n fer lakonpanyen akimil plis det.

O kour sa bann dernyen mwan, bokou dimoun in met zot plent avek *Board*, pou bann det ki lakonpanyen i sipoze, dwa zot. E pou plizyer lannen deza. Par egzanp serten ki'n rann later, me ki pa ankor rann zot larzan. Malgre ki sa bann later in fini ganny revann. Lazans Gouvernman ki'n pey later, me ki pa'n ganny alokasyon.

E dapre rapor sa menm later in ganny revann avek lezot dimoun san konesans sa Lazans. Larzan ki serten, etranze in swadizan peye pou konble, osi byen ki benefisye avek bout later avan menm ki sa endividi in pas prosedir sanksyon.

Bann plent sorti kot serten zabitan, konmkwa ki zot propriyete, in ganny andomaze atraver bann konstriksyon lo zil. Pou terminen mon le fer resorti ki lakonpanyen atraver sa bann move konportman, in ozordi vwar li, ranpli avek det.

Dernyen sif akimilasyon bann det sa lakonpanyen i anviron R110milyon e sa i kapab ariv plis, baze lo bann plent ki pe ganny resevwar. Oditer ki'n ganny apwente pou odit lakonpanyen pou 2021, pe fer le neser pou determin sa sonm egzakt.

Avek lafason ki keksoz pe ale, *Board* in vwar li neser pou fer rekomandasyon pou ki

bann lenfrastruktir i transfer anba bann Lazans konsernen. Tel ki *LWMA*, *SLTA*, *PUC* o pli vit posib. Pour ki bann rezidan i kontinyen benefisye avek sa bann servis.

*Board* in osi fer rekomandasyon, e Gouvernman in aprouve pou refer dosye 2020, avek bann lezot Lazans konsernen, Pour ki plis lenvestigasyon i kapab ganny fer. Mersi.

**MR SPEAKER**

Mersi Minis. Mon a fer bann Manm rapel ki *statement* Minis i pa lokazyon, pou en deba. Me kestyon i permet. Pou pa monopoliz letan mon a met de kestyon, par entervenans, par Manm ki le demande.

Onorab Pillay mon'n tann ou dir keksoz, mon pa'n konpran ki ou'n dir. Ki ou pe-? Eski ou pe - *yes*.

**HON SEBASTIEN PILLAY**

*Committee Stage* avan Mr Speaker.

**MR SPEAKER**

*Committee Stage* -wi. *Hold-on*, Minis eski madanm Lebon, pou partisip dan reponn kestyon? Wi si i pou partisip dan larepons kestyon, *Committee Stage* avan ki nou kontinyen. Mersi. Mersi Onorab Georges ou'n lev lanmen.

**HON BERNARD GEORGES**

Yes, Mr Speaker. Mon ti pou, mon ti pe lev lanmen pou mwan *move* en Mosyon ki nou pas dan *Committee Stage*. Mersi.

**MR SPEAKER**

Me. *Go ahead*. I a ganny segonde.

**HON BERNARD GEORGES**

Mr Speaker anba *Order 38(2)*, mon *move* ki etandonnen ki, en dimoun apard ki Minis i riske pran laparol dan sa sesyon kestyon, ki Lasanble i konstitye son lekor dan en komite. Mersi.

**MR SPEAKER**

Mon a ganny segonde. Onorab Arissol.

**HON SANDY ARISSOL**

Mersi Mr Speaker. Bonn apre midi Minis avek madanm Lebon, tou Manm, ki pe ekoute. Mr Speaker Mosyon i ganny segonde. Mersi.

**MR SPEAKER**

Nou a ganny vot lo Mosyon silvouple, Manm ki an faver, lev lanmen? Mersi, Manm ki kont? Vot lo Mosyon pou pas lo *Committee Stage*, lo *statement* i ganny 18 vot pour 0 kont e 9 abstansyon. Alor nou a pas dan *Committee Stage*. Mersi, *Sergeant*.

*Sorry*, wi 7 abstansyon. Wi mersi. Eskize si mon'n mal mansyonn sa sif. Tre byen mon komans avek Onorab Esparon. Atann en pti moman Onorab Esparon, les mwan pran en pe non avan.

Tenir lanmen silvouple. Byen permet mwan repas lo mon lalis, zis pou fer sir. Mon annan komans *clockwise*, Onorab Pillay, Onorab Lemiel, Aglae, Loze, Bastienne, Romain, Mondon, Larue, Woodcock, Roucou, Labrosse, Monthy, Esparon, William, Henrie, Arissol, Onorab Porice, wi Onorab Porice i la.

*Ok* mon'n ganny, Onorab Samynadin, mon azout ou non? E Onorab Adelaide osi, byen bon be mon pa'n kapab tenir lord dan ki zot in lev lanmen.

Alor zot a permet mwan, sa diskresyon lekel Manm ki pou apele. Mon a komans avek madanm Esparon selman akoz in ti'n lev lanmen premye, lontan.

### **HON REGINA ESPARON**

Mersi Mr Chairman. Bonn apre midi Minis ek ou, ek madanm Lebon. Mr Chairman mon ti ava anv demann avek Minis, eski dan sa rapor ki'n ganny soumet ek Gouvernman, oubyen sa travay ki'n ganny fer pou pli byen konpran ki'n arive ek sa proze 2020, ou satisfè ki

*tender process*, ti ganny fer *rightfully* byen?

E ki bann iregalite mazer dan bann prose, si ou pa pe satisfè, ki ou'n dekouver? E eski dan bann dimoun ki'n benefisyè, ek en morso later lo Ile Soleil, i annan ki ti annan sa lyen direk ek ansyen Manm *board* ou konsiltan? Mersi.

### **MR SPEAKER**

Mersi Onorab. *Panel*, Minis.

### **MINISTER DEVIKA VIDOT**

Mersi Mr Chair. Mersi Onorab pou ou kestyon. Mon pou pran dezyenm parti ou kestyon premye. Larepons se wi, an sa ki konsern *tender process*. Bon ti annan en prosedir *tender* ki ti, ganny fer pour serten bann later, i annan prosedir *tender* ki'n ganny fer. E la petet mon ava al direk lo sa bout spesifik.

Pou en pli gro porsyon later lo Ile Soleil, ti annan en prosedir *tender* ki ti ganny fer. Me malerezman dapre rapor, ki ti ganny - Dapre lenformasyon, ki nou'n kapab gannnen, ti napa person ki ti ganny selekte pour ganny alokasyon sa later.

E bann dimoun ki ti'n enterese, zot rezon ki zot ti'n donneren ti baze lo lefe ki, sa morso later ti'n ganny divize komansman ant de morso. Savedir ti annan en morso, ki ti pour vize ver en proze pou touris. E lot morso sipoze vize,

pour *light industrial*, endistriyel.

E sa bann dimoun ki ti enterese, pa ti neseserman satisfè avèk sa laranzman akòz pou zot pou met en proze tourizman o bor endistriyel, i pa ti pou en keksoz ki ti pou fezab. An plis ki sa, sa dele letan ki sa *lease* ti pou dire.

Savedir dirasyon sa *lease* ki ti pe ganny propoze, ti bokou mwens. Savedir ti anviron 30an ou swa 40an. E zot pa ti santi poudir sa ti ase letan pou ki si zot fer zot lenvestisman zot ti pou kapab rekouver zot kou.

Malerezman letan avèk tou sa bann kontestasyon letan later ti ganny fer alokasyon avèk sa dimoun ki ti annan lyen direk avèk lakonpanyen, sa bann kondisyon ti ganny aranze. Vedir later ti nepli an de morso, ti'n vin zis enn.

E an plis ki sa, dirasyon sa *lease*, ti sorti 30-40an e ti ogmant bokou plis. E alors sa ti fer li ki bann kondisyon en pe pli favorab. E alor si ou pou demann mwan si mon satisfè, ki *tender* ti ganny fer? Ditou pa parske letan ou kondisyon ti'n ganny revwar, zot ti merit al ankor enn fwa regarde, si i annan bann dimoun ki enterese, baze lo zot premye legzersis ki zot ti'n fer. Mersi.

**MR SPEAKER**

Mersi. Ou le en klarifikasyon lo ou kestyon Onorab? Wi *ok*.

**HON REGINA ESPARON**

Mersi Mr Speaker. Minis pe dir sa gro morso later la, petet, donn en apersi ki groser, ki son sipèfisi sa bout gro morso ki ou pe koz lo la? Mersi Mr Speaker.

**MR SPEAKER**

*Thank you*. Minis. Klarifye.

**MINISTER DEVIKA VIDOT**

Onorab i anviron 38mil met kare. Mersi.

**MR SPEAKER**

*Thank you*. Wi, wi Onorab Labrosse mon ti'n nonm ou.

**HON RICHARD LABROSSE**

Mersi Mr Speaker. Bonn apre midi Mr Speaker, tou koleg prezan. Bonn apre midi Minis. Minis ler mon'n ekout tou sa bann *mismanagement* ki'n arive avèk sa proze li menm, mon santi ki byensir, i annan en pe, en pe larzan *tax payers money*.

Byensir la bann dimoun Plaisance osi pou la santi sa. Kot ki Gouvernman pou bezwen met ladan pou kouver en pe depans. So kestyon ki bokou dimoun pe demande mon asire la deor, ki travay la ki Gouvernman pe fer pou nou kapab ranmas en pe sa bann larzan manke. Ki mon pe gete,

pou zot kapab menm pey sa bann det ki'n kit deryer avek zot?

E apre Minis en keksoz ki mon pa'n *pick up*, ler ou'n donn ou prezantasyon lo sa ansyen *Board* li menm, konbyen zot ti annan, e si ti posib si ou ti kapab fer nou konnen lekel zot? Mersi.

### **MR SPEAKER**

Mersi. Minis repons.

### **MINISTER DEVIKA VIDOT**

Mersi Mr Chair. Mersi Onorab, pou ou bann kestyon. Byensir travay ki Gouvernman pe fer se zisteman, nou'n fini komans fer li depi letan nou'n komans regard dan bann zafer, 2020, bokou travay in al dan fouy dan bann dokiman, fer bann konsiltasyon, fer bann miting avek bann dimoun ki konsernen. Pou nou zisteman kapab ganny en pe plis leklersisman lo kwa egzaktaman ki'n arive.

E la ki *next step* ki nou pou fer se pran lenformasyon ki nou'n anmase, e remet li avek bann Lotorite konsernen, pou zot kapab avek zot ekspertiz, pou zot kapab fer plis lenvestigasyon ladan.

An se moman, pou re-pey bann det sa i en keksoz ki vreman trakas nou. E i annan serten endividi, ki zot in decide

pou zot retourn later - bann later ki zot ti'n aste.

E alor si *Board* i kapab vwar posibilite pou revann sa bann later, pou nou kapab anmas en pe larzan. Sa i ava ede pou nou kapab deservi en pe sa det. Me selman tousala i ankor an diskisyon. Sa i bann, desizyon ki pou bezwen ganny pran baze lo ki lenformasyon ki nou pou kontinyen ganny anmase. Parey mon'n eksplik ou, zour an zour i annan bann nouvo plent ki ganny met devan.

Dezyenm parti ou kestyon, an sa ki konsern *Board*. Ti sa ansyen *Board* ti konpri trwa dimoun. E ou'n demann mwan pou nonm sa, bann dimoun lo sa *Board*.

Sa i ti Mrs Sabrina Agathine, Mr Yves Choppy e Mr Barry Faure. Mersi.

### **MR SPEAKER**

Mersi. Bon mon a ekout kestyon Onorab Porice.

### **HON DOYACE PORICE**

Mersi Mr Chair. Bonn apre midi Mr Chair. Bonn apre midi Minis avek madanm Lebon. E osi bonn apre midi mon bann koleg *MNAs*. Minis mon rapel, sa letan, kot ti annan en *Expo* lo proze 2020.

E tou dimoun ki ti vin gete ti kapab *apply* en bout sa morso later. Swa pou biznes, swa pou rezidansyel. Eski, sa

lalis i ankor la? E konbyen ki'n ganny aksepte pou en morso later? Mersi.

**MR SPEAKER**

Mersi Onorab. Minis.

**MINISTER DEVIKA VIDOT**

Mersi Mr Chair. Mersi Onorab, pou bann kestyon. Lalis dimoun ki ti vini sa bann letan, pour letan *Expo* ti pe ganny fer, sa mon pou napa sa lenformasyon. Mon pa asire osi si nou pou kapab, vwar sa lenformasyon. Petet bann Lazans konsernen letan pe fer son plis, pe fouy plis an detay, i a kapab donn en lendikasyon lo la.

Parkont nou annan en lalis an se moman bann dimoun ki annan later la an se moman lo Zil Soleil. Sa i en lalis ki nou annan. Mersi.

**MR SPEAKER**

Mersi. Mon a pran kestyon Onorab Loze.

**HON JOHAN LOZE**

Mersi Mr Speaker. Mr Speaker mon zis anvè demann Minis. Si i kapab *provide* Lasanble avèk detay lo sa det 110milyon ki Minis in dir lakonpanyen i dwa. Ki kontra spesifikman, e lekel bann kontrakter?

Apre mon le demann Minis, si i asire e i donn Lasanble en lasirans, *comme* kwa ki sa later la, sa *lease* pa

ti ganny *retendered, through SIB*. Apre ki sa kontra, ti'n aranze, si i asire ki sa ki'n dir la, i korek?

E apre, eski domaz, Minis in nonm domaz, lakaz bann zabitan. Lakonpanyen pa'n fer sa dan kontra avèk kontrakter ki'n fer proze. Akoz i vre Minis pou annan en rezon la.

Si lakonpanyen pa'n met sa zafer domaz, lo *piling* avèk sa lakonpanyen ki'n fer sa proze. Mersi Mr Speaker.

**MR SPEAKER**

Mersi Onorab. Minis repons.

**MINISTER DEVIKA VIDOT**

Mersi Mr Chair. Mon zis anvè en pti klarifikasyon, lo sa dernyen kestyon silvouple? Avan mon reponn.

**MR SPEAKER**

Mersi. Wi.

**HON JOHAN LOZE**

Minis dan son lalis, keksoz ki in dir in *go wrong*. In nonm bann lakaz ki'n ganny andomaze *through works*. Be lakonpanyen la *SIB*, eski i pa ti *covered* avèk kontrakter, sa ki kapab annan domaz lo propriyete dimoun.

Akoz si, *this is gross neglect* si zot pa'n fer. Be si, i kouver *between SIB* ek son kontrakter, *why is this coming*

*up before the Assembly?* Mersi Mr Speaker.

**MR SPEAKER**

Mersi Onorab. Minis.

**MINISTER DEVIKA VIDOT**

Mersi. Mersi Mr Chair. Mon krwar ou ti pe *mean 2020*, pa *SIB*. Akoz ou'n fer referans avek *SIB* dan ou dernyen kestyon. Bon mon pou abord ou premye kestyon. Mon zis le fer resorti poudir travay pe ganny fer par oditer, pou etabli egzakt bann sonm, dan sa bann plent.

Me selman mon a vitman esey pas lo lalis bann *liabilities*. Tout a prenon kont ki, nou bezwen ganny sa, verifye par profesyonnel. E sa se en oditer. So nou annan par egzantp. *SLTA*, ki lakonpanyen i dwa pou fer *asphalting*. Ki sa ti sipoze en larzan ki ti'n fini ganny remet avek lakonpanyen.

Me selman zanmen louveraz in ganny fer. Egalman i annan sa lakonpanyen konstriksyon, ki ti pou fer sa louveraz. Li osi i pa ankor ganny peye dapre rapor, dapre plent ki pe fer. I annan konsiltan, enzenyer ki dapre rapor, dapre *\*Klints* li osi, i pa ankor ganny peye en serten sonm larzan.

I annan de dimoun ki zot in rann later. E zot, zot pou bezwen ganny peye zot larzan.

I annan en *monsieur* etranze ki li in swadizan peye pou li ganny *reclamation rights*. E osi lentere dan later. Li osi in fer plent poudir in donn larzan.

I annan *Seychelles Revenue Commission*, ki dan de odit ki zot in fer. Zot in fer en odit i annan de faz, i e sa i ankor pe kontinyen. *So far* i annan anviron dan R400mil ki pa'n peye an sa ki konsern *liabilities* pou *tax*. I annan en pe *rent* osi ki pa ti ankor ganny fini peye, e i annan later ki i ti'n ganny vann ki pa ankor ganny peye avek *Lazans Gouvernman*.

Savedir larzan i ganny resevwar, me selman later pa'n ganny fer alokasyon. So sa i en *breakdown* enn pti pe bann *liabilities*, e sa i bann plent ki sa bann dimoun in met devan.

Eski mon asire, si sa *parcel* pa ti ganny *tender*?

Dapre rapor ki resorti sorti kot *PEMC* dapre diskisyon ki nou'n fer avek bann dimoun ki konsernen. Sa ki nou'n kapab konstate ki se *tender* ti ganny fer en fwa. Si ti ganny fer dezyenm fwa, sa nou pa ankor kapab etabli. E alor ti annan.

Selman zefor ki zot ti fer atraver *SIB*, ti annan laranzman pou fer avertisman pou ganny dimoun. Me dapre rapor, personn dapre zot pa ti vin devan. Me letan, ou koz

avek bann dimoun ki ti enterese depi o debi. Zot konfirman poudir zot pa'n zanmen ganny kontakte, apre sa.

Savedir i posib ki, si zot ti fer en *tender*. I swa i ti enn *selective*, ti prive ki bann dimoun ki ti okouran o debi. Zot, zot pa'n ganny met okouran lo sa dezyenm.

Domaz an sa ki konsern lakaz. Bon sa i en size ki, nou ankor pe diskite, nou ankor pe vwar parski i annan bann plent ki'n vini. Parey ou pe dir Onorab, kontrakter ti sipoze dan en letan normal zot sipoze pe met sa, pe enkorpor sa dan zot dan zot Kontra.

Me konversasyon ki nou'n gannyen avek kontrakter i dir poudir, i annan serten laranzman, ki ti ganny fer. E alor mwan mon pa la pou mwan kapab donn, en sertifikasyon, desizyon lo kwa ki ti byen, kwa ki ti mal sa bann letan.

Me sityasyon ozordi, i tel ekel e nou bezwen prezan sey rod fason pou nou kapab bouz devan. Mersi.

### **MR SPEAKER**

Wi Onorab Loze. Klarifikasyon lo ou kestyon.

### **HON JOHAN LOZE**

Mr Speaker mon annan en klarifikasyon mon le ganny kler la. Minis, i dir i pa konnen

si i ti en *private tender*. En *private offering*. Kan mannyer *SIB*, i fer *private offering*? Non, mon konnen 2020. Be 2020, ti lans sa...

### **MR SPEAKER**

Les Minis reponn.

### **HON JOHAN LOZE**

Ti ganny *retendered through SIB*. E *SIB* ti mont ek sa *Bruxelles* i ti al *avek Hong Kong*, ti dan Nasyon. Mon'n viv Sesel tou sa letan, mon rapel byen mwan. So ki mannyer *SIB* in fer li ler sa in ganny *retendered en private offering*. I bezwen annan, 2020 in bezwen pey *SIB* pou fer sa, non?

En lakonpanyen prive pa kapab *go to SIB as friends*. I bezwen annan rikord. Zot bezwen vwar en keksoz. So mon pa pe konpran, ki mannyer en Minis la, enn in prononse ki sa pa'n ganny *retendered*. Letan mon reponn li kestyon Minis i dir petet ti en *private offering*. I - mon pa konpran la ou, Minis.

### **MR SPEAKER**

Byen. Minis a reponn, klarifye silvouple Minis, ki pozisyon.

### **MINISTER DEVIKA VIDOT**

Mersi Mr Chair. Mr Chair mon napa lenformasyon, mon napa lenformasyon ki sa ti ganny *retendered, ok?* Mwan mon



napa lenformasyon ki sa ti ganny *retendered* avertisman korperasyon ki'n ganny fer atraver *SIB*, sa i definitivman en keksoz ki nou'n ganny lenformasyon lo la. Me selman ki dirasyon, ki peryod.

Me selman sa ki enteresan se ki, malgre tou sa lavertisman ki swadizan Onorab pe dir ti annan, finalman sete en dimoun ki ti form parti *Management* ki'n *endup* ganny sa later. Mersi.

**MR SPEAKER**

Mersi Minis. Mon a pran keston Onorab Samynadin.

**HON KELLY SAMYNADIN**

Mersi Mr Speaker. Bonn apre midi Minis ek ou delegasyon. Minis mon ti a kontan konnen, lekel sa lakonpanyen sekirite, ki ti annan kontra pour *operate* lo Ile Soleil.

Akoz ki en servis sekirite, ti an nesosite? E konbyen in kout pei pou pey sa lakonpanyen? Mersi.

**MR SPEAKER**

Mersi. Minis, repons. Madanm Lebon, i a reponn wi.

**CHAIRPERSON MURLINE LEBON**

Ok. Mersi Mr Chair, mersi Onorab. Sa lakonpanyen sekirite ti pou en Mr Mondon. E i ti pe kout, R40,500 tou le mwan son kontra.

**MR SPEAKER**

Yes, klarifikasyon Onorab Samynadin.

**CHAIRPERSON MURLINE LEBON**

Pa'n tande. *Ok sorry*. Mersi Mr Chair. Non sa lakonpanyen sekirite ti pou en Mr Mondon. E son kontra ti pou en lavalè R40,500 par mwan. E *basically* sekirite, ti pandan lazournen e apre de fwa par semenn, zot ti fer de trwa erdtan aswar.

**MR SPEAKER**

Wi Onorab Samynadin. Ou?

**HON KELLY SAMYNADIN**

Eski i pou posib, pou nou konnen sa Mr Mondon. Eski i pou posib pou nou konn son non. Silvouple. Mersi.

**MR SPEAKER**

*Thank you*.

**CHAIRPERSON MURLINE LEBON**

*Well*, mon pou napa son non-la. Me selman nou kapab fer zot gannyen. *The proper name of the*, mon pa rapel over, konmsi *on top of my head*.

**MR SPEAKER**

Byen. Mersi, nou ava al kot Onorab Michel Roucou.

**HON MICHEL ROUCOU**

Mersi Mr Speaker. Bonn apre midi Minis, madanm. Minis si ou kapab dir nou, i annan sa kontra, ki ou'n nonmen ki ti sinyen. San Gouvernman konnen an 2020, si ou kapab dir nou, eski sa kontra anvi ki Gouvernman pa'n okouran, lo la, ki'n pas atraver Gouvernman.

Eski i en kontra, ki ou kapab dir i ilegal li menm li? E lekel sa O Zofisye, ki ti siny sa kontra, ki sa kontra ti pou li? Mersi.

**MR SPEAKER**

Mersi Onorab. Minis.

**MINISTER DEVIKA VIDOT**

Ok, Mersi Mr Chair. Wi, bon sa kontra ti ganny sinyen san konesans Gouvernman. E letan nouvo *Board* ti pran, letan nouvo *Board* ti pran, zot pran lofis. E se la ki atraver bann kestyon, ensidswit ki nou ti ganny plis lenformasyon lo la.

Si sa kontra i ilegal, sa i en keksoz ki bann Lotorite konsernen letan zot fer zot lenvestigasyon. Zot pou kapab determinen, definitivman ti san lotorizasyon. Sa mon kapab konfirman. E se bann *Board members*, a sa letan ki ti sinyen, sa. Ki ti agree lo sa. Parske ti ganny fer atraver rezolisyon dabor. Apre ti ganny enplimante dan kontra.

E sa sete Mr Faure, msye Choppy e MrsAgathine koman *Managing Director at that time*. Mersi.

**MR SPEAKER**

Yes. Onorab Roucou. Klarifikasyon.

**HON MICHEL ROUCOU**

Minis anvi ki sa kontra ti ganny sinyen parey ou'n dir, Eski ler bann zofisye in ganny demande pour zot kit lofis, savedir zot in ganny fer arête, eski i annan en sonm larzan ki Gouvernman, in bezwen pey zot, an vi ki aprezan sa kontra in tonbe?

**MR SPEAKER**

Mersi Onorab. Minis.

**MINISTER DEVIKA VIDOT**

Bon Onorab. Eski ou pe fer, ou pe fer referans avek kontra sa endividi li menm? Wi ti annan en zofisye, ki son kontra in ganny terminen. E li, in ganny peye son bann *dues* an sa ki konsern bann zour konze.

Me selman, napa bann *dues* avek son kontra ki'n ganny peye. Sa i akoz ki nou'n regarde bann kondisyon, ki ti annan dan ou kontra. E nou'n vwar poudir ti napa merit pou pey sa bann *dues*. Mersi.

**MR SPEAKER**

Mersi. Minis Onorab Romain. Kestyon.

**HON GEORGES ROMAIN**

Mersi Mr Speaker. Minis bonn apre midi, avek madanm Lebon. Minis dan enn ou bann entervansyon, dan lepase ou'n fer, referans ki'n dir lo *best* lo sa devlopman - lo 2020, ki ou ti fer resorti ki annan later, ki'n ganny vann. Me parkont sa later pa'n zanmen ganny konble, akoz ti ankore delo sale.

E la dan ou *statement* mon pa'n tann ou fer vre sorti lo - ou pa'n mansyonn sa. Eski sa i ankore *still* le ka, oubyen si sa. Si ou ti kapab koz enn pti pe lo la. Akoz mon annan en lot kestyon mon anvi demann lo la Minis. Mersi.

**MR SPEAKER**

Mersi Onorab. Minis.

**MINISTER DEVIKA VIDOT**

Mersi Mr Chair. Mon'n fer, referans avek sa dan mon *statement* Onorab. Petet ou pa'n *pick up*. Sa se sa etranze ki'n ganny *reclamation rights*. E apre i annan, in osi annan lenter dan lezot bout later. So mon'n fer resorti, sa wi. I enn bann plent ki sa dimoun pe met devan. Konmkwa i ti'n donn larzan. Me selman i pa'n fini sa ki i sipoze gannnen.

**MR SPEAKER**

Wi ou annan *follow-up* Onorab Romain. Wi.

**HON GEORGES ROMAIN**

Wi. Mersi Minis, *sorry* kekfwa mon pa'n tann ou byen ler ou'n dir sa. Me selman, parkont anvi ki ou'n dir wi. Prezan ki pou arive Minis, eski sa proze pou ganny, sa later pou ganny konble, oubyen zot pou mazin pou rann sa dimoun son larzan ki'n peye? Mersi Minis.

**MR SPEAKER**

Mersi. Minis.

**MINISTER DEVIKA VIDOT**

Mersi Mr Chair. Mersi Onorab. An se moman la. *Board* in demande ki sa, endividi i donn zot detay lo ki bann peyman. Savedir vin avek bann dokimantasyon, pou montre egzakteman ki kantite larzan i ti peye. E kote son bann drwa, in ganny mete dan sa bann dokimantasyon.

Savedir nou ankore pe esper sa bann dokiman. Mersi.

**MR SPEAKER**

Mersi. Kestyon Onorab Aglae.

**HON EGBERT AGLAE**

Mersi Mr Speaker. Bonn apre midi Minis e Mrs Lebon. Minis, ou'n fek resorti la ki bann larzan ki sa endividi ki'n peye la, i pe demande, eski *Development 2020*, i annan en kont labank? E dapre ou rikord, si ou annan la ek ou - si peyman i bezwen ganny fer,

i bezwen pas atraver sistenm banker. I pa vin ek en sak larzan, pou mwan donnen.

Si ou kapab verifye sa. Si sa ti pas dan zot sistenm, aköz ou kapab al rod ek sa labank, ouswa zot kont pou fer bann prosedir.

Dezyenm, *as at now* la Minis, si ou kapab, si ou annan sa lenformasyon ek ou, konbyen later ki'n fini ganny vann e ki - Aköz mon pas laba, mon'n vwar dimoun pe reste tou laba, mwan en.

Konbyen ki'n fini *settle*, ki pe reste e konbyen ki dan *pipeline*, fitir baze lo sa plan devlopman ki egziste? Mersi.

### **MR SPEAKER**

Mersi. Minis.

### **MINISTER DEVIKA VIDOT**

Mersi Mr Chair. Mersi Onorab. Mon pou reponn ou premye kestyon, apre *Chairperson* i ava reponn ou dezyenm bout kestyon. An sa ki konsern, bann kont labank.

2020 ti annan li detrwa kont labank letan nou pe regard dan son bann zafer. E byensir tranzaksyon, ki'n ganny fer labank i kapab ganny *trace*. Me nou pe koz environ 10an, ouswa en pe mwens, an term tranzaksyon.

E mon krwar se pour sa rezon ki nou pe lev sa dosye. E nou pe donn avek, en Lazans ki li i annan tou resours. I

annan tou bagaz, ki pou kapab, zisteman antre dan sa bann dokiman. demann labank bann dokimantasyon ki manke. I ava annan li sa kapasite pou li fer tou le neser pour li kapab vwar egzaktman e *trace* tou sa bann tranzaksyon. Mersi.

### **MR SPEAKER**

*Thank you.*

### **CHAIRPERSON MURLINE LEBON**

Ok. Mersi Mr Chair. Annefe lo kote, dimoun parey ou'n dir. I annan dimoun pe reste laba. I deza annan apepre environ, pa plis ki 10 dimoun ki'n fini konstrir, ki pe reste. Apre i annan bann dimoun ki'n fer *condominium*, touzour dan prosedir zot pe finaliz zot proze.

E parey son non i dir, 2020. I vedir tou dimoun ti eksepte ki *by* 2020, ti pou'n fini fer zot devlopman. Me selman anvi sityasyon *COVID*, parey zot in dir. So ki nou'n fer lo sa nouvo *Board*, nou'n ekrir tou bann rezidan laba. E nou'n donn zot ankor 24 mwan, i vedir ki par Avril 2024, ki nou pe ekspekte ki tou konstriksyon in fini ganny fer lo zil. Mersi.

### **MR SPEAKER**

Mersi *Chairperson*. Nou ava al lo Onorab Monthy. I

**HON PHILIP MONTHY**

Mersi Mr Chair. Bonn apre midi Minister, bonn apre midi Mrs Lebon. Minis eski ou kapab dir nou, lekel bann lakonpanyen ki ti pe *operate* lo zil?

E lekel zot bann propriyeter? E eski in annan okenn konfli lentere, ant propriyeter sa bann lakonpanyen e bann *Board members*, sa lakonpanyen? Mersi.

**MR SPEAKER**

*Thank you.* Minis.

**MINISTER DEVIKA VIDOT**

Mersi Mr Chair. Onorab pli gro konfli lentere ki nou'n, nou'n se ki konsern en konsiltan. Ki li i ti dan laplipar miting *Board*, i ti la, i ti prezan, i ti bokou angaze dan lamenzaman lakonpanyen. E li in benefisyè, avek pli gro bout later lo Zil Soleil. Mersi.

*(Off-Mic)*

**MR SPEAKER**

Minis reponn kestyon. Sa ki annan kestyon i a demande silvouple. Ler i lev lanmen. Ou'n fini Minis. Byen.

**HON PHILIP MONTHY**

Yes, Mr Speaker, mon le zis konnen lekel sa, non sa konsiltan silvouple. Ti ava

enportan ki Minis i donn nou sa. E grander sa siperfisi sa later ki sa endividi in gannyen. E apre i annan mon dezyenm kestyon, osi pou Minis reponn. Mersi.

**MR SPEAKER**

*Ok* Minis in demann son klarifikasyon. Apre i dir i annan son dezyenm kestyon pa ankor reponn. Sa se sa. *Ok.*

**HON PHILIP MONTHY**

Bann diferan lakonpanyen ki pe *operate*, e zot bann propriyeter. Mersi.

**MR SPEAKER**

Byen. Minis.

**HON PHILIP MONTHY**

Si Minis i annan sa lenformasyon.

**MINISTER DEVIKA VIDOT**

*Ok.* Siperfisi later i 38mil met kare. *Ok* i vwar, e sa i pli gro morso later ki annan lo Zil Soleil. An sa ki konsern, bann lakonpanyen ki pe *operate*, zis pou mwan klarifye Onorab, eski ou pe fer referans avek bann lakonpanyen ki ti pe donn servis, Zil Soleil tel ki *landscaping*, ensidswit?

**MR SPEAKER**

Onorab klarifye. Wi.

**HON PHILIP MONTHY**

Wi Mr Speaker. Enzenyer, konsiltan, *landscape* tou sa bann servis ki ti annan li zil. E apre Minis pa ankor dir nou, non sa endividi Mr Speaker.

**MR SPEAKER**

Minis.

**MINISTER DEVIKA VIDOT**

Mersi Mr Chair. Non sa endividi, i Mr Alain Hazan. E li ki propriyeter, li ki annan *lease* lo pli gro morso later. E i ti osi konsiltan, pour *2020 Development*.

Bann lezot lakonpanyen ki ti afilye, avek 2020, ou ti annan ou *Gibbs Consulting*, ki li. *Gibbs Consulting* e *Gibbs* li ti'n ganny, ti'n partisip dan en *tender* e i ti'n ganny selekte koman enzenyer, ouswa enzenyer konsiltan pou proze.

Ti osi annan diferan, a en moman letan ti annan, diferan bann lakonpanyen *landscaping*, ki ti pe fer lamenzaman zil.

Tou resaman si mon pa tronpe ti, *HNS Landscaping* ti dernyen. Madanm Chair, in fer referans avek lakonpanyen sekirite, ki ti annan lo zil. E pou *STP*, ti annan akoz ti annan en *sewage treatment plant* lo zil.

E sa ti pe ganny amenaze osi, par en lakonpanyen, mon napa non sa lakonpanyen, avek mwan

antet. Me selman sa ti osi, ti pe ganny zere par en lakonpanyen. Mersi.

**MR SPEAKER**

*Thank you.* Minis. Onorab Woodcock.

**HON WAVEL WOODCOCK**

Mersi Mr Speaker. Minis mon pou kontiny mon kestyon dan laliny ki Onorab Monthy i demande. Minis, si nou pe ganny sa kler sa msye ki ou'n mansyonnen Alain Hazan, i en konsiltan, avek *2020 Development*.

E in osi, akimil 38mil met kare later. E ou'n dir mwan ti annan en *tender process*, ki ti ganny fer pour zot proze *2020* ganny en konsiltan.

Be eski sa msye la, i ti form par. I ti partisip dan sa *tender process*? Eski i ti ganny apwente atraver *tender*, ouswa zis en dimoun ki'n ganny apwente koumsa menm?

Eski ou kapab dir nou osi ki kalite kontra ki *2020*, i annan avek sa msye? Ki kondisyon dan sa kontra? Konbyen i pe ganny peye? Ki bann benefis i pe gannyan apard sa 38mil later, ki'n akimile?

E eski zot in satisfè avek nivo travay ki sa konsiltan in fer. Sirtou kot i konsern bann proze, bann proze ki'n ganny fer lo Ile Soleil? Mersi.

**MR SPEAKER**

*Thank you.* Onorab, Minis repons *please*.

**MINISTER DEVIKA VIDOT**

Mersi Mr Chair. An sa ki konsern, *tender process* ki *Gibbs* ti ganny apwente koman konsiltan. Dapre rikord ki nou annan, i ti sipoze annan partisipasyon Mr Hazan. Me mon pa kapab konfirm avek ou, la. Ziske ler mon re-al regard bann dokimantasyon.

Akoz ou bezwen al *back*, i detrwa lannen pase. So, me selman sa ki mon kapab konfirm ek ou, se *Gibbs* ti ganny, apwente sa konsiltan avek tou bagaz lo sa nivo profesyonnel, koman en profesyonnel dan domenn konstruksyon.

Mr Hazan li son apwentman, li mon pa asire ki manner ti ganny fer. Si ti annan en *tender*, ki ti ganny fer. Me li i ti ganny apwente koman en lot konsiltan, lo proze. E i ti souvan ganny *referred to as, project consultant*. Savedir li ki ti pe konsilte lo bann proze.

E, letan nou'n fer diskisyon, e letan nou fer bann antretyen avek bann dimoun, ensi byen ki *Management* lakonpanyen. Nou'n ganny leksplikasyon *Management e Board*, nou'n ganny leksplikasyon ki Mr Hazan, li son rol ki i ti fer plizoumwen,

sete regarde ki manner i pou fer bann kou lenfrastruktir lo zil, bann proze, ganny fer a en pri pli ba.

E atraver sa, e atraver Kontra ki Mr Hazan ti annan avek lakonpanyen, i ti benefisyè, lo 28poursan *savings* ki lakonpanyen ti kapab fer lo sa bann proze. Mersi.

**MR SPEAKER**

Wi Onorab Woodcock. Klarifikasyon.

**HON WAVEL WOODCOCK**

Minis eskiz mwan. Mwan mon ti krwar poudir, Ile Eve ti en manboulouk, be ler mon pe ekout ou la i paret mwan - Ile *2020 Development*, i en nespes kales kase. Mr Speaker, Minis mon anvi en pe detay lo la.

Sa msye lo sak *savings* ki i fer lo okenn proze ki fer i ganny li konbyen 28poursan? Be konbyen larzan ki sa msye in akimile, *over the years* depi 2012, ziska la tou sa letan ki'n konsiltan avek 2020?

Apre eski ou kapab dir nou ziska 2012, ziska la i annan okenn *audit* ki'n ganny fer? E ki kalite kondisyon ki *Board* in kapab fer avek en dimoun, pou donn li 28poursan, lo *savings* ki fer lo en proze. Be son larzan sa? Kote ki annan?

Mwan zanmen mon'n deza tande sa kalite kontra

koumsa, kot en konsiltan i ganny 28poursan lo *savings* ki i fer lo ledò Lepep Seselwa! E Minis eski ou kapab dir nou, konbyen larzan ki sa msye pe *claim*, ki i sipoze ganny peye pou sa *saving* ki i sipoze - Apre mon'n demann ou en kestyon zafer standar.

Sa bann proze, ki'n ganny fer laba, eski son standar i bon standar, ki kalite standar? Minis zis sey eksplik nou enn pti pe. Mersi.

### **MR SPEAKER**

Mersi. Minis ou repons.

### **MINISTER DEVIKA VIDOT**

Mersi Mr Chair. Mersi Onorab pou ou kestyon. Mon a sey mon mye pou abord tou. Bon an sa ki konsern standar. A lafason ki Mr Hazan ti fer son travay, ti vèdir ki, dan bokou ka, son lobzektif sete fer desann kou sa lenfrastriktir.

E ki fer, ki i annan dan serten ka, ki standar in ganny konpromi. E sa i annan, i annan rapor ki enzenyer in deside pou zot pa sertifye. Parske zot in santi poudir, zot nivo travay i pa ale avek sa bann konpromi ki pe ganny fer.

So i annan konpromi ki'n ganny fer lo lenfrastriktir. Se pou sa rezon dan mon *statement*, mon'n mete. Mon'n dir poudir aprezan Gouvernman i pou bezwen

regarde ki mannyer nou pou bezwen finans serten amelyorasyon a lonterm.

An sa ki konsern ki kantite larzan ki Mr Hazan lo son kontra i *entitled*. Dapre rikord, dapre *claim* ki Mr Hazan i fer, se ki lakonpanyen 2020 ti pou dwa li R58milyon.

E odit bann oditer, letan zot in fer zot odit dan bann *Management letters* ki zot in donn avek *Board*, zot in fer resorti poudir, sa sonm i pa enn ki pe kapab ganny siporte, par bann dokimantasyon. E zot pa ti satisfè avek.

Me malgre sa, sa i plent, e letan sa *settlement* in ganny fer, sa *settlement* in ganny fer baze lo sa bann sonm. E ankor enn fwa se pour sa rezon, ki nou, nou pa bann eksper dan sa domenn.

*Board* i annan en serten limit ki i kapab ale pour fouye, pou vwar pou donn sa konfirmasyon. Se pour sa rezon, ki nou pe refer sa dosye, avek Lazans konsernen pour ki zot, zot kapab kontinyen pour fer lenvestigasyon.

E zis pou met an perspektiv sa larzan ki lakonpanyen, i sipoze dwa sa konsiltan i - parey mon'n dir ou i R58milyon, e me selman *claims* ki'n ganny fer se ki kou lenfrastriktir lo zil in ariv 110milyon.



E vedir ki son, peyman deza i preskidir - plizoumwèn i preski lanmwaye, kou ki bann lenfrastruktir in ganny fer. Mersi.

**MR SPEAKER**

Mersi. Minis, mon a pran kestyon Onorab Bastienne.

**HON DESHIELA BASTIENNE**

Mersi Mr Chair. Bonn apre midi Minis, bonn apre midi avek Mrs Lebon. Minis etandonnen ki deza, i annan rezidans lo Ile Soleil. Eski ou kapab dir avek nou Lasanble, ki kantite kare later ki'n ganny vann avek Seselwa ki kantite ki'n ganny vann avek etranze?

E apre mon ti a kontan demande Minis, ki kantite kare later dan rezidansyel ki ankore pou vann? Eski ou annan sa rikord Minis? Mersi.

**MR SPEAKER**

Mersi Onorab. Minis. Larepons.

**MINISTER DEVIKA VIDOT**

Mersi Mr Chair. Mersi Onorab pour ou kestyon. Nou pou napa sa rikord la avek nou. Napa sa statistik avek nou. Me nou kapab donn ou lenformasyon. Me zis pou fer resorti ki bann morso later rezidansyel, dapre brosir ki 2020 ti fer lapreferans i pou al bann Seselwa.

E later komersyal li i ti annan en posibilite ganny vann avek bann etranze. Mersi.

**MR SPEAKER**

*Thank you.* Onorab Lemiel. Kestyon.

**HON SYLVANNE LEMIEL**

Mersi Mr Speaker. Bonn apre midi Minis avek Mrs Lebon. Tou dimoun a lekout. Mon kestyon i al enn pti pe dan laliny Onorab Bastienne. Akoz mwan osi mon ti le konnen konbyen later rezidansyel, ki'n ganny vann laba.

Apre mon ti oule konnen konbyen kare later, ti koute, letan ti ganny vann? Konbyen larzan osi ki 2020 in anmase avek lavant kare later rezidansyel.

*Both* avek Seselwa, si zot in vann avek etranze. Si Minis i kapab dir mwan. E apre dernyen Mr Speaker, mon ti pou kontan konnen, si i ti annan en *proper handing over* ki ti ganny fer, ant *previous Management* avek nouvo *Board* ki la? Mersi.

**MR SPEAKER**

*Thank you.* Minis.

**MINISTER DEVIKA VIDOT**

Mersi. Mersi Mr Chair, mersi Onorab pour ou kestyon. Onorab pou lemoman, lala mon napa sa statistik. Me

madanm *Chair*, pe regarde si petet i napa avek li pou an se ki konsern ki kantite morso later, ensidswit ki'n donnen avek - Ki'n ganny alokasyon, pour la baz rezidansyel.

An sa ki konsern *handing over*, ti napa vreman en *handing over*, ki ti ganny fer par *Board* presedan. Me selman *Managing Director* ti ankore la, letan nouvo *Board* ti ganny apwente.

E se la ki bann enteraksyon, bann diskisyon in ganny fer. E *Board* in kapab angaze, pou sey etabli ki mannyer bann keksoz in deroule dan lakonpanyen. Mersi.

### **MR SPEAKER**

Wi Chair, ou pou azout keksoz la.

### **CHAIRPERSON MURLINE LEBON**

Ok. Mersi Mr Chair, mersi Onorab. *Basically*, baze lo en *initial land use plan* ki nou ti annan, ler nou vwar, i ti annan environ 50 morso later rezidansyel.

Selman, sa i enkli diferan konponan. *Either* bann *private dwelling*, i annan ki fer *condominium*. Apre i annan bann morso, i annan environ 7 morso pour komersyal.

E apre nou annan sa bout, 38mil met kare ki pou *tourism*. Apre i annan en lot

morso ankore, ki apepre 3mil met kare si mon pa tronpe. Li osi i pou, in ganny demarke pour *earmark* pou *tourism*.

Be selman, li sa dimoun li ki nou osi nou pe sey konpran, i pa'n aste atraver 2020, i ti plito en lesanz ki ti ganny fer, ant li avek Minister Later a sa letan. Apre i annan sa morso pou proze lasante, apre i annan en morso ki ti ganny *earmark* pour proze lekole.

### **MR SPEAKER**

*Thank you.* Klarifikasyon Onorab Lemiel. *Yes, go ahead.*

### **HON SYLVANNE LEMIEL**

Mersi Mr Chair. Pour mwan, mon ti le en lenformasyon spesifik. Mersi Mrs Lebon pour leksplikasyon ki ou'n donnen. Selman mon lenformasyon spesifik, ki mwan mon ti le konnen la - kare rezidansyel, e konbyen larzan petet zot ti'n anmase, konbyen ti koute en kare rezidansyel? Konbyen larzan petet zot in anmase?

Sa 50 ekek kare ki ou annan, i pou tou sa ki ou'n nonmen. Me zis rezidansyel, personnelman konmsi ki kantite petet ti annan. E konbyen, larzan?

### **MR SPEAKER**

*Thank you.* Ale Chair ou a klarifye.

**CHAIRPERSON MURLINE  
LEBON**

Ler nou regard bann tranzaksyon ki'n deroule, ou vwar poudir bann *plots* ti annan diferan pri. I depan lo son grander later, e parey Minis in masyonnen dan prezantasyon oparavan.

Parfwa ou vwar i annan serten *disparity, in terms of rate* ki'n ganny servi pou en serten *versus the other*. Ok. So *basically*, parey pe dir, odit pe ganny fer la, so nou, nou *assume* ki *once* tou keksoz i ava in *order, then* nou a kapab *gather* sa bann lenformasyon, pou donn zot.

**MR SPEAKER**

Ok. So ou pa kapab donn sa sif la pou lemoman. Se sa, *ok* se sa korek.

**CHAIRPERSON MURLINE  
LEBON**

Non. Nou pou napa sa sif la egzaktaman avek mwan la.

**MR SPEAKER**

Mersi. Mersi Chair. Mon a pran kestyon Onorab William.

**HON WAVEN WILLIAM**

Mersi Mr Speaker. Mr Speaker, pou ed nou kapab konpran enn pti pe, i fer nou, i fer 15an depi ler sa proze in ganny inisye. So mon anvi

demann avek Minis, par lefe ki zot in apwent en nouvo *Board*.

Mwan anvi sey konpran, e Minis sey fer nou konpran, letan ti apwent en nouvo *Board*, konbyen larzan si i annan sa lenformasyon ki ti annan dan kont sa lakonpanyen?

Akoz si zot ti pe fer peyman, e an menm tan nou'n ganny fer konpran poudir, ti annan det ki ti pe akimile. So konbyen finalman ler ti annan sanzman Gouvernman, e nouvo *Board* in ganny apwente, ti annan, *handing over*, konbyen larzan ki ti annan?

E si kapab dir nou, la a ler aktyel ki groser det ki'n akimile?

E dezyenmman Minis, eski baze lo sa bann lensertitid e fason fer, eski a ou avi ti annan en latitid lesefer? E ki keksoz pa ti transparan, dan lafason ki pratik in ale? Mersi.

**MR SPEAKER**

Mersi Onorab. Minis.

**MINISTER DEVIKA VIDOT**

Mersi Mr Chair. Mersi Onorab pour ou kestyon. Onorab mon pou napa sonm egzakt dan kont labank, ki ti annan letan *Board* ti pran lofis. Me selman an sa ki konsern bann det, enn bann premye plent ki ti vin kot nou sete en madanm ki ti'n rann later. E li ki, e ti

annan anviron en pe larzan. Anviron en R600mil, ki pa ti ankòr ganny rann.

Sa i bann premye, bann premye plent ki i ti vin demann nou. E dir mwan ou dezyenm parti kestyon Onorab, ou'n demann mwan zis pour klarifye *please*?

**MR SPEAKER**

Kestyon, *yes* Onorab.

**HON WAVEN WILLIAM**

Minis mon pe demann ou, si lafason ki sa bann tranzaksyon, e pratik ki'n ganny fer in - ti mank. Eski dapre ou leksperyans, e keksoz in ganny dekouver, eski ti mank latransparans dan sa fason fer?

**MR SPEAKER**

Mersi. Minis.

**MINISTER DEVIKA VIDOT**

Bon. Mersi Mr Chair. Lo kote det Onorab, dan ou kestyon ou ti'n demann mwan kote det. Parey mon'n mansyonnen, ti anviron 110milyon. Me selman, parey mon'n eksplike i annan bann plent ki pe vini. E nou ekspekte ki, sa i ogmante. Eski pratik ki ti pe ganny fer i demontre latransparans?

Mon pa pou agree avek sa. Non ditou. Akòz nou vwar poudir i annan bokou, bann tranzaksyon, ki i ti ganny

santralize otour bann dimoun ki ti annan lenformasyon ki mannyer - e an Angle nou apel sa *inside information*, ou annan lenformasyon pour ki lo bann detay lakonpanyen.

E apre ou *endup* pe benefisyè. Ouswa ou ganny sans, ou ganny sans pou ou benefisyè avek later. So sa i pa ditou lafason, i pa en fason transparan. E sa in ganny fer resorti, dan *Management letter* ki oditer in donnen. In ganny fer resorti lo rapor ki *PEMC* in donnen.

Savedir sa i pa en keksoz ki mwan mon pe dir avek ou, senpleman. E alor mon krwar ki tou sa bann ka endividuelman, Lotorite nesese, Lazans konsernen, i ava analiz zot. E, zot ava regard li o profon. E zot ava vwar ki bann aksyon nesese i bezwen ganny pran. Mersi.

**MR SPEAKER**

Mersi Minis. Onorab Adelaide, ou kestyon.

**HON FRANCOIS ADELAIDE**

Mersi Mr Chair. Ou a eskiz mwan Mr Chair, parey Morisyen i dir mon vreman dekouyonnen, avek sa ki mon tande ozordi. Minis eski i vre sa ki mon'n tande?

**MR SPEAKER**

Onorab *please*.

**HON FRANCOIS ADELAIDE**

Dir mwan zis konfirman avek mwan. Mon'n tann ou nonm-

**MR SPEAKER**

Permet Manm demann son kestyon.

**HON FRANCOIS ADELAIDE**

Mon'n tann ou nonm en Mr Barry Faure. Eski li menm sa Mr Barry Faure, ki ti SS pou Zafer Etranzer? Mon'n tann ou nonm Mr Yves Choppy, eski li menm li ki dan Gouvernman pou en *PS* kot *MLUH*?

Mon trwazyenm, *query* prezan Minis. Atraver mon resers, mon trouve poudir sa Mr Hazan, i en etranze ki'n ganny nasyonalitye Seselwa. Minis, eski Seselwa nou kapab soutire, bann dimoun ki nou donn sitwayennte, pou vin fer bann bon keksoz. E zot vin parey bann mersener dan nou pei! E sa i, i fer mwan ankoler. Ler nou nou pe kriye Seselwa napa manze, napa soz. Nou annan dimoun etranze ki nou pe donn sitwayennte, pou zot vol nou Minis !

Minis mon pa konnen ki manyer mon pou dir ou, Be solman eskiz mwan, Mon lemosyon i koumsa, aköz mwan mon *care* pou mwan Seselwa. Ki pou arive Minis? Ki pou arive? Zis konfirman, si sanmenm sa bann dimoun, si i vreman zot menm. Mersi.

**MR SPEAKER**

Byen. Mersi Onorab Minis. E silvouple. Onorab Larue mon tann ou tro bokou.

**MINISTER DEVIKA VIDOT**

Mersi Mr Chair. Mersi Onorab pour ou kestyon. Onorab mon osi, mon konsernen parey ou. Se pour sa rezon, ki nou pe fer le neser pou nou fer sir poudir bann dimoun ki annan lekspertiz, dan sa domenn i kapab donn zot latansyon, *full* latansyon lo sa ka, lo sa dosye.

Akoz mon osi mon vwar, mon vwar i etranz lafason ki keksoz in ganny deroule. Mon pa ti la, mon pa konnen ki laranzman ki ti annan, dan Gouvernman sa bann letan.

Mon pa konnen aköz ki i annan serten lakonpanyen ti ganny lese pou zot ganny dirize dan fason ki zot ti pe, ki zot ti anvi. Malgre lefe ki zot ti en lakonpanyen Gouvernman. Sa i en keksoz ki lenvestigasyon i a bezwen fer resorti. An sa ki konsern Mr Faure, wi sa se SS Barry Faure e *PS* Yves Choppy. Sa bann letan, zot ti Manm lo *Board 2020*. Mersi.

**MR SPEAKER**

Mersi. Yes, Onorab Pillay ki *point of order*?

**HON SEBASTIEN PILLAY**

Ok, Mr Speaker mwan mon annan en *point of order* anba

*Order 8.* E avek, annefe *Standing Order* an antye mon pou bezwen anvoy lo ou.

Mon totalman konpran, e dakor kestyon ki Onorab in *move*. Me i annan mo ki nou servi dan Lasanble. E mon pa pe al kont Onorab. Me nou bezwen ganny gidans ek ou. *Ok.*

Eski i annan mo, sa mo 'dekouyonnen' ou pe permet li ganny servi dan Lasanble ozordi?

Non be konmsi ou bezwen, ou bezwen dir nou.

*(Off-Mic)*

### **MR SPEAKER**

Mon a reponn. Mon bezwen admet, ki pa toultan mon konpran egzaktman ki Manm in dir. Mon pe dir ou laverite Onorab, e si sa mo in ganny servi, i pa akseptab e Onorab Adelaide ou a rapel pou pa servi li ankor. Mersi.

Bon mon ava al Onorab Larue, si ou annan ou kestyon, demande la, apre kekfw a ou a kapab ekout lezot.

### **HON FLORY LARUE**

Mersi Mr Speaker. Bonn apre midi Minis avek, madanm *Chair*.

Eski i korek poudir ki *at* lansman sa proze, an Mars 2011, Mr Michel ti dir ki, sa en nouvo zil, en nouvo lavenir. E

sa proze i pou pare an 2020, pou bann investiser.

Eski ou kapab dir nou Minis, konbyen sa bann *Board members*, ti ganny peye. Ou'n nonm trwa dimoun. Mr Faure, Mr Choppy ek Mrs Agathine. Si ou kapab dir nou zot saler, ki ti ete silvouple?

E lefe ki, sa zil ti'n ganny fer pou apepre 50 *residential plots*. Avek en 10enn later komersyal ki a son finisyon i ti pou annan apepre 1000 zabitan. Eski sa 110milyon ki ou'n dir deza in ganny investir pour lenfrastruktir, i fer ki sa bann lenfrastruktir, ki an plas, i an konformite pou akey tou sa bann dimoun lo sa zil.

Ki enkli son *STP*, son pon ek tou bann lezot keksoz delo, elektrisite. E eski ou kapab dir nou si...

### **MR SPEAKER**

Pa bokou kestyon Onorab. Fer li dernyen sa.

### **HON FLORY LARUE**

... si - lefe ki annan sa kantite manboulouk, si ou'n kapab deside pou met en case kot *Anti-Corruption Commission*, lefe ki nou pe koz lo en *PS*, ek en *SS* ki'n *involve* dan sa sityasyon. Mersi.

### **MR SPEAKER**

Mersi. Minis ou larepons.

### **MINISTER DEVIKA VIDOT**

Mersi Mr Chair. Mersi Onorab pour ou kestyon. An sa ki konsern lapey bann *Board Members*, Mon pou napa sa sif avek mwan, pour mwan kapab donn apre midi Onorab.

An sa konsern, konformite pou akeyir bann zabitan. Bon sityasyon ki mannyer i ete, an se moman, Par egzantp ek sa *sewage treatment plant*. Letan PUC in fer son analiz, in eksprimen, in eksplik nou poudir, sa *sewage treatment plant*.

Akoz ki i ti annan ki bann rezidan Chetty Flat, ki ti ganny konekte lo la, i pa pou ase pou li akeyir bann zabitan letan zil i fini devlope, an antye. E alor se pour sa rezon ki, mon ti'n mansyonnen pli boner, ki Gouvernman pou bezwen regarde ki mannyer, nou pou bezwen finans lagrandisman, sa *sewage treatment plant*.

Ankor sa nou bezwen, al fouy dan fon Gouvernman. Lo size pon, ti annan en laranzman ki dapre rikord ki nou vwar, i annan en laranzman ki sak pon, ki zwenn Pointe Larue, kote kot Anse Faure, pou al an al an kot Ile Soleil.

Dapre pon orizinal, i ti sipoze en pon ki an konformite, parey avek bann standar, ki Sesel ek *British standard*, ki Sesel osi i swiv. Savedir i sipoze, en pon normal.

Me deroulman ki'n pase, in fer ki e in posib atraver bann *advice* ki konsiltan in donnen. E la mon pe fer referans avek Mr Hazan, ki sa pon i pa'n ganny fer parey en pon normal. Me plito zot ti fer vini en pon sorti *La Chine* e zot ti plas li la, lo en baz tanporer.

E alor i fer ki a longer ditan. Letan zil i komans ganny tou son bann zabitan. E *even now*, i difisil pou bokou dimoun servi sa pon. Akoz, sa pon ki mannyer mon ganny ki mannyer zot fer mon konpran, ou pa kapab al vit lo la. *Speed limit* i 5 kilomet par ler. E alor i pou nesaser ki si, sa pon pou kontinyen ganny servi i pou bezwen ganny ranplase. Mersi.

#### **MR SPEAKER**

Mersi Minis. En lo kestyon.

#### **MINISTER DEVIKA VIDOT**

An sa ki konsern, fer pase dosye. Sertenman Onorab, nou pou fer, nou pe remet dosye avek tou bann Lazans konsernen. E sa i konpri, ACCS mersi.

#### **MR SPEAKER**

Wi Onorab ou annan pwen ki pa'n ganny adrese?

#### **HON FLORY LARUE**

Non en *follow-up question* lo sa ki Minis in reponn.

**MR SPEAKER**

Klarifikasyon.

**HON FLORY LARUE**

Lefe ki sa pon, i en pon 5kilomet a ler. E *STP* i manke, ou bezwen *extend* pou *feed* tou sa popilasyon, konbyen eski Minis i krwar i pou kout Gouvernman pou nou kapab fini sa zil, lefe ki napa larzan e la prezan, nou dwa ankor? Ki manner nou pou fer pou nou fini sa zil? Mersi.

**MR SPEAKER**

Mersi Minis.

**MINISTER DEVIKA VIDOT**

Mersi Mr Chair. Onorab mon napa sa sonm. Mon napa sa sonm avek mwan pou lemoman. Sa i en keksoz ki Departman Lenfrastriktir, pou bezwen asiste nou. Pou regarde egzakteman konbyen, sa pou koute. An se moman *PUC*, in ganny mandate pou li regard, sa *STP*, e *takeover*, son *servicing* e tousala.

E sa osi i en travay, ki zot pe fer alor dan ankor en pe letan. Nou a ganny sa bann sif, egzakt. Mersi.

**MR SPEAKER**

Mersi Minis. Onorab Pillay ou kestyon.

**HON SEBASTIEN PILLAY**

Mersi Mr Speaker. Mr Speaker mon apresye bann larepons ki

Minis pe donn nou. Me selman mon enn pti pe dezapwente ki, Minis ti'n devret *at least* konplet sa lodit.

Akoz i annan serten lenformasyon ki nou pe demann li, ki nou pa pe kapab gannnen. Sirtou an relasyon avek bann larzan ki dan bann kont.

(Espere Onorab, mon pe demann mon kestyon. Aret malelve.) An relasyon avek bann kontrakter ki'n travay lo zil. Ou'n nonm nou *Gibbs*. Baze lo resers ki mon'n fer i annan *UCPS* osi ki'n *involve*, dan konstriksyon lo zil, ki ou pa'n nonm nou. I en gro lakonpannyen. *Marketing* sa bann *plots*, ki'n ganny fer par en lakonpannyen ki apel 'Switch' non? *Switch*.

So i annan *tout* en seri *gamme*, lenformasyon pour nou konnen. Pou nou kolektivman etabli, en portre lo sa, lo sa size.

So premyerman, an relasyon avek sa zil i annan 123mil met kare sa zil, si mon pa tronpe. Sa ki'n ganny raporte dan tou bann *news item*. E ladan ti annan sa 52 *plot* pou rezidansyel. E ou'n enform nou poudir sa bann *plot* rezidansyel, bann dimoun deza in fini aste.

So mon premye kestyon, pour sa, taler ou ti ganny demande sa kestyon lo bann *rates* ki'n ganny servi. E ou'n



dir nou, i paret poudir i annan bann *rates* ki'n ganny servi diferaman pou serten *plots*.

Eski *Board* letan in fer son rapor, zot in fer en lenvestigasyon pour etabli, akoz serten plot i n ganny vann, a serten *rate*? E lezot *plot* in ganny vann a en lot *rate*? Sa i mon premye kestyon.

Mon dezyenm kestyon i konsern, bann plot, ankor enn fwa ti annan en kestyon ti ganny demande, se eski se bann Seselwa ki'n aste plis bann *plot*?

Akoz mannyer ou'n eksplik nou komersyal ti sipoze al pour plito etranze. So ou ava klarifye pour mwan. Eski an relasyon avek bann *plot* rezidansyel. Lamazorite in ganny aste par Seselwa?

Me si pa lamazorite, se si plis in ganny aste par Seselwa. Si ou kapab donn nou okenn sif lo la.

Prezan mon vin lo sa, dernyen kestyon ki ou'n reponn *regarding* bann antite pe *investigate* sa dosye. Dan mon lopinyon sa dosye ti'n devret fini al kot sa bann Lazans, *by now*.

So eski ou pe konfirm ek nou, akoz sa enportan si Lasanble nou pou pran en dezyenm, en lot *step* lo la, eski ou pe konfirm ek nou, ki sa dosye in fini al kot bann antite

konsernen. Setadir bann Lazans.

E ler ou koz ek nou oditer, eski ou pe koz ek nou lo Oditer Zeneral, oubyen eski ou pe koz ek nou lo en oditer prive ki pe odit sa bann keksoz? Mersi Mr Speaker.

### **MR SPEAKER**

Mersi Onorab. Minis kestyon, repons.

### **MINISTER DEVIKA VIDOT**

Mersi Mr Chair. Mersi Onorab. Mon ava sey kouver tou ou bann pwen. Ou'n demande akoz ki nou pa'n kapab fini determin sa bann sonm ensidswit? Onorab i senp, parske nou napa kapasite pou nou kapab fer sa. Sa bann keksoz, sa bann travay, i bezwen ganny fer par profesyonnel. E i bezwen ganny kouver byen anba Lagreman.

E alor ti preferab pou donn sa louvraz avek en oditer pour li kapab fer le neserer. Bann lakonpanyen ki ou'n mansyonnen *UCPS*, *Switch*. *UCPS* ti *main* kontrakter ki ti fer bann lenfrastruktir.

E *Switch*, parey ki mon'n ganny en konpran, zot ti lakonpanyen o debi ki ti fer le neserer pou fer bann lavertisman ensidswit, pour vann bann *plots*. Ou'n fer referans avek *rates* ki'n ganny servi e bann diferan *rate*, ki

mon'n mansyonnen dan mon *statement*.

Bon i annan en ka spesifik, ki wi *Board* i ti met a mon latansyon. Zot ti *raise* ki lo en menm morso later ki'n ganny divize an de, i annan en endividi li ki ti pey bokou plis ser, son *rate per square meter* ki en lot endividi, e si *Board* in fer lenvestigasyon, akoz ki sa ti ganny servi. Nou ti ganny leksplikasyon avek *Management* poudir sa ti en fason ki zot ti fer.

E sa ti larepons, ki nou ti ganny donnen alor sa ti zistifikasyon *Management* ti ganny donnen. Me i pa neserman pwennvi ki nou, nou aksepte. Nou annan nou pwennvi lo la.

Eski Seselwa, lamazorite Seselwa ki'n aste bann morso later. Wi mazorite, Seselwa ki'n aste later, lo Ile Soleil. Mon pou klarifye ki bann morso komersyal, sa i kapab ganny aste par etranze. Me osi egalman kapab ganny aste, par Seselwa. E i annan bann morso komersyal, ki'n ganny aste par etranze, atraver prosedir sanksyon.

Dosye in fini, ganny remet avek ACCS, en parti e oditer i annan en oditer prive, ki pe antreprann louvraz, pou etabli bann sonm ensidswit lo sa *case*. Mersi.

**MR SPEAKER**

Wi klarifikasyon Onorab Pillay.

**HON SEBASTIEN PILLAY**

Mersi Mr Speaker. Mon annan de pti klarifikasyon. Mon premye klarifikasyon, an Zilyet 2019 Lasanble ti pran en *PNQ*, lo domaz ki ti'n ganny fer lo bann lakaz Anse Aux Pins. E sa letan sete Minis Charlette ki ti vin reponn sa *PNQ*.

E Prezidan Larepublik ki ti *Leader* Lopozisyon byensir. Swivan sa in annan plizyer vatevyen lo la. So eski ou kapab dir nou, lefe ki ou'n pran sa dosye, *Board* in pran sa dosye. Sa i en konponan enportan, *regarding* sa dosye akoz domaz ki'n ganny fer ek lakaz sa bann dimoun, i bezwen ganny remedye.

Ki zistans *Board* ale, pou etabli bann koz e fe an relasyon ek domaz ki'n ganny fer ek propriyete sa bann dimoun?

E an relasyon avek odit.

**MR SPEAKER**

Eski Onorab, zis mon a klarifye. Eski sa i an relasyon avek Ile Soleil? Avek.

**HON SEBASTIEN PILLAY**

*Yes-yes* Mr Speaker.

**MR SPEAKER**

I annan relasyon. *Ok*.

**HON SEBASTIEN PILLAY**

I an relasyon ek Ile Soleil akòz enn bann konpanyen ki ti pe fer konstriksyon, sa pon, an 2019 ti ariv domaz avek, bann lakaz lo litoral Anse Aux Pins. Pou bann dimoun Anse Aux Pins.

E ti en size en *PNQ* dan Lasanble. E Minis ti vin reponn kestyon. Me akòz 2020, ki ti *contract* sa konpanyen pou fer sa louvraz. So i bezwen annan en responsabilite, ki ganny *ascribed* lo *either* konpanyen or sa 2020 li menm, an relasyon ek domaz ki'n ganny fer ek sa bann lakaz, pou bann dimoun Anse Aux Pins.

So mon ti a kontan konnen si *Board* prezan dan sa rapor ki Minis in vin prezant Lasanble. Se sa ki mon pe koz lo sa konpreansivite, si zot in ganny okenn lenformasyon *regarding* sa.

E mon dernyen kestyon i konsern, *value for money* avek Oditer Zeneral. Eski Minis pa krwar, e i osi nesese ki Oditer Zeneral. Akòz sa, sa konblaz ti ganny fer lo larzan ki Gouvernman in peye. Annou al orizinalman ler konblaz, ti ganny fer. E Gouvernman ti probableman depans en kantite larzan par met kare pou fer sa konblaz.

Sa ki nesese pou etabli, se si sa konblaz prezan, in

annan sa *value for money* an relasyon avek larzan ki Gouvernman ti peye, pou konble li. E avek bann devlopman, ki'n konsekaman arive, ki sipoze arive. Ou le konpran kot mon pe vini ek sa?

So eski, zot in konsider osi *involve* Oditer Zeneral, *from* perspektiv en *performance audit* lo sa size. Ki ava fer pli konpreansiv e nou ava ganny tou lenformasyon, *from* tou perspektiv.

En odit finansyel, par oditer prive, lenvestigasyon ACCS e lo en nivo *enforcement*. E sa lodit *from* en perspektiv performans.

E, dernyen pti kestyon Mr Speaker. Se ou'n prezant sa ek nou. Eski ou kapab dir nou *what's next*, prezan? Ki pou arive, nou'n koze, nou'n demann kestyon, nou'n eksprim lakoler. E tou dimoun in dir *whatever, whatever*, si ou kapab dir nou *what's next*. Mersi.

**MINISTER DEVIKA VIDOT**

Mersi Mr Chair. Mersi Onorab

**MR SPEAKER**

*Thank you*. Minis repons. Mikro silvouple.

**MINISTER DEVIKA VIDOT**

Mersi Mr Chair, mersi Onorab pou bann kestyon. Mon rekonnèt, Gouvernman i

rekonnet e nou senpatiz avek bann dimoun Anse Aux Pins ki'n vin devan, ki'n met zot plent pour tou sa letan. E sa ki nou pe sey fer la, se nou pe sey met en lord. Nou pe sey etabli en lord dan sa bann, dan tou sa bann keksoz. E nou, an se moman pe sey regarde oli dokimantasyon pour zistifye bann keksoz.

E an menm tan ki *Board* pe fer le neser ki pour ou, kominik avek sa bann dimoun. Akoz mwan kot mon lofis personnelman mon resevwar bann let sorti kot sa bann dimoun.

E nou dan en staz kot nou pe *compile* bann plent ki pe antre. E byen prosennman *Board*, pou fer le neser pou zwenn avek sa bann dimoun, pou etabli pozisyon ki zot, zot pe met devan. E baz li avek kwa ki *Management* lakonpanyen, ti dir an sa ki konsern bann plent. E osi, kwa ki kontrakter ki'n antreprann travay lo Zil Soleil in met devan.

So byensir sa i en keksoz, ki pou bezwen kontinyen. Me sa ki nou kapab reasir bann, zabitan, se ki nou pou la pou siport zot, plis, plis ki posib dan sa prosis. An sa ki konsern Oditer Zeneral. E akoz ki nou'n bezwen al kot en oditer prive.

Onorab relman letan nou'n, pran. Letan *Board* in

*takeover*, letan nou'n regard sityasyon finansyel lakonpanyen. Nou vwar ki i pa enn ki byen. E ki larzan ti pe fini vitman, e alor tou mwayen neser pou nou ede pou tenir larzan, nou'n esey fer. Nou'n esey rod fason pli, bon marse ensidswit pou fer bann keksoz. E byensir, Oditer Zeneral ti enn nou bann premye laport ki mon ti al tape.

Pou zot kapab ed nou ek sa, sa travay. E malerezman, zot ti enform nou poudir 2020 i tonm an deor zot *scope*. E alor zot pa'n kapab ed nou. Se pour sa rezon ki nou'n al kot. Mon ti ekrir zot, mon lofis ti ekrir zot. Me selman zot ti dir zot pa pou kapab, get *involved*.

*What's next*. La ki *Board* in etabli serten sityasyon pertinan, nou'n remet sa avek ACCS. Sa ki *Board* pou kontinyelman fer la, Se regard sa bann plent an sa ki konsern bann zabitan, e sey fer zot mye pou fer sir poudir bann Lazans konsernen, ki sipoze pe pran sarz bann servis, lo Zil Soleil zot pe fer sa pou benefis bann zabitan.

E byensir nou annan sa bann plent bann zabitan Anse Aux Pins ki sa osi i en keksoz. Savedir la *next step*, se sa bann keksoz ki nou pou al travay for lo la. Mersi.

**MR SPEAKER**

*Thank you.* Minis. Onorab ou'n ganny ase letan.

### **HON SEBASTIEN PILLAY**

Zis en pti klarifikasyon apenn. Minis akoz zot pa'n konsider ekrir, Minis Finans demann li pou donn en lenstriksyon Oditer Zeneral, parey Lalwa i permet li.

Rezon mon pe dir sa, se akoz sa oditer prive. Lefe ki 2020 i tonm an deor. Nou *scope oversight*, nou pa ganny sa rapor *oversight* pa ankor ganny table dan Lasanble Nasyonal. Lo okenn rapor Oditer Zeneral, nou ganny li ganny table.

So se sa ki mon pe rode ki manner, nou pou ganny sa rapor.

### **MR SPEAKER**

Ale Minis, ou kapab adres sa pwen silvouple.

### **MINISTER DEVIKA VIDOT**

Mersi Mr Chair. Annefe Onorab, lafason mon ti fer sa *request*, mon ti fer li atraver biro Minister Finans. E Minis Finans, ti ekrir Oditer Zeneral.

Me *still* larepons sete zot pa pou kapab antre. Parske sa i tonm an deor zot ziridiksyon. Alor, petet sa i en konversasyon, ki lo kote FPAC zot kapab petet *raise* sa avek Oditer Zeneral, pou regarde ki manner zot kapab donn sipor

pour nou kapab etabli bann fe dan sa ka. Mersi.

### **MR SPEAKER**

Mersi Minis Onorab Henrie. Kestyon.

### **HON GERVAIS HENRIE**

Mersi Mr Chair. Bonn apre midi tou dimoun. Mr Chair mon premye kestyon. Minis in nonm, en lalis bann *outstanding* det ki 2020 i annan. Mon ti a kontan si i donn nou en an zeneral, letan nou pe koz la ozordi. Konbyen larzan *2020 Development* i dwa? Sa i mon premye kestyon.

Dezyenm kestyon mon ti ava kontan demann Minis, dan bann apel li lanket preliminar ki zot in fer - *Board* e ou Minister, Eski zot in kapab etabli sonm ki sa, sa pli plot gran plot 38mil met kare in koute?

Parski an 2017, Mr Barry ti fer en prononsman poudir sak kare later Leta i ekspekte anmas R5milyon, avek. Ouswa \$338,300. So eski zot in kapab etabli, si sa i leka? E Mr Speaker, mon krwar bann plot later ki'n vann, i enportan ki larzan, ki'n ganny ranmase avek i ganny etabli.

Pour la senp rezon, ki an 2017 ankor Mr Faure ti dir, tou le 52 plot in ganny vann, pou fer bann *simplex*, *duplex*, *condominium* avek bann

*commercial*. E ki tou larzan ki'n ranmase, ti pou peye pou lenfrastriktir.

Alor i enportan ki sa i ganny etabli, e la mon krwar kot mon ti ava *challenge FPAC*, sirtou atraver son *Chairperson*, pou pran en lenter dan sa dosye, akoz nou pe koz larzan piblik. Mersi.

### **MR SPEAKER**

*Thank you*. Onorab. Minis wi.

### **MINISTER DEVIKA VIDOT**

Mersi Mr Chair. Mersi Onorab pou ou bann kestyon. Mon a sey abord zot tou. Sonm ki *Board* in kapab etabli la an se moman, i anviron R110milyon. I anviron R110milyon.

Konbyen larzan ki atase avek sa pli gro morso later, 38mil met kare, *lease agreement* ki'n ganny sinyen lo sa, morso later. I, annan en ou pou en valer \$8milyon. Me kestyon se ki eski tou larzan in antre dan kont? E sa i ava anmenn mwan dan lot, morso mon kestyon.

Larzan ki'n ganny anmase. Konbyen, eski in antre dan kont. Konbyen ki'n ganny peye, eski larzan in ganny servi, pou pey lenfrastriktir. Tousala Onorab, i bann keksoz, ki nou pa ankor kapab etabli li 100poursan. Parske i pou *involve*, al dan

bann kont. Fer bann *trace*, bann kantite rekonsilyasyon.

E ankor parey mon'n fer resorti, i bann - enn i resours ki nou napa pou nou kapab fer sa. E alor nou prefere pas li avek en Lazans ki nou konnen i annan sa pouvwar, pou li demann lenformasyon.

I annan sa pouvwar pour li al kot labank, pou li demann *whatever* lenformasyon ki i bezwen. E mon krwar, ki atraver sa nou a kapab finalman, nou a kapab ganny en konklizyon, lo egzakteman, ki kantite larzan ki'n anmase. Eski, tou larzan in ganny servi byen pou finans lenfrastriktir. Ou eski larzan, in ganny servi pou pey konsiltan?

Eski peyman konsiltan, ti zistifyab? Eski bann depans ki zot ti pe fer lo zil ti zistifyab, tou sa bann keksoz. Sa lenvestigasyon i ava determinen. Mersi.

### **MR SPEAKER**

Mersi Minis Onorab Bistoquet, ou kestyon.

### **HON ROSIE BISTOQUET**

Bonn apre midi Minis. Bonn apre midi Minis ek ou delegasyon. Bonn apre midi tou dimoun. Minis mon demann de senp pti kestyon, en. Pou mwan mon leker i fermal, akoz nou'n tann ti annan 'bal dan simityer', be la

nou tann bal dan later 2020..  
Sa i grav.

Minis lekel sa de Avoka, sa bann Avoka, ki ti dan lo proze ki ti ansarz proze 2020? E konbyen larzan, ki zot sak sa de Avoka ti gannyen? Apre Minis dir nou, tou sa problem ki'n pase dan sa 2020. Tou sa bal ki'n pase, tou sa kales kase, dir nou Minis, lekel sa Minis, ki ti ansarz sa letan lantreprenarya ki pa'n kapab, met en lord dan sa sityasyon? Dir nou Minis.

*(Interruption)*

**MR SPEAKER**

Mersi. Lord silvouple ! Wi Minis ou repons. Minis.

**MINISTER DEVIKA VIDOT**

Bon. Mersi Mr Chair, mersi Onorab pou ou bann kestyon. Bon 2020 ti annan li depi o debi, en *retainer* avek en Avoka. E sa se Mrs Priscille Chetty. A en moman letan, letan ti annan Lagreman ki ti ganny fer pour *offset* sa det ki swadizan, 2020 ti dwa lakonpanyen. E sa lakonpanyen atraver sa endividi, ti dwa 2020, sa ti ganny fer atraver en *legal opinion*.

Savedir en lopinyon legal ki Mr Basil Hoareau ti donnen. Mersi.

**MR SPEAKER**

Wi Onorab i annan pwen?

**HON ROSIE BISTOQUET**

Minis ou'n mank dernyen mon pti kestyon, ki mon'n demande. Lekel Minis ki ti responsab, ki pa'n kapab vwar tou sa problem. Met en pe lord.

**MR SPEAKER**

Minis. Ou annan.

**MINISTER DEVIKA VIDOT**

Bon, mon krwar en moman letan ti Onorab Minis Cosgrow, si mon pa tronpe. Ok.

*(laughter and Interruption)*

**MR SPEAKER**

*Order please! Order!* Yes, en moman Onorab Cosgrow. Minis en moman. Minis ou'n fini avek ou larepons?

**MINISTER DEVIKA VIDOT**

Non Mr Chair, mon ti zis anvi pas - fer resorti poudir mon pa asire selman, si sa ti tonm anba son portfolyo. Me selman i ti annan, i ti merite annan en dimoun dan Gouvernman ki ti pe dan *Cabinet*, ki responsab pou vwar ki bann tranzaksyon, kwa ki ti pe pase dan lakonpanyen. Mersi.

**MR SPEAKER**

Ok. Mersi.

**HON WALLACE COSGROW**

Mr Speaker. Mon kapab fer en klarifikasyon.

*(Interruption)*

**MR SPEAKER**

*Order please! Order!*

**HON WALLACE COSGROW**

E ou la. Reste ou trankil don!

**MR SPEAKER**

Silvouple. Bann Manm!

**HON WALLACE COSGROW**

Mr Speaker.

**MR SPEAKER**

Mon pou bezwen- Mon pou bezwen komans met enn deor, si mon kontinyen ganny *disturb*. Onorab Cosgrow, wi mon ava aksepte ki ou donn en klarifikasyon a se pwen. Si ou le adrese.. Yes, Onorab Cosgrow.

**HON WALLACE COSGROW**

Mersi Mr Speaker. Mersi Mr Speaker, mon ti a kontan fer en klarifikasyon. E mon krwar Minis dayer in komans fer sa klarifikasyon. An 2017 mon ti Minis pou Lendistri Lantreprenarya avek *Business Enovation*.

A sa letan, sa ki tonm anba mon portfolyo sete *SENPA*, sete *SIB*, sete *IAEA*, e pa 2020.

Mon krwar swa Onorab, pe sey *mislead* Lasanble, pou met sa lo mwan. Ouswa i annan en *attempt deliberately* par Minis pour-

**MR SPEAKER**

Non ou'n klarifye. Byen.

*(Interruption)*

**HON WALLACE COSGROW**

Pou met sa lo mwan. Me nou, nou konnen. E sa i dan rikord Gouvernman, e sa i dan rikord Gouvernman. Ki 2020 *Development*, pa'n zanmen tonm anba okenn responsabilite, Minis Wallace Cosgrow. Mersi silvouple!

**MR SPEAKER**

*(Interruption)*

**MR SPEAKER**

Mersi. Annou, nou ava aksepte leksplikasyon Onorab Cosgrow. Nou a kontinyen, avek kestyon. Onorab Mondon.

**HON TERENCE MONDON**

Mersi Mr Speaker. Bonn apre midi Minis, avek *Chairman Board*. Mon kestyon se sa diskisyon, i relye avek sa diskisyon ki ou'n fer, avek sa ansyen *Management*. Zot in ganny, si mon konpran byen



zot in ganny sans koz sa *Management* avan.

*Managing Director*. Ki leksplikasyon i donnen, pou sa laranzman ki, ki'n vin dan kontra ki zot fer avek sa konsiltan?

Ki manner mon konpran ki *Gibbs* i annan son bann prozeksyon pou kou lenfrastruktir. E li sa konsiltan li, i rod fason pou ganny en pri, pli ba. Parey in koze, lanmenm la in ganny bann keksoz, bann lenfrastruktir ki anba standar. E sa *savings*, e sanmenm sa, sa larzan, sa diferans, ki li sa konsiltan i ganny 28poursan. E larestan i al dan kof 2020.

E an menm tan ki li it i pe ganny peye, R35mil koman pou konsiltan, ki form parti son louvraz. Ki leksplikasyon, ou'n gannyen ek sa bann dimoun ki ti la. Si i annan okenn leksplikasyon, pour sa kalite laranzman ki vreman i fermal pou pep Seselwa ler ou gete.

Pou nou pran larzan pep Seselwa, pou nou fer kalite laranzman, pou benefisye en serten endividi? E dapre, e menm manner mon konpran, ki sa konsiltan ti ganny akse avek tou bann data, tou bann rikord lakonpanyen. E i ti menm asiz lo *Board*.

Mon anv i konnen vreman, ki leksplikasyon ou'n gannyen pour sa.

E dezyenman lo bann rapor odit. Bann rapor odit ki ti ganny fer par, si mon konpran *BDO*, ki ti fer sa bann odit. Ti annan de lokazyon 2018-2019 ki zot ti en *qualified audit report*. E mon konpran ki zot ti napa dimoun osi, ki bann *project accountant* dan zot ek lakonpanyen. Oubyen menm *outsource*.

Lo rikord, petet ki zot in ganny, zot vwar ki petet si ou kapab elabor enn pti pe plis, ki sikonstans, ki zot ti ganny en *qualified audit report* an 2018, 2019 si mon pa tronpe. Zot ava koriz mwan si mon'n tronpe. Solman i annan de lannen ki zot in ganny *qualified audit report*. Mersi.

### **MR SPEAKER**

Mersi Onorab. Minis.

### **MINISTER DEVIKA VIDOT**

Mersi Mr Chair. Mersi Onorab pou ou bann kestyon. Antretyen avek *Management* e lenpresyon ki mon'n gannyen avek, nouvo *Board* avek pandan zot antretyen, se ki sa laranzman ti enn ki, zot ti konfortab avek. Zot ti konfortab, avek.

E *involvement* sa konsiltan partisip avek zot lo *Board* miting - sa ti keksoz ki, ti'n vin en keksoz ki ti regilye. E alor zot ti pe vwar poudir sa i dan lentere. I dan pli bon

lentere lakonpanyen. Sa i ti zot lopinyon la.

E mon pa krwar ki, zot ti, e i posib ki zot, zot pa ti pe vwar ouswa zot pa ti santi, poudir ti annan en konfli lentere. Se pour sa rezon, ki mon panse ki bann dimoun, ki annan sa manda pour zot determin vreman sa bann keksoz, zot, zot ava pran sa case. E zot, zot ava fer determinasyon, lo la.

An sa ki konsern, sa sonm larzan ki, e sa kontra e bann term ki sa konsiltan ti pe ganny peye. Sa osi, sa kontra in ganny sinyen anba sa *Board*. Savedir anba *Management Board*, i vedir ki zot ti konfortab avek lakantite larzan ki sa msye ti pou benefisye lo la.

So ankor enn fwa sa, i dapre zot rezonnman pou zot. I pa neserman pwennvi ki mwan mon annan, i pa neserman pwennvi ki petet ou osi ou partaze.

An sa ki konsern *audit report, qualification*. Dan *Management letter* ki ti ganny fer resorti par oditer. I demontre ki, sa bann sonm ki 2020 ti sipoze dwa, ti annan serten kestyon. Alor pa ti pe kapab bann serten, *chiffre*, serten sonm pa ti kapab ganny siporte par bann dokiman, par levidans.

So sete sa bann keksoz, e byensir lafason ki

lakonpanyen ti pe ganny zere. Ti annan serten defayans ki ti pe ganny fer resorti.

E sete sa bann rezon prensipal, ki letan mwan mon'n fer sesyon avek oditer, zot in fer resorti e zot in donn nou, kopi *Management letter* ki zot ti donn *Board* dan sa bann letan. Mersi.

### **MR SPEAKER**

Mersi Minis. Mon a pran kestyon Onorab Cosgrow.

### **HON WALLACE COSGROW**

Mersi Mr Speaker. Bonn apre midi Mr Speaker. Bonn apre midi Minis. Bonn apre midi tou Manm, Mr Speaker, si ou permet mwan, avan mon demann mon kestyon, pou, zis enn pti klarifikasyon ankor Minis.

Mon konnen, ki ou konnen ki poudir sa responsabilite ki zot in nonmen avan ti tonm anba Minister Finans. E ti ganny transfer avek ou resaman. Ti touzour anba responsabilite Minister Finans, al tyeke, al rod zot *facts right*, avan zot vin *deliberately* sali non dimoun dan Lasanble !

Mon kestyon Mr Speaker.

### **MR SPEAKER**

Mersi.

### **HON WALLACE COSGROW**

Mon kestyon, eski i an relasyon ek sa, sa bann domaz ki *2020 Development* ti okazyonnen, avek bann lakaz, bann dimoun dan larezyon, so eski Minis i kapab dir nou.

Akoz mon konnen ozordi ki lo son *Board*, i annan en Mr Guy Ferley ki en *Director*. E mon lenformasyon ki mon annan, se ki Mr Guy Ferley, i osi Avoka *2020*, si mon korek. E si mon konpran byen i osi Avoka *UCPS*.

So eski pa ekstansyon, eski, par ekstansyon ozordi, nou pa pe vwar en sityasyon kot, par ekstansyon, Minis Derjacques, i osi en asosye. Pa pe benefisye avek serten keksoz Gouvernman.

**MR SPEAKER**

Onorab. Onorab Pillay.

**HON WALLACE COSGROW**

Dezyenm Mr Speaker.

**MR SPEAKER**

Onorab Pillay, mon pe demann ou pa komans enteronp deba silvouple. *Sorry* kestyon, silvouple. Mersi.

**HON WALLACE COSGROW**

Zot a kapab-

**MR SPEAKER**

Onorab termin ou kestyon.

**HON WALLACE COSGROW**

Si Minis i kapab klarifye mwan lo la. Dezyenm, eski an vi sa bann konfli, eski sa bann zabitan ki zot lakaz, in ganny andomaze, pou kapab ganny en rekour avek *2020 Development* ki tonm anba ou portfolyo Minis, an vi ki i annan en posibilite, konfli lentere dan sa sityasyon? Mersi.

**MR SPEAKER**

Mersi. Minis repons.

**MINISTER DEVIKA VIDOT**

Mersi Mr Chair. Mersi Onorab pou ou bann kestyon. Lo ou pwen klarifikasyon Onorab an sa ki konsern lekel, Minister ki sipoze responsab Finans, lot. *Bottom line* is ti devret annan responsabilite Gouvernman lo ki mannyer lafason, lakonpanyen. Non-non.

**MR SPEAKER**

Permet Minis reponn silvouple.

**MINISTER DEVIKA VIDOT**

Nou pa kapab montre ledwa, i sipoze annan responsabilite ki Gouvernman i pran. E.

**MR SPEAKER**

Onorab Cosgrow, ekoute silvouple.

**MINISTER DEVIKA VIDOT**

E Minister Finans i pa sel, reprezantasyon Gouvernman.

I ti devret annan, en kolektiv, Gouvernman i en *body* ki konpri diferan antite. E mwan, mon dezapwente akoz sa pa'n ganny *taken up* pli boner.

An si konsern Mr Ferley, Mr Ferley i en manm lo *Board*, wi. I pa Avoka 2020. Sa i fo. An sa ki konsern son relasyon, avek *UCPS*, sa mon pa kapab antre ladan, parske sa i en keksoz prive. Mon pa kapab donn okenn konfirmasyon, lo la.

E an sa ki konsern, bann dimoun Anse Aux Pins, bann dimoun ki'n fer zot plent. Parey mon'n fer resorti, pli boner Onorab. Nou senpatiz avek sa bann dimoun pou lefe ki, pou sa bann lannen. Zot in bezwen pe, anmenn sa batay.

E se pour sa rezon ki mon'n donn mon komitman, lofis in donn komitman ansanm avek *Board* ki nou pou regarde. Nou pou asiz avek sa bann dimoun, nou pou esey etabli tou bann fe, e bann sikonstans otour sa bann plent. Mersi.

### **MR SPEAKER**

Mersi Minis Onorab Sandy Arissol.

### **HON SANDY ARISSOL**

Mersi Mr Speaker. Bonn apre midi ankor enn fwa a tous. Premyerman mon anvi felisit Minis. Felisitasyon Minis, ou avek ou *Cabinet of Ministers*.

Prezidan, nou Gouvernman, pou asire ki en travay pe ganny fer lo Ile Soleil 2020. Konpare ek Gouvernman ki ti la avan ek son Minis ki ti dan sa Gouvernman.

### **(APPLAUSE)**

### **HON SANDY ARISSOL**

Mr Speaker. Mr Alain Hazan, sa msye ki nou pe koz lo la, la. Ti en gran dalon *SPPF*, e i ti ganny nasyonalitye anba 5(1) parmi *SPPF* siporte par bann Minis sa letan, dan Gouvernman.

Mr Alain Hazan i annan *Voltaire Investment, Eclipse Consultancy, Crystal Properties*, sa dan li menm letan ou en konsiltan, i vin parey en lot tranzaksyon *Irish* ki ti arive ek *NDEA*. E nou vwar poudir, li menm li ki annan pli gro morso later. Sa se *almost* 10 arpan, later lo zil 2020.

Alor mon kestyon ki mon ti a kontan demande, letan mon tann Minis koz 58milyon, 100milyon, larzan ki *nou ti kapab donn ogmantasyon saler. Donn trezyenm mwan saler, donn dimoun, fer disel desann sorti R10 vin R2.*

Alors Mr Speaker, mon ti a kontan demann Minis, mon premye kestyon ki pe arive ek nou later, nou 9 arpan ki Mr Hazan in pran. Ki pe arive

avek nou later, pour ki dimoun ki sorti Anse Royale i kapab ganny en morso, dimoun ki sorti Anse Aux Pins i kapab ganny en morso, dimoun ki sorti Bel Ombre i kapab ganny en morso. Apre ki zot in espere pou plizyer, lannen.

E Mr Hazan li anba 5(1) in vini in pas devan tou dimoun. In ganny 10 arpan zis pou li tousel. Mon premye kestyon.

Dezyenm kestyon ki mon ti a kontan demann ou, ek tou sa bann vol, rikanman, *mismanagement*, in pas anba Sabrina Agathine, Barry Faure, Yves Choppy. Taler mon'n tann ou, ou'n mansyonn *Legal Chamber*, bann dimoun legal ki ti pe *advice* sa bann dimoun. Letan tou sa bann zafer ti pe pase, la.

Mon'n tann ou mansyonn de non. Priscille Chetty, avek Basil Hoareau. Mon dezyenm kestyon, eski i annan okenn konfli lenterere ant sa biro avek proze 2020, Anse Aux Pins? Mon dezyenm kestyon.

Mon trwazyenm kestyon ki mon ti a kontan demann ou se. Taler mon'n tann koz, lo en lakonpanyen sekirite. Ti pe ganny peye R40mil mon krwar par mwan, R45mil.

Ki sa lakonpanyen sekirite ti pe veye? Pye sed,

pon, miray, ros, delo sale. Minis eksplik nou, pour ki Seselwa i konnen kote zot larzan in ale anba Gouvernman *SPPF*, enkli bann Minis ki ti dan sa Gouvernman sa letan. Mersi bokou.

### **MR SPEAKER**

Mersi Onorab. Minis repons.

### **MINISTER DEVIKA VIDOT**

Mersi Mr Chair. Mersi Onorab. mon ava sey, kouver ou bann kestyon, pli mye posib mon kapab. *Ok* mon kapab donn klarifikasyon lo sa bann lakonpanyen, ki ou'n mansyonnen.

Bon an *Voltaire*, wi sa i en lakonpanyen ki Mr Hazan ki, ti okipe. *Basically, Voltaire* i ti, i ti sa lakonpanyen ki sa konsep letan sa konsep 2020, ti ganny formen. I ti sa lakonpanyen, ki ti vann, ki ti annan *intellectual rights* lo la. E i ti vann sa avek Gouvernman.

*Eclipse* li i sa lakonpanyen, ki Mr Hazan ti annan, i ti sa konsiltan. Depi taler nou pe non konsiltan. I ti fer li anba sa lakonpanyen ki apel *Eclipse*. E *Crystal Properties* li i sa lakonpanyen ki Mr Hazan ti servi, pou aste later sa 38mil met kare.

Bon, sa ki Gouvernman i enterese, Onorab se esey fer nou mye posib pour ki nou kapab reganny sa later si

posib. Akoz nou vwar poudir, nou ti kapab, nou, nou santi ankò la mon pe eksprim mon lopinyon personnel, poudir sa later ti kapab, ganny met a dispozisyon plizyè dimoun. E alor, pozisyon se nou pe regard fason pou nou kapab re pran sa later.

An sa ki konsèrn, bann konfli lentere. An sa ki konsèrn proze Anse Aux Pins *junction* prensipalman. Ou'n fer referans pou lemoman mon pa, mon pa okouran konfli lentere direk. Sa ki annan pou fer avèk proze Anse Aux Pins *junction*.

Sekirite 45, sekirite ki'n ganny peye. Kwa ki i ti pe veye egzaktman madanm Chair petet i a kapab donn ou, en pe leksplikasyon, lo bann ki bann kondisyon dan Lagreman sekirite.

**MR SPEAKER**

Mersi madanm Chair.

**MINISTER DEVIKA VIDOT**

Mon pa konnen si mon'n fini kouver tou.

**MR SPEAKER**

Madanm Chair, ou kapab azoute.

**CHAIRPERSON MURLINE LEBON**

Mersi Mr Chair, Onorab Mersi. zis pou fer en pti koreksyon son Kontra ti 40,500.

*Basically*, ki ti annan li, i ti annan en pti *shed*, en pti *hut*, kote larantre kot Anse Faure ti met 2 Zofisye la. Ki zis ti kontrol dimoun, parey ti bezwen fer lisyen pa kapab vin lo zil, *whatever* kontrol dimoun.

E annefe, petet i bon fer resorti osi, par egzanp konmela i annan ler bann rezidan i konplent i dir ou, dimoun an deor i vini i vin fer *disturbance*, i fer tapaz. E nou dir zot *ok* rod lasistans Lapolis. E Lapolis i menm dir nou poudir, ki lontan zot ti ale Ile Soleil, selman sekirite ti anpes zot, antre. So nou pa konnen akòz. *So basically*, zot ti pe zis vey Ile Soleil, kontrol dimoun ki antre oubyen sa.

Selman Lapolis ti fer nou konpran, poudir ki zot ti napa drwa. E nou, nou ti fer zot konpran poudir Ile Soleil, i en teritwar Sesel. I form parti distrik Anse Aux Pins. So si dimoun, zabitan Ile Soleil i rod lasistans Lapolis, zot devret, nenport moman, pe al asiste sa bann rezidan. Mersi.

**MR SPEAKER**

Wi Onorab Arissol. Klarifikasyon.

**HON SANDY ARISSOL**

Mersi Mr Speaker. Mersi madanm Lebon e Minis pou larepons. Mr Speaker, mon anvì retourn ankò lo sa

larepons ki Minis in donn mwan an relasyon avek *law chamber* la, konfli lentere.

Parske mon pe ganny lenformasyon, poudir sa i annan later ki'n ganny vann. Oubyen i annan later, tranzaksyon later ki'n pase, swa avek, Manm fanmir. Swa avek *law firm*, ki pe responsab Ile Soleil. Mon krwar i enportan pou nou koz la.

Pou nou asire ki napa nanryen ki pe ganny, ki pe ganny kit anba tapi. Si mon mal ou ava koriz mwan Minis. Selman mon ti a kontan redemann madanm Lebon, in regards to sekirite.

Eski ozordi ler nou pe koze, sekirite i ankor *available* laba? Si wi swa non pou nou konnen e konbyen pe kit pei, an zeneral? Mersi bokou Mr Speaker.

#### **MR SPEAKER**

Mersi Onorab. *Panel* zot a ekersi sa de pwen.

#### **MINISTER DEVIKA VIDOT**

Mersi Mr Chair. Mersi Onorab. *Ok*, pou klarifye sa *law chamber*, ti lo en *retainer basis*. I ti la pou, li regard bann, fer bann prosedir, fer bann *lease agreement*, finaliz bann *sale*. Parey ou okouran, sa ti prensipalman sa ki 2020 ti pe fer alor zot ti, sa *law chamber* ti la pou responsab zisteman sa.

An sa ki konsern tranzaksyon later. Dapre rikord ki nou annan. I annan, en dimoun ki annan relasyon de pre avek sa *law chambers*, ki'n kapab aste later lo Ile Soleil.

Me selman sa dimoun, la in deside pour li rann sa later. E zis pou klarifye osi, Onorab. *Sa law chambers* in termin son kontra avek 2020 pou en pe letan la. Zot nepli pe azir *on behalf of 2020*.

#### **MR SPEAKER**

*Thank you. CEO* ou a kontinyen. *Sorry Chair*. Eskize pa *CEO, Chair*.

#### **CHAIRPERSON MURLINE LEBON**

Mersi Mr Chair. Wi Onorab, mon kapab konfirman ki kontra, sa lakonpanyen sekirite in terminen, depi lannen pase. E pour le moman napa okenn sekirite prive lo Ile Soleil. Mersi.

#### **MR SPEAKER**

Mersi. Kestyon Onorab Andre.

#### **HON CLIFFORD ANDRE**

Mersi Mr Chair. Mr Chair mon ti ava kontan demann Minis, anvi ki letan *Ile Soleil* ti ganny konsevwar sete parti, sete pou kre bann later pou bann *small and medium enterprise*.

Spesyalman pou bann zabitan Anse Aux Pins. E ki sa

pa'n arive. Vi ki la in annan serten sityasyon lo *Ile Soleil*.

Eski sa proze koumsa pou kapab ganny konsidere? Sa bann dimoun i ava ganny sa bann lespas.

Dezyenm Mr Chair. Letan nou ekoute ki Mr Azan ti ganny 28poursan *savings* ki i ti fer. E Minis ou'n dir nou ki pou lemoman bann depans ki'n ganny fer lo *Ile Soleil* i 110 milyon.

Letan nou met nou 58 milyon ki zot dir zot ti drwa li *savings*. Sa i fer ki in sipoze fer en *savings* lo Gouvernman pou depans R207 milyon 142 mil 857.

Ki mannyer sa i posib si *Ile Soleil* in depans zis 110 milyon la? E li in ganny en 28 poursan lo en larzan ki in sipoze fer *savings* ki tonm 207 milyon.

E si sa i le ka, konbyen an totalite estimasyon *Ile Soleil* ti pou depanse pou met lenfrastruktir lo la. Pou ki i kapab ganny bann zabitan ek kliyan ki vin lo la? Mersi.

### **MR SPEAKER**

Mersi. Minis ou repons silvouple.

### **MINISTER DEVIKA VIDOT**

Mersi Mr Chair. Mon zis bezwen klarifikasyon dernyen morso kestyon Onorab. Si ou kapab donn mon dernyen.

### **MR SPEAKER**

Wi ou ava repete vitman Onorab.

### **HON CLIFFORD ANDRE**

Wi mon ti pe dir li konbyen an total sa estimasyon ki, *well* kekfwa rikord in montre oubyen kekfwa Chairman i kapab dir nou sa.

Rikord in montre ki zot ti pou depanse akoz i in fer en *savings* 207 milyon, *out of it* ki li in ganny 58 milyon. Ki zot ti drwa li e ki part sa later ki in gannyen.

Alors konbyen sa prozeksyon ti ete pou depanse lo *Ile Soleil*? Mersi.

### **MR SPEAKER**

Mersi. Minis ou kapab adrese.

### **MINISTER DEVIKA VIDOT**

Mersi Mr Chair. Mersi Onorab. An ski konsern *small and medium enterprise* sa bann alokasyon pou *small and medium enterprise*.

Mon ava zis eksplik ankor en pti kit zis pou klarifikasyon ankor parey mon fer pli boner.

Sa morso later ki nou apel li *T1*. Savedir sa morso later ki i annan sa *tourism plot* ki sa trantwit mil met kare. Sete sa morso later la ki ti sipoze annan en eleman, annan en konponan. Savedir i sipoze ganny sepa an de. Ki ti pou annan en eleman kot



bann pti e mwayen lantrepriz pou kapab ganny stasyonnen la.

Savedir la an se moman Onorab, sa i pa dan posesyon 2020. E alor Gouvernman pa pe kapab fer okenn plan konkret lo li. Ziska ler fitir sa case ensidswit i ganny determinen.

An ski konsern bann *savings*. Ok si mon kapab mon ava esey eksplik ou lafason ki mon'n ganny klarifikasyon avek *Management*. En pti pe avek konsiltan.

Mon ava sey eksplik ou. E *hopefully* ou ava kapab ganny en konpran. So *basically*, sa *savings* ti ganny kalkile baze lo diferans dan sonm ki ti lo *bill of quantities*. E avek sonm ki kontrakter ki zot in aktyelman peye pou fer sa bann travay.

Savedir se pou sa rezon ki ou vwar poudir sa sonm 200 ekek milyon ki ti sipoze sa kou ki dapre kotasyon ti pou arive. Se sa diferans in ganny kalkile *from* en kotasyon avek *actual*. So se sa ki zot in apel sa *savings*.

Eski an term dan domenn konstriksiyon. Eski sa i vreman en *savings*? Sa i annan kestyon. Ou kapab kestyonnen.

Akoz mon'n fer konversasyon avek ban dimoun ki dan domenn

konstriksiyon, bann profesyonnel.

E zot annan zot rezervasyon lo lafason ki sa in ganny kalkile. E ankor sa mon ava kit li dan lanmen bann eksper. Mon pa pou kapab fer mon konklizyon lo sa.

E byensir sa kalkilasyon ki ou'n fer an dizon pou kalkile an total estimasyon konbyen ti sipoze arive.

So sa ki ti sipoze ariv en sonm apepre koumsa. E ki mannyer sa konsiltan li alor in kapab fer keksoz, in kapab fer desann bann pri, se akoz in kapab fer bann negosyasyon avek kontrakter.

Savedir in kapab antre dan negosyasyon. E a en serten moman bann kontrakter ki mon'n fer konversasyon avek e ki nou'n vwar rapor ki ti annan serten kontrakter ki ti pe partisip dan proses ki zot, zot pa ti neserman satisfè avek lafason ki keksoz pe ganny fer.

Alors zot ti decide pou zot retir zot lekor dan sa proses. Mersi.

### **MR SPEAKER**

Wi Onorab Andre ou klarifikasyon.

### **HON CLIFFORD ANDRE**

Mersi. Minis parey posibleman lezot dimoun ki pe ekout nou, mon pe sey konpran. Akoz

letan nou pe dir in ganny peye 28 pousan. Sa i lo *savings*.

Sa ki ou'n dir. So si in fer 28pousan lo *savings*, savedir in fer en *savings* preski 208. Me selman nou met sa bann. So R207 pe al lo R208 milyon.

Me si in fer *savings* lo bann proze ki ti pe al fer. Sa bann proze ti pe al kout konbyen? R500milyon, 1 bilyon.

Ou konpran konmsi nou bezwen dir pep Seselwa si sa lenformasyon i *available*. Me selman letan nou pe get lo sa kalkilasyon.

I bezwen i ti en gro sonm. Ki li in kapab fer en *savings* 207 milyon. Akoz, 207 milyon dan en proze pou fer *savings*, i en pe *unrealistic* letan nou gete. Mersi.

### **MR SPEAKER**

Mersi. Wi Minis mon pa konnen si ou annan larepons pou sa ou kapab adrese.

### **MINISTER DEVIKA VIDOT**

Mersi Mr Chair. Mersi Onorab. Onorab si mon kapab partaz petet mon persepsyon personnel lo la.

A mon avi pou kapab fer *savings*. Pou ou kapab kalkil sa *savings* se ou ti pou plito kapab fer lo si en kontrakter i vini i dir ou, sa pou kout 50 milyon, me ou ou'n kapab fer negosyasyon avek li.

Aprezan ou dir li, aprezan i agree avek ou. zot agree pou fer sa pou 40 milyon.

E la mon ti ava dir ou be sa kontrakter in *quote* mon 50 milyon, me mon'n reisi pou mon fer li desann 40 alors i annan en 10 milyon *savings* ki mon'n kapab fer pou ou.

Me dan sa ka ki la, sa *saving* mannyer in ganny kalkile i paret in ganny kalkile lo *bill of quantity*. Savedir lo kotasyon. Ou konpran mwan?

ki pa kotasyon enzenyer. Konsiltan. Me pa lo, i pa en *savings* ki'n ganny *worked out* lo lakantite ki kontrakter in *quote*.

Si mon ganny sa byen. wi. Mersi.

### **MR SPEAKER**

Mersi. Onorab i ava bezwen aksepte sa. Onorab Gill ou kestyon.

### **HON CHURCHILL GILL**

Mersi Mr Chair. Bonn apre midi Minis. Tou dimoun ki pe ekoute. Minis ou ava eskiz mwan si mon kestyon ki mon pe demande in fini demande.

Akoz ler ou ti pe fer *Statement* mon ti lo *Bills Committee*. Mon pa ti la prezan. Me selman bout ki mon'n tande.

Mon premye kestyon i en pe dan laliny sa ki Onorab Andre ti pe demande. Me

selman avek ou lesplikasyon i kler ki i annan 2 fason.

Sa fason ki ou'n dir i posib, me selman si ou napa kotasyon ki sa kontrakter. Ler ou, ou pe kalkil sa profi. Si ou napa sa kotasyon ki sa kontrakter in donnen avek sa konsiltan pou fer konparezon, i tre difisil pou ou ariv lo sa sonm.

Alors mon kestyon eski apard ki sa 28poursan ki sa kontrakter, sa konsiltan ti pe gannyen lo profi?

Ou'n osi mansyonn *Intellectual Rights*. Apre en lot konpanyen. Eski sa kontra konsiltan ti pe kouver tou lede konpanyen an menm tan? Oubyen ti fer diferan lagreman?

Mon dezyenm kestyon. Pli boner ti annan kestyon lo *Audit Report* ki mannyer in ganny kalifye.

E eski i annan en lot *audit* ki pe ganny fer. Si wi. Eski sa bann dimoun, sa konpanyen ki pe fer sa *audit* pe rankontre serten difikilte.

Akoz ou'n mansyonnen taler ki ACCS ek lezot in komans ganny lenformasyon *partially*, pou nou kapab etablir dan Lasanble si sa Oditer pe ganny en pe difikilte.

Sanmenm sa ki bann lenformasyon in donn en pe *partially*.

Apre mon dernyen kestyon ler tou sa bann *issue*

in adrese, ou Minister in kapab fini adrese, e *Board* osi laba zot in fini ek sa.

Eski zot pou konsider baze lo lenformasyon ki zot annan. e bann proze ki dan *pipeline* lo 2020.

Eski zot pou dir ki sa i en proze ki pou profitab a lavenir. Mersi.

### **MR SPEAKER**

Mersi Onorab. Minis.

### **MINISTER DEVIKA VIDOT**

Ok mersi Mr Chair. Mersi Onorab pou ou bann kestyon. Mon ava esey adres zot. An se ki konsern ki mannyer sa konsiltan ti kapab fer sa bann negosyasyon.

Sete akoz i ti ganny akse avek sa bann lenformasyon. So koman konsiltan i ti kapab ganny akse avek kotasyon ki bann kontrakter ti pe fer.

I ti osi kapab ganny akse avek kotasyon ki enzenyer. Konsiltan enzenyer ti fer. Lo kote peyman sa kontra ki kouver sa 28poursan ti selman pou *ECLIPSE*.

Savedir sa *consultancy company*. E i ti osi kouver en peyman tou le mwan ki sa dimoun ti gannyen.

Savedir ou annan en retainer basis. Savedir i ti pe ganny peye tou le mwan. E an plis ki sa i ti annan sa konponan dan son kontra pou

li ganny pey sa 28 pousan lo *savings*.

*Voltaire* li separeman i ti ganny peye separe anba Lakonpanyen. Odit ki pe ganny fer zis pou ou lenformasyon, pe ganny fer par lakonpanyen prive.

E apre ki sa pou ganny fer. Zot ava kapab donn nou en pe plis lasirans lo bann *chiffre*, ki dan bann *financials*.

E kestyon lo eski nou pou konsider sa loperasyon profitab? Mon annan bokou dout lo la. Bokou dout, aköz an se moman Bann plent ki pe vini pou fer bann peyman i bokou plis ki larzan ki i annan.

I kantite fwa ki larzan ki i annan. So deza la mon pe vwar li ki lakonpanyen napa ase finans pou li kapab kouver a bann kou. Mersi.

### **MR SPEAKER**

Mersi Minis. Onorab Georges.

### **HON BERNARD GEORGES**

Mersi Mr Chair. Minis lopoziyon i kontan koz bokou lo donn en logmantasyon saler, rod en trwazyenm mwan, ed malere, pa al fer retret, Konsey Minis.

Avek sa an tet. E apre ki nou'n tann en kantite lenformasyon apre midi. Ed mwan Minis, dir mwan si

mon'n konpran byen sa ki ou'n dir nou apre midi.

Eski ou'n dir nou ki Gouvernman in peye pou konble sa zil *Ile Soleil*. Gouvernman in donn sa zil en lakonpanyen 2020, pou li fer lenfrastruktir e vann bann morso sa zil oubyen lwe pou devlopman prive e pou biznes.

Proze ti'n sipoze fini an 2020. Me la 2an pli tar, lenfrastruktir en pe in fer i annan ankor pou fer. Parsel later in ganny vann.

Me Gouvernman olye fer larzan pou kapab ed malere parey Lopoziyon i kontan demande, Gouvernman i war li dan en sityasyon kot li prezan ki drwa larzan avek sa lakonpanyen.

Eski nou'n konpran ou byen, se sa leka ki ou'n eksplik nou la apre midi? Mersi Mr Chair.

### **MR SPEAKER**

Mersi Onorab. Minis ou repons.

### **MINISTER DEVIKA VIDOT**

Mon larepons i wi Mr Chair. Wi Onorab sa ki ou'n *summarize*.

### **MR SPEAKER**

Mersi. Onorab Hoareau ou kestyon.

### **HON JOHN HOAREAU**

Mersi Mr Speaker. Minis dapre ou resers dan sa dezord total ki mon kapab apele, eski a tout fwa ou'n remarke ki bann *meetings* in ganny fer dapre bann prosedir legal?

E bann Lalwa ki govern sa lantrepriz. Si non, eski sa bann desizyon ou panse, dapre ou panse i legal? Mersi.

**MR SPEAKER**

Mersi. Minis. Minis repons.

**MINISTER DEVIKA VIDOT**

Mersi Mr Chair. An se ki konsern bann *meetings* dapre *Minutes* ki'n ganny retrouve, i paret ki tou *meeting in ganny* fer anliny avek prosedir legal.

Me kot in annan defayans se an term responsabilite lakonpanyen anver son *shareholder*. *Main shareholder* ki Gouvernman.

Se sa rapor, sa rapor ki manke. E la *PEMC* ki antite ki responsab pou regard sa bann antite Gouvernman. I pou kapab determinen a ki moman, osi annan a en serten moman ki zistans ki sa lakonpanyen in ale an term ka bann Lalwa ki li i pe zere.

So sa i en keksoz ki ankor i ava ganny determinen dan bann proses lenvestigasyon. Mersi.

**MR SPEAKER**

Mersi. Sa ti mon dernyen keston lo sa *Statement*. Pou

termin Lasanble mon krwar nou ava repas dan Staz Lasanble *Sergeant*.

Bon mon ava remersye Minis ek Chair person pou zot partisipasyon. E pou lenformasyon ki zot in partaz avek nou.

Remersye bann Manm pou zot keston e byensir nou piblik ki'n swiv nou.

Mon krwar i pou en pe tar pou koman s lo en lot size. Alor nou ava *adjourn* la. E nou ava rebran Lasanble demen bomaten 9er. Mersi tou dimoun bonn rantre. *Adjourn*.

***(ADJOURNMENT)***